



Milik Departemen P dan K  
Tidak diperdagangkan  
Untuk umum.

# Hikayat Peureudan Ali 1

Teungku Pakeh

Rektorat  
Pendidikan dan Kebudayaan

Departemen Pendidikan dan Kebudayaan



HIKAYAT PEUREUDAN ALI

1

DIREKTORAT KESENIAN SUB. DIREKTORAT PENGEMBANGAN APREIASI DAN PRESTASI SENI SENSI DOKUMENTASI	
Klas/Kode	No. Induk 1127/85
<i>DPR</i> 1127 85	Tanggal : 4 SEP 1985
	Paraf : <i>cus</i>



2992242  
TEU  
h

# Hikayat PEUREUDAN ALI 1

Dikarang oleh  
TEUNGKU PAKEH

Dialihaksarakan oleh  
RAMLI HARUN

Departemen Pendidikan dan Kebudayaan  
PROYEK PENERBITAN BUKU SASTRA  
INDONESIA DAN DAERAH  
Jakarta 1984

**Diterbitkan oleh  
Proyek Penerbitan Buku Sastra  
Indonesia dan Daerah**

**Hak pengarang dilindungi undang-undang**

## KATA PENGANTAR

Bahagialah kita, bangsa Indonesia, bahwa hampir di setiap daerah di seluruh tanah air hingga kini masih tersimpan karya-karya sastra lama, yang pada hakikatnya adalah cagar budaya nasional kita. Kesemuanya itu merupakan tuangan pengalaman jiwa bangsa yang dapat dijadikan sumber penelitian bagi pembinaan dan pengembangan kebudayaan dan ilmu di segala bidang.

Karya sastra lama akan dapat memberikan khazanah ilmu pengetahuan yang beraneka macam ragamnya. Penggalan karya sastra lama yang tersebar di daerah-daerah ini, akan menghasilkan ciri-ciri khas kebudayaan daerah, yang meliputi pula pandangan hidup serta landasan falsafah yang mulia dan tinggi nilainya. Modal semacam itu, yang tersimpan dalam karya-karya sastra daerah, akhirnya akan dapat juga menunjang kekayaan sastra Indonesia pada umumnya.

Pemeliharaan, pembinaan, dan penggalan sastra daerah jelas akan besar sekali bantuannya dalam usaha kita untuk membina kebudayaan nasional pada umumnya, dan pengarahan pendidikan pada khususnya.

Saling pengertian antardaerah, yang sangat besar artinya bagi pemeliharaan kerukunan hidup antarsuku dan agama, akan dapat tercipta pula, bila sastra-sastra daerah yang termuat dalam karya-karya sastra lama itu, diterjemahkan atau diungkapkan dalam bahasa Indonesia. Dalam taraf pembangunan bangsa dewasa ini manusia-manusia Indonesia sungguh memerlukan sekali warisan rohaniah yang terkandung dalam sastra-sastra daerah itu. Kita yakin bahwa segala sesuatunya yang dapat tergali dari dalamnya tidak hanya akan berguna bagi daerah yang bersangkutan saja, melainkan juga akan dapat bermanfaat bagi seluruh bangsa Indonesia, bahkan lebih dari itu, ia akan dapat menjelma menjadi sumbangan yang khas sifatnya bagi pengembangan sastra dunia.

Sejalan dan seiring dengan pertimbangan tersebut di atas, kami sajikan pada kesempatan ini suatu karya sastra daerah Aceh, dengan harapan semoga dapat menjadi pengisi dan pelengkap dalam usaha menciptakan minat baca dan apresiasi masyarakat kita terhadap karya sastra, yang masih dirasa sangat terbatas.

Jakarta, 1984

Proyek Penerbitan Buku Sastra  
Indonesia dan Daerah



## PENGANTAR

Naskah Hikayat Peureudan Ali ini kami peroleh dari Kolonel purnawirawan Ishak Pakeh ketika kami berkunjung ke rumahnya di Banda Aceh bulan Agustus 1983. Naskah bahasa Aceh huruf A Arab ini tebalnya 299 halaman. Dengan ukuran 29,5 x 21 cm, tiap halaman terdiri rata-rata 24 baris. Tulisannya masih terang meskipun sudah berusia setengah abad.

Tidak jelas siapa sebenarnya pengarang hikayat ini. Di bagian akhir dikatakan bahwa naskah kepunyaan orang Pakeh, penduduk kampung Teupin Jangak. Selain nama kampungnya Teupin Meusambong, nama pengarangnya sendiri tidak disebutkan. Selesai dikarang tanggal 26 Mei 1933 di Kutaraja (sekarang Banda Aceh). Namun Ishak Pakeh mengatakan bahwa Hikayat Peureudan Ali dikarang oleh ayahnya sendiri Teungku Pakeh yang namanya tercantum dalam naskah sebagai pemilik. Teungku Pakeh lama tinggal di Kutaraja sebagai pedagang dan penggemar hikayat.

Tidak jauh berbeda dengan hikayat-hikayat lainnya, hikayat ini pun menceritakan tentang kehidupan raja-raja zaman dahulu dengan berbagai kesaktian dan diselang seling dengan peperangan memperebutkan putri.

Meskipun pada permulaan hikayat disebut nama Ali Peureudan, selanjutnya sering juga disebut Peureudan Ali. Nampaknya pergantian nama ini disesuaikan dengan sanjak yang terdapat dalam suatu baris. Nama yang terakhir ini kami pilih sebagai judul hikayat.

Hikayat ini sudah kami alih aksarakan ke dalam huruf Latin berikut ringkasan ceritanya dalam bahasa Indonesia dan membayanya menjadi dua jilid. Bahan kajian kesusastraan daerah akan bertambah dengan diperbanyaknya hikayat ini.

Penyunting

**RINGKASAN CERITA**  
**HIKAYAT PEUREUDAN ALI**  
**Jilid I**

Sultan Yahya yang memerintah negeri Jarussalam sangat dicintai oleh rakyatnya. Sembilan buah kerajaan takluk di bawah kekuasaannya. Baginda mempunyai empat orang permaisuri. Dua di antara mereka anak dua orang menteri dan masing-masing bernama Rakna Keumala dan Geureudan Umami. Yang ketiga yaitu Rakna Diwi adalah anak seorang guru. Sedangkan Lelan Syikri, yang tercantik di antara mereka adalah anak seorang kadi. Setiap permaisuri mempunyai sebuah istana yang letaknya berjauhan satu sama lain. Dari Geureudan Umami baginda mendapat seorang putra bernama Ahmad Kasari. Dari permaisuri Lelan Syikri dua orang, satu putri bernama Juhur Seutia dan seorang putra bernama Peureudan Ali. Sedangkan dari kedua permaisuri yang lain baginda tidak mendapat keturunan. Rakna Keumala merasa iri hati terhadap Lelan Syikri karena baginda lebih sering berada di istananya.

Pada suatu hari Sultan Yahya memutuskan untuk mengangkat putranya Ahmad Kasari menggantikan baginda. Dengan disaksikan oleh rakyat dan para pembesar negeri Ahmad Kasari dinobatkan menjadi raja Jarussalam. Baginda sendiri beristirahat di istana Putri Lelan Syikri. Hal ini membuat Rakna Keumala makin tidak senang terhadap Lelan Syikri. Seorang dayang-dayang bernama Nyak Jeumpa dibujuk untuk meracuni Lelan Syikri. Begitulah pada suatu pagi Nyak Jeumpa menaruh racun ke dalam madu yang disediakan buat Lelan Syikri. Malang bukan tuan putri yang minum madu itu tetapi Sultan Yahya. Dengan seketika baginda meninggal. Seisi istana gaduh. Rakna Keumala amat menyesal atas perbuatannya yang keliru itu. Raja muda Ahmad Kasari menyalahkan Lelan Syikri atas kematian ayahnya karena baginda berada di tempat Lelan Syikri. Raja Muda hendak menjatuhkan hukuman mati terhadap Lelan Syikri. Ibunya Geureudan Umami dan Rakna Diwi serta ayah Lelan Syikri menasihati raja muda supaya menyelidiki lebih dahulu siapa sebenarnya yang

menghabiskan nyawa baginda. Namun raja muda tetap atas keputusannya dan Lelan Syikri dipenjarakan. Juhur Seutia dan Peureudan Ali bermohon kepada Ahmad Kasari supaya ibu mereka diampuni, tetapi tidak dihiraukan bahkan keduanya dimasukkan pula ke dalam penjara terpisah dari ibu mereka. Di tengah malam kedua kakak beradik itu dibebaskan oleh seorang dayang-dayang yang baik hati, serta dianjurkan meninggalkan istana. Sesudah berpamitan dengan ibu dan mendapat bekal sekadarnya mereka keluar dari istana tanpa tujuan.

Sesudah tujuh hari dalam perjalanan, mereka sampai di sebuah gua yang dihuni oleh seekor raja naga. Dari raja naga itu mereka mendapat dua benda sakti yaitu sebatang tongkat dan sebetuk cincin. Kemudian mereka melanjutkan perjalanan. Ketika mereka sedang menyeberangi sebuah sungai tiba-tiba banjir datang dan kedua kakak beradik itu hanyut. Putri Juhur Seutia yang terdampar di muara sungai diketemukan oleh seorang perempuan tua bernama Cutti Male. Ia dibawa pulang ke rumahnya dan dipelihara sebagai anaknya sendiri. Peureudan Ali dapat menyelamatkan diri. Dalam keadaan sedih memikirkan nasib kakaknya ia bertemu dengan seorang alim bernama Teungku Abdussu'ud. Orang alim itu membawa Peureudan Ali ke rumahnya dan di sana ia tinggal selama empat tahun. Berbagai ilmu dipelajarinya dari Teungku Abdussu'ud sampai ia meningkat remaja.

Tersebutlah sebuah negeri bernama Palistina yang diperintah oleh raja Adil Parisi. Raja ini mempunyai putri satu-satunya bernama Cut Arian. Permaisurinya bernama Syarifah Binti. Pada suatu hari ketika Cut Arian memetik bunga tangannya digigit kala jengking. Semua tabib dan nujum dipanggil untuk mengobati tangan putri, tetapi tidak seorang pun yang sanggup bahkan penyakitnya makin bertambah. Baginda mengumumkan ke segala pelosok negeri bahwa barang siapa yang dapat mengobati Cut Arian ia akan dinikahkan dengannya. Pengumuman itu sampai ke telinga Peureudan Ali. Berkat siraman air cincin sakti Cut Arian sembuh kembali seperti sedia kala. Alangkah senangnya baginda raja dan permaisuri. Pembesar negeri dipanggil. Permusyawaratan diadakan untuk menentukan saat pernikahan Peureudan



Ali dengan Cut Arian.

Pesta perkawinan Peureudan Ali dengan Cut Arian diadakan secara besar-besaran di istana kerajaan. Sejak itu Peureudan Ali tinggal di istana negeri Palistina. Tak lama sesudah menjadi suami putri, Peureudan Ali teringat akan kakaknya Juhur Seutia. Ia yakin akan dapat bertemu kembali dengan kakaknya. Ia minta izin kepada isterinya mencari kakaknya. Juga kepada Teungku Abdussu'ud ia mohon doa restu atas keberangkatannya. Tongkat dan cincin hikmat dibawanya serta.

Putri Juhur Seutia yang tinggal di rumah Cutti Male di Pusong Rawa, tiap hari dirundung malang memikirkan nasib adiknya. Dalam mimpi ia bertemu dengan seorang syiah yang mengatakan bahwa tak lama lagi ia akan bertemu dengan adiknya yang sedang mencarinya. Negeri Pusong Rawa diperintah oleh seorang menteri yang masih muda bernama Adan. Ia sangat dicintai rakyatnya karena bijak dalam memerintah, dan belum beristeri. Berita tentang seorang gadis tinggal bersama Cutti Male diketahui olehnya. Ia sendiri pergi menyaksikan gadis cantik itu. Keesokan harinya seorang perempuan tua bernama Macut Haji diutus ke rumah Cutti Male membawa pesan bahwa menteri ingin meminang Juhur Seutia. Cutti Male sangat senang mendengar keinginan menteri lalu menyampaikan kepada Juhur Seutia. Putri tidak menolak lamaran menteri, hanya ia belum bersedia menjadi isteri siapapun sebelum bertemu dengan adiknya Peureudan Ali. Ia minta supaya menteri turut mencari adiknya. Mendengar jawaban Juhur Seutia, Menteri segera memerintahkan empat puluh orang untuk mencari Peureudan Ali.

Tersebutlah sebuah negeri bernama Anta Ladeh. Rakyatnya masih menyembah berhala. Rajanya bernama Syarif. Ia tidak senang dengan Raja Adil Parisi yang menikahkan putrinya dengan orang yang tidak dikenal asal usulnya. Ia bermaksud merebut Cut Arian yang sudah menjadi isteri Peureudan Ali. Dipersiapkanlah angkatan perangnya yang besar untuk menyerang negeri Palistina jika putri Cut Arian tidak diserahkan kepadanya. Pada hari yang sudah ditentukan berangkatlah angkatan perang Anta Ladeh menuju Palistina. Di suatu tempat mereka berhenti. Seorang utus-

an dikirim menghadap Raja Adil Parisi dengan membawa surat yang isinya Raja Syarif minta supaya putri Cut Arian diserahkan kepadanya. Baginda Adil Parisi amat murka membaca surat tersebut seraya merobek-robeknya dan utusan yang membawanya diusir. Baginda memerintahkan seluruh rakyatnya bersiap-siap menghadapi musuh. Mendengar laporan pembawa surat. Raja Syarif sangat marah lalu dengan segera ia memerintahkan pasukannya untuk menyerang. Terjadilah pertempuran seru antara pasukan Palistina dan pasukan Anta Ladeh.

Ketika perang sedang berkecamuk di Palistina, Peureudan Ali yang sedang mencari kakaknya sudah berada di daerah Pusong Rawa. Di suatu tempat ia mendengar orang sedang membicarakan seorang gadis cantik di rumah Cutti Male bernama Juhur Seutia. Dengan segera ia mencari rumah tempat tinggal kakaknya itu. Sampai di sana Cutti Male terheran-heran melihat Juhur Seutia berpelukan dengan seorang pemuda yang tidak dikenalnya. Barulah sesudah diberitahukan ia mengerti bahwa pemuda itu adalah adik Juhur Seutia. Dengan segera pula ia pergi memberitahukan kedatangan adik putri kepada menteri Adan.

Utusan menteri datang lagi ke rumah Cutti Male membicarakan perihal lamaran menteri. Lamaran diterima baik oleh putri Juhur Seutia dan disetujui pula oleh Peureudan Ali. Upacara pernikahan diadakan. Pesta besar-besaran berlangsung selama tujuh hari tujuh malam. Sejak itu Juhur Seutia tinggal di istana Menteri Adan di negeri Pusong Rawa.

Empat puluh orang yang dikirim oleh menteri Adan untuk mencari Peureudan Ali telah kembali karena tidak berhasil menemukannya. Dua orang di antara mereka menceritakan tentang perang yang sedang terjadi di Palistina karena Raja Syarif dari Anta Ladeh hendak merebut Putri Cut Arian. Mendengar berita tersebut Peureudan Ali sangat marah. Dengan segera ia berangkat ke Palistina bersama menteri Adan dan sejumlah panglima perang.

Ketika perang sedang berkecamuk dan pasukan Raja Adil Parisi mulai terdesak, pasukan menteri Adan dan Peureudan Ali tiba. Serangan mereka yang tiba-tiba membuat pasukan Raja Syarif kucar kacir. Seorang menteri bernama Sakdi menyerah dan

menyatakan masuk agama Islam. Menteri Adan dan Peureudan Ali mendapat kehormatan besar dari Raja Adil Parisi karena mereka telah berhasil mengusir musuh.

Karena merasa dirinya sudah tua dan mengetahui bahwa Peureudan Ali seorang putra raja dari Jarussalam maka Raja Adil Parisi menyerahkan pimpinan kerajaan kepadanya. Di bawah pimpinannya negeri Palistina semakin makmur. Tidak ada rakyat yang menganggur. Hukum dan ajaran agama dijalankan sebagaimana mestinya. Pertahanan negeri diperkuat. Sejumlah orang dikirim ke negeri Anta Ladeh untuk mengamati tingkah laku Raja Syarif yang bermaksud merebut Cut Arian. Demikian pula ke Jarussalam, Peureudan Ali mengirim seorang perempuan tua untuk menyelidiki keadaan negeri yang sudah lama ditinggalkannya.

Keadaan negeri Jarussalam di bawah pimpinan Ahmad Kasari berada dalam keadaan kacau akibat ketidakmampuannya memerintah. Banyak rakyat meninggalkan negeri. Dari penyelidik yang dikirim ke Jarussalam, Peureudan Ali mendapat berita yang lengkap mengenai negerinya. Rahasia kematian ayahnya terungkap. Kepada mertua dan isterinya ia menyatakan maksudnya hendak pulang ke Jarussalam menengok ibunya. Kemudian ia berangkat ke Pusong Rawa bersama Menteri Sakdi yang baru memeluk agama Islam. Di sana ia memberitahukan maksudnya kepada kakaknya Juhur Seutia dan suaminya Menteri Adan.

Dengan disertai 500 orang yang terdiri dari laki-laki dan perempuan Peureudan Ali dan kakaknya bersama Menteri Adan berangkat menuju Jarussalam. Tiga bulan dalam perjalanan mereka sampai. Di suatu tempat mereka beristirahat. Dua orang utusan dikirim ke istana memberitahukan kedatangan sultan dari Pusong Rawa beserta rombongan. Raja Ahmad Kasari menghormati kedatangan Menteri Adan dan menyediakan istana Lelan Syikri sebagai tempat tinggal para tamu yang baru datang itu. Di tengah malam Peureudan Ali bersama Menteri Sakdi pergi ke istana Rakna Keumala. Permaisuri yang sedang tidur nyenyak diikat lalu dibawa keluar oleh menteri Sakdi dan digantung pada sebatang pohon. Kemudian Peureudan Ali pergi ke penjara. Sesudah pintunya di-



dobrak Lelan Syikri dibawa ke istananya. Suasana haru terjadi di tengah malam itu. Seorang ibu yang sudah lama terpisah bertemu kembali dengan kedua anaknya.

Keesokan harinya penduduk menyaksikan Rakna Keumala tergantung pada pohon kayu. Mengetahui hal itu raja Ahmad Kasari sangat marah, dan Rakna Keumala dibebaskan. Atas pertanyaan raja, Rakna Keumala mengatakan bahwa yang menyiksanya adalah salah seorang di antara tamu yang baru datang lalu ia menunjuk ke arah Peureudan Ali. Raja Ahmad Kasari minta pendapat Menteri Adan tindakan apa yang harus diambil terhadap orang yang telah berbuat noda itu. Menurut Menteri Adan orang yang telah berbuat demikian harus dihukum mati, tetapi penyelidikan harus diadakan terlebih dahulu sebelum hukuman dijatuhkan. Sebagai contoh menteri menceritakan suatu peristiwa yang menimpa seorang panglima perang. Sesudah kawin dengan seorang gadis, panglima tersebut pergi jauh meninggalkan isterinya dalam keadaan hamil. Ia baru pulang ketika anaknya sudah remaja. Ketika ia tiba di rumah dilihatnya isterinya sedang tidur bersama seorang lelaki. Tanpa pikir panjang isteri dan anak muda itu dibunuhnya. Kemudian ternyata pemuda yang dibunuhnya itu adalah anak kandungnya sendiri. Akibatnya ia menjadi seperti orang hilang ingatan karena perbuatannya yang terburu nafsu. Mendengar cerita itu Ahmad Kasari membenarkan pendapat menteri Adan. Ketika itu Peureudan ali membeberkan kejadian yang sebenarnya lengkap dengan bukti yang dimilikinya berupa sebotol sisa racun yang diperoleh dari Nyak Jeumpa. Terbongkarlah semua rahasia. Rakna Keumala dan Nyak Jeumpa dihukum. Ahmad Kasari minta maaf atas segala kesalahannya.

Keluarga istana almarhum Sultan Yahya damai kembali. Banyak anak negeri datang memberi penghormatan kepada Peureudan Ali dan Juhur Seutia yang baru pulang. Selama Peureudan Ali tinggal di Jarussalam rakyat yang sudah pergi, pulang kembali karena tertarik dengan Peureudan Ali yang pandai mengambil hati rakyat. Oleh karena melihat Peureudan Ali sangat dicintai oleh rakyat dan ia sendiri tidak sanggup memerintah maka Ahmad Kasari mendesak adiknya supaya bersedia memimpin negeri Jarus-

salam. Permintaan itu diterima oleh Peureudan Ali. Menteri Sakdi yang tidak pernah jauh dari Peureudan Ali dinikahkan dengan dayang-dayang yang telah berjasa membebaskan Peureudan Ali dan Juhur Seutia dari penjara. Tak lama kemudian Peureudan Ali bermaksud pulang ke negeri Palistina dan menunjuk abangnya sebagai wakilnya. Sebagai pelaksana pemerintahan sehari-hari ditunjuknya menteri Sakdi. Dengan diantar oleh 400 orang rakyat, Peureudan Ali dan kakaknya Juhur Seutia bersama menteri Adan berangkat menuju Palistina dengan melalui Pusong Rawa.

Adapun keseratus orang mata-mata yang dikirim oleh Peureudan Ali ke negeri Anta Ladeh telah menjalankan tugasnya dengan baik. Seorang di antara mereka bernama Teungku Cut Ben telah diangkat sebagai seorang menteri. Seorang lagi sebagai pesuruh yang bebas keluar masuk istana Raja Syarif.

Raja Syarif sedang mengadakan persiapan lagi hendak menyerang negeri Palistina. Ia ingin menebus kealahannya yang lalu. Menteri Cut Ben yang turut membuat rencana, segera mengirim surat kepada Peureudan Ali memberitahukan rencana Raja Syarif. Dimintanya supaya Peureudan Ali datang ke Anta Ladeh. Sebaik membaca surat itu ia segea memerintahkan rakyat supaya pertahanan negeri diperkuat. Parit-parit sekeliling kota sudah lama dipersiapkan lengkap dengan pancang-pancangnya. Pada saat pasukan Raja Syarif meninggalkan negerinya, Peureudan Ali menuju Anta Ladeh. Sebagai menteri yang mendapat tugas mengawal istana, Cut Ben tidak pergi ke Palistina. Setelah beberapa hari dalam perjalanan Peureudan Ali sampai di Anta Ladeh dan disambut oleh menteri Cut Ben. Tengah malam Peureudan Ali dibawa masuk ke istana tempat tinggal putri Hindia Licen. Putri dibangunkan. Ia terheran-heran melihat seorang pemuda masuk ke kamarnya. Ternyata kedua insan itu akhirnya saling jatuh cinta. Menjelang pagi keduanya keluar dari istana.

Hikayat  
PEUREUDAN ALI  
1



**HIKAYAT**  
**PEUREUDAN ALI**  
**Jiled keu sa**

Nama hikayat sinoe lon bayan  
Ali Peureudan nama meusyehu  
Nama isteri putroe analan  
Pocut Arian judo tuanku

**BISMILLAHIRRAHMANIRRAHIM**

Bismillahi phon mulaan  
Nama Tuhan zat nyang Esa  
Nama isem nyang beusaren  
Wajib tuan bak phon mula

Nyang keudua alhamdulillah  
Pujoe Allah Rabon 'Ala  
Bandum pujoe meuwoe keu Allah  
Nyang peurintah alam donya

Lahe baten saket mangat  
Dum buet kudrat Allah Ta'ala  
Langet bumoe laot darat  
Bandum leungkap neukaronya

Lheueh lon pujoe sidroe Tuhan  
Seulaweuet lheueh nyan keu Saidna  
Pujoe pi lheueh seulaweue sajan  
Lon leueung tangan jaroe dua

Lon lakee bak Tuhan sidroe  
Beusampoe barang lon cinta  
Nyang lon surat beusuleusoe  
Tuhan sidroe tulong hamba

Harah lapan beuek teupat  
Beumeuhad beumeuadoe a  
Beuek keunong buhu rajaz  
Beumangat watee geubaca

Meunan hai nyak nyang lon hajat  
Bak kudrat lon mohon pinta  
Adat teukeudi bak Hadarat  
Roh silap meutuka banja

Bek tacarot ngon taupat  
Hai sahbat bukon lon saja  
Kareuna lon goh lom cakap  
Goh lom 'ajab bak meurika

Ulon baro lon seumurat  
Patot silap lheueng-lheueng banja  
Nyangkeu lon kheun bek taupat  
Lon seumurat goh biasa

Bitpi meunan nyak meutuah  
Insya Allah lon usaha  
Meuna tulong nibak Allah  
Cit pantah bak lon meurika

Tulong Tuhan insya Allah  
Beucidah lon pakhok haba  
Lon meulakee malam uroe  
Tuhan sidroe kabui do'a

Meuna tulong Tuhan sidroe  
Baranggasoe troh ban pinta  
Proekeu sabab lon seuleuah  
Sabab cidah that calitra

Meunan lon ngo bak gop peugah  
Sahib kisah po calitra  
Haba lon teumeung di dalam surat  
Pakhok hikayat di dalam dada

Bak lon pike sang-sang 'ajab  
Nyankeu sabab lon usaha  
Soe nyang dengo jeuet keu ubat  
Teuingat silama masa

Haba 'ajab keunong lagee  
That teuntee nibak calitra  
Bak Tuhan do'a lon lakee  
Geunap watee meunoe do'a

Ya Ilahi wa ya Rabbi  
Po lon neubri ban lon pinta  
Neubri kuat jaroe gaki  
Beuta rali dum keurija

Amin amin ya Ilahi  
Ya rabbi takabui do'a  
Haba khuteubah 'oh noe teutap  
Bek panyang that glak tabaca

Jinoe lon boh tangga surat  
Mangat meupat had ngon hingga  
Uroe Hameh phon lon surat  
Lon tueng beureukat watee luha

Lom lon seubot nama buleuen  
Tango lon kheun thon Beulanda  
Uroe limong blah buleuen sikureueng  
Poh lapan jeuem ulon mula

Thon siribee sikureueng reutoh  
Lom meutamah lhee ploh dua  
Dalam thon nyan ma teungku beh  
Apah-apoh ureueng lam donya

Thon meuseuke peng ngon ringget  
That meusaket han pat mita  
Pade murah peng meusaket  
Meutamah sulet manusia

Dalam thon nyan aneuk meutuah  
Han peue peugah that seungsara  
Barang-barang bandum murah  
Meuh nyang mirah han soe gala

Han peue panyang le lon peugah  
Maklum sudah dum aneukda  
La ilaha illallah  
Nyang peurintah dum peukara

Muhammadur Rasulullah  
'Oh noe sudah saboh leua  
'Oh noe abeh nyang khuteubah  
Nyoe lon tamah laen mula

Rampak-rampak Lhok Seumawe  
Nyang that rame Peukan Cunda  
Ureueng meukat sidroe sane  
Keu nan jime dumpeue nyang na

Beuthat rayek Keude Idi  
Di Sigli nyang le Beulanda  
Kata dalang eumpunya rawi  
Tadeungo he dumteu rata

'Ajayeb subhanallah  
Nyoe lon kisah sidroe raja  
Teumpang nanggroe Jarussalam  
Di sinan teumpang neuraja

Teuseubot nan Yahya Sulotan  
Hana lawan dalam donya  
Rupapi got hana macam  
Tan teuladan umpamanya

Peurangui jroh hukom seunang  
That adelan hana tara  
Lagi hibat lom ngon gagah  
That barollah ngon areuta

That meusyehu raja meugah  
Keurajeuen luah hana tara  
Padum padum raja di baroh  
Lam geunggam beh poteu raja

Intat wase tunong baroh  
Dum keu nan troh jok keu raja  
Sikureueng raja taklok keu nan  
Bak junjongan raja raya

Meusyehu gah sigala alam  
Yahya Sulotan sit geuthee na  
Nyankeu raja nyang beusaran  
Geukheun meunan lam calitra

Nanggroe luah hana bagoe  
Peuet blah uroe pasang guda  
Banda rame makmu nanggroe  
Tuhan sidroe peurintah hamba

Di lon tuan tan kutukri  
Dalam rawi geucalitra  
Sidroe Tuhan nyang keutahwi  
Nyang tukri rugoe ngon laba

Poteu raja neumeukawen  
Putroe canden indah rupa  
Bandum putroe linteng-linteng  
Puteh lisen judo raja

Dua putroe aneuk meuntroe  
That sambinoe hana tara  
Rupa cidah hana bagoe  
Jeuep-jeuep nanggroe ton umpama

Aneuk Kadi nyang guree droe  
Dua putroe lom meuganda  
Jeuet jumeulah peuet droe putroe  
Nyan judo droe poteu raja

Peuet droe potroe tango lon kheun  
Sira bileueng lon kheun nama  
Aneuk meuntroe intan buleuen  
Nyang phon geukheun Rakna Keumala

Nyang sidroe truk Geureudan Umami  
Aneuk meuntri putroe nyan dua  
Rakna Keumala Geureudan Umami  
Dua abi dua bunda

Putroe nyang keulhee Rakna Diwi  
Aneuk Syekhi guree raja  
Teuma nyang keupeuet aneuk Kadi  
Lelan Syikri geuboh nama

Nyanpi meunan wahe adoe  
Dua ma droe dua bapa  
Dua kadi dau meuntroe  
Maseng aneuk droe judo raja

Raja peugot ngon meuligoe  
Indah han soe taeu rupa  
Peuet esteuri peuet meuligoe  
Maseng putroe maseng istana

Gaseh sabe banpeuet putroe  
Hana sidroe kureueng mulia  
Meuligoe jroh saban-saban  
Soe nyang pandang ngilu mata.

Tameh beusoe pucak intan  
Binteh tuan ceureumen kaca  
Lom geulabo deungon ie meuh  
Jeuh peungeuh jiplueng cahya

Geuturab ngon batee rukham  
Geunta pualam mutu ratna  
Batee yakot lom geupasang  
Lang-geumilang u antara

Teuka beureuhi napsu bimbang  
Soe nyang pandang ladat mata  
Nibak ate mayoh deundam  
Meunankeu sang nekmat teuka

Geuleueng ija peureumadani  
Sang beureuhi taeu rupa  
Geuboh tiree ngon lahuri  
Han takukri peucalitra

Peuet meuligoe saban-saban  
Leubehpi tan kareueng hana  
Haba meuligoe sepkeu dumnan  
Han ek tuan lon calitra

Nyoe lon peugah putroe intan  
Deungo teelan lon peuhaba  
Putroe phon judo sulotan  
Nyang geupeunan Rakna Keumala

Putroe male aneukjih tan  
Meunan Tuhan neubri jeumba  
Geureudan Umami aneuk meuntroe  
Nyankeu putroe neumoi dua

Di sinan na aneuk sidroe  
Ureueng lakoe ilok rupa  
Ahmad Kasari raja boh nan  
Teuseubot meunan lam calitra

Nyangkeu saboh aneuk sulotan  
Bak putroe nyan laen hana  
Teuma Putroe Rakna Diwi  
Nyanpi male aneuk hana

Putroe nyang keupeuet teuma lagi  
Sinan teujali Tuhan peunyata  
Nyang geuboh nan Lelan Syikri  
Aneuk Tuhan bri sinan dua

Lelan Syikri Putroe nyang tulet  
That leubeh got nibak nyang tuha  
Gaseh raja leubeh bacut  
Gaseh dalam pruet hana that nyata



Leubeh rupa leubeh neugaseh  
Hana meuceh teutap lama dada  
Bak gop kalon saban gaseh  
Raja areh panyang bicara

Lelan Syikri aneuk dua droe  
Deungo jinoe lon kheun nama  
Aneuk tuha putroe sambinoe  
Rupa bagoe buleuen purnama

Juhur Seutia raja boh nan  
Aneuk junjongan putroe jroh rupa  
Kulet puteh lang-geumilang  
Sang lakuan asoe syeuruga

Umu baro muda seudang  
Siploh thon sang kira-kira  
Aneuk tulet ureueng lakoe  
Adoe Putroe Juhur Seutia

Baro tujuh thon umu sampoe  
Goh lom ragoe tupeue basa  
Bak meutoto tilo alang  
Soe deungoran galak raya

Geurasi nan Ali Peureudan  
That bijakan bak ri rupa  
Silawet na Peureudan Ali  
Raja doli leubeh that suka

Mayoh deundam hana sakri  
That beureuhi napsu ngon hawa  
Peue jilakee rijang neubri  
Hana lanti tanggoh lusa

Lelan Syikri majih putroe  
Hana bagoe leubeh suka  
Poteu raja sinan laoe  
Malam uroe lam istana

Putroe laen jareueng neuwoe  
Sinan laloe bak aneukda  
Lelan Syikri leubeh cidah  
Leubeh indah nibak nyang na

Poteu raja sinan dahsyah  
Tan neusinggah laen nisa  
Ho siuroe gaseh meutamah  
Deelat syah meutamah suka

Hana jarak meusilangkah  
Raja dahsyah lam istana  
Rindu deundam hana bagoe  
Tan siuroe cre di tangga

Meunan sabe geunap uroe  
Han tom neuwoe laen nisa  
Teutap sinan raja laloe  
Sajan putroe ngon aneukda

Jinoe lon kheun narit singkat  
Deungo sahbat dumteu rata  
Soe nyang dungo jeuet keu ubat  
Nyang na ingat puphom makna

Amma bakdu phon meundapat  
Teudeuk siat hamba raja  
Teukeudi Allah peurintah Hadarat  
Raja ka rab na peukara

Teudeuk 'oh nan raja doli  
Jinoe esteuri lon calitra  
Rakna Keumala jinoe lon kehun kri  
Judo doli putroe peurtama

Ate sosah tuan putroe  
Malam uroe kira-kira  
Jiduek jidong ate seungkoe  
Hana padoe suntok masa

Sabab raja han tom neuwoe  
Nyankeu putroe rusak dada  
Bu jipajoh miseue duroe  
Pruet han tom droe sabab rugha

Sosah ate cut putroe beh  
Bu jipajoh tan meurasa  
Pike teusyawe hana teudoh  
Meuh seuneupoh kira-mira

Balek batang hana padoe  
Bak siuroe pike teubuka  
Meunoe pike si nyak putroe  
Bahle jinoe kubicara

Kurahsia namiet sidroe  
Kuyue jak bloe racon tuba  
Bahle kaman racon kubri  
Lelan Syikri mangat fana

Meuka mate Lelan Syikri  
Puleh ate ulon hamba  
Meukon meunan han meusampe  
Kee lam sabe jamong rugha

Tuan putroe meunan pike  
Jimeuhei le nyan si Kamba  
Hai ulon jroh kadeungo nyoe  
Kukheun jinoe sikrak haba

Meunyo troh ban hajat lon nyoe  
Kah sidroe leupah meurdeka  
Kubri upah siploh katoe  
Kubri nanggroe kah kuasa

Kupeujeuet kah banta seudang  
Trengsajan rakan dumna  
Kubri judo nyang analan  
Ka leupasan dum peukara

Hajat ulon meunyo ek troh  
Jinoe kuboh siribee dina  
Akan teutapi hai ulon beh  
Beugot katroh di dalam dada

Bek jithee le barangasoe  
Uleh sidroe manusia  
Meunan jikheun tuan putroe  
Laba rugoe jipeurasa

Seuot namiet meunoe jikheun  
He buleuen intan peurmata  
Peue nyang napsu putroe neukheun  
Lon ngo hireuen bak ri rupa

Kajak mita keu lon jinoe  
Kajak bloe racon ngon tuba  
Beurijang le nyan kapeuwoe  
Bek thee sidroe manusia

Putroe peugah awai akhe  
Sajan jijok le siribee dina  
Yoh nyan namiet mangat ate  
Jibeudoh le jak peucara

Namiet yoh nyan jibeurangkat  
Jak mita pat racon tuba  
Jeuep-jeuep gampong sidek sasat  
Deungon siat meuteumeung ka

Sare meuteumeung laju jiwoe  
Jok keu Putroe Rakna Keumala  
'Oh troh racon ka u jaroe  
Baro putroe teuploh muka

Tuan putroe mangat ate  
Bak jipike troh ban pinta  
Bak jisangka ka meusampe  
Putroe hei le sidroe nisa

Yoh nyan putroe hei dendayang  
Mari intan keu noe gata  
Si Nyak Jeumpa teuseubot nan  
Panyang seunuban tipee daya

Troh le jijak keu nani datang  
Marit nyoeban Rakna Keumala  
Wahe cutda po da payong  
Tangieng keu lon siblah mata

Gaseh sayang cutda keu lon  
Beutatulong akan adekda  
Akan proe hai ulon sosah  
Maklum sudah ubak gata

Teuma jinoo da meutuah  
Taseuleuah siat le gata  
Si Nyak Jeumpa seuot meunoe  
Bek hai putroe ate duka

Pakri hajat peugah jinoo  
Bah buet lon nyoe jak peucara  
Tuan putroe teuma kheun kri  
Tadeungo he cutda Jeumpa

U meuligoe Lelan Syikri  
Tapeureugi jinoo gata  
'Oh troh keu deh gata ili  
Tamita kri tipee daya

Mita jalan rot tataki  
Lelan Syikri tabri tuba  
Meukon meunan han meusampe  
Raja han le woe bak hamba

Putroe peugah awai akhe  
Jiseuot le Si Nyak Jeumpa  
Peucit sosah tuan putroe  
Bah buet lon nyoe jak peucara

Meukon buet lon laen han soe  
Cut Lelan nyoe kupeufana  
Si Nyak Jeumpa jijak sidroe  
Troh le sampoe u leuen istana

Lelan Syikri di meuligoe  
Ngon aneuk droe boh ate ma  
Si nyak putroe ngieng u bumoe  
Leumah sidroe po da Jeumpa

Si Nyak Jeumpa teudong di leuen  
Meunoe jikheun Putroe Lela  
Taek keu noe hai da buleuen  
Jameun-jameun siblet teuka

Po da Jeumpa jimat rinyeun  
Jiek mameung u istana  
Sira jiek meunoe jikheun  
Hai cut meugleueng nyang jroh rupa

Beuthat beutrep siblet keu noe  
Kon hai putroe na lon lupa  
Rumoh jeh deungon rumoh nyoe  
Nibak lon nyoe hana dua

Sira seumbah tuan putroe  
Gon han bagoe jipeumeulia  
Sujud seumbah troh bak kaki  
Horeumat jibri got han tara

Lheueh jiseumbah putroe ahli  
Kunjong jibri akan aneukda  
Aneuk dua seudang-seudang  
Saboh agam saboh dara

Putroe Seutia rupa sang intan  
Cut Lelan nyan aneuk tuha  
Hana lom kong jiruet pinggang  
Mantong seudang goh lom raya

Nyang tulet Ali Peureudan  
Adoe intan Putroe Seutia  
Mantong tuto tilo alang  
Goh lom trang bak peugah haba

Po banta cut jiugon-ugon  
Jicok jicom ngon jiwa-wa  
Sira jikheun le meunoe phon  
Hai cut ampon beurijang raya

Han jitukri timang-timang  
'Oh taeu sang galak raya  
Nibak lahe meunan macam  
Panyang seunuban Si Nyak Jeumpa

Dalam baten meudeh pike  
Mangat ase tipee daya  
Jibloe gaseh aneuk sihe  
Nibak lahe cidah raya

Lelan Syikri ate seunang  
'Oh jieu sang jeuet keu suka  
Teuka beureuhi napsu bimbang  
Jipandang bak buet Si Jeumpa

Kakeu sinan aneuk bisoe  
Sajan putroe lam istana  
Poteu rajapi ka neuwœ  
U meuligoe neuk lanja

'Oh troh neuk u meuligoe  
Beudoh putroe seumbah raja  
Si Nyak Jeumpa han peue pike  
Jibeudoh le pantah sigra

Nibak gaki jijak com le  
'Ajab ate puteu raja  
Yoh nyan raja tanyong meunoe  
Peuebuet keu noe kah hai Jeunpa



Peue jisuroh nibak putroe  
Kah uroe nyoe keu noe teuka  
Si Nyak Jeumpa seuot pantah  
He deelat syah ampon hamba

Lon jak keudroe he khalifah  
Hana titah Rakna Keumala  
Lon jak kunjong raja putroe  
Sabab keu noe troh lon teuka

Kadang mate ajai sampoe  
Ulonteu nyoe tinggai donya  
Raja keu deh han tom neuwoe  
Sayang lon nyoe apon asa

Nyankeu sabab keu noe datang  
Lon jak pandang poteu raja  
Sabab ka trep tan lon pandang  
Kadang-kadang na seungsara

Meunan narit aneuk jalang  
Hireuen mandang poteu raja  
Poteu raja ka neuiem droe  
Hana sapeue le suara

Si Nyak Jeumpa teutap jinoe  
Lam meuligoe jarak hana  
Hana jiweh sajan putroe  
Malam uroe jipeumulia

Khadam raja deungon putroe  
Aneuk bisoe som rahsia  
Adat putroe hei dendayang  
Awai datang le Si Jeumpa

Jak tanyong peue neusurohan  
Bah lon tuan jak keurija  
Meunan sabe baranggajan  
Sibagoe nyan rok-rok masa

Jitueng ate tuan putroe  
Aneuk bisoe le bicara  
'Oh abeh buet dum seuleugose  
Hadap putroe deungon raja

Ceupet urot hana khali  
Peutang pagi beungoh sinja  
Mangat ate Lelan Syikri  
Apa lagi puteu raja

Aneuk raja Peureudan Ali  
Lam jime-me suntok masa  
Lam jicom-com hana sakri  
Han jitukri peumulia

Uroe malam meunan sabe  
'Ajab kon le Si Nyak Jeumpa  
Poteu raja rindu ate  
Lelan Syikri leubeh ganda

Si Nyak Jeumpa lam meuligoe  
Sajan putroe jarak hana  
Sinan teutap malam uroe  
Teuduek 'oh noe siat haba

Teuduek haba haram jadah  
Balek harah laen bagoe  
Ija puteh cop kupiah  
Beuneung mirah sok keu reumboe

Amma bakdu nyoe nyang cidah  
Ngo lon kisah raja nanggroe  
Yahya Sulotan jinoo lon peugah  
Teukeudi Allah bak siuroe

Poteu raja leumah pike  
Dalam ate kira meunoe  
Ulontue nyoe teuntee mate  
Di akhe ajai'oh sampoe

La ilaha ilallah  
Poteu Allah tinggai sidroe  
Laen 'oh troh ajai sudah  
Han neukeubah dum alam nyoe

Nyang na tinggai sidroe Tuhan  
Laen bak nyan mate dudoe  
Ladom akhe ladom rijang  
Ladom malam ladom uroe

Pajan saleh di lon tuan  
Han lon tujan ajai sampoe  
Meunan pike raja sulotan  
Neuhei bujang teuma sidroe

Troh le keuman teuka bujang  
Marit nyoeban raja nanggroe  
Takrah rakyat dum sibirang  
Beutroh rijang keu noe sampoe

Tandi waki uleebalang  
Bentara blang imum nanggroe  
Dum peutua panglima perang  
Beusajan rakyat sinaroe

'Oh lheueh suroh nibak raja  
Bujang lanja jak lama nanggroe  
Jipeh mongmong jiseuranta  
Suroh raja jihareutoe

Jikheun bek trep pantah-pantah  
Meunoe jipeugah jeuep-jeuep sagoe  
Jitren rakyat subhanallah  
Han peue peugah ureueng nanggroe

Tunong Baroh Timu Barat  
Meusapat bak raja nanggroe  
Troh lam kuta dumna rakyat  
Jiangkat dua blah jaroe

Ampon kamoe tuanku beh  
Jaroe siploh neungieng keu noe  
Bandum kamoe ka abeh troh  
U yup kawoh tuanku droe

Peue tuanku buet neusuroh  
Neukheun beutroh lon deungo proe  
Siri nanggroe hajat neuprang  
Uleebalang dum ka keu noe

Siri ulee nyang kreueh ceukang  
Pat han datang adat keu noe  
Siri laot nyang tan wase  
Toh siri gle nyang na paloe

Toh siri prang nyang meuseuke  
Nyang neupangge duman kamoe  
Teuma seuot raja deelat  
Hana sapat na meupaloe

Tan laot darat meuseugang  
Dum jiantat wase keu noe  
Nyang lon pangge dumna gata  
Lon ka tuha umu sampoe

Kadang pajan ajai teuka  
Boh le gata nyan geulanteo  
Taboh badai mat neuraca  
Nyan aneukda boh ate droe

Boh Raja Ahmad Kasari  
Dan lagi umu ka sampoe  
Meunan neukheun raja doli  
Seuot wadi deungon meuntroe

Ampon tuanku ban peurintah  
Junjong titah dumna kamoe  
Meupakat meuntroe deungon syiah  
Banta indah boh geulantoe

Geuboh raja banta seudang  
Tet meuriam kiam bunyoe  
Geutet beude geumpa alam  
Sirasa lham kuta nanggroe

Buet peurasan han lon peugah  
Panyang kisah malah kamoe  
Watee meunan han peue kisah  
Hana ubah miseue jinoe

Dum syeedara maklum sudah  
Hana payah lon kheun sinoe  
La Ilaha illallah  
Nyang peurintah langet bumoe

Geusie keubeue geukhanduri  
Alem faki galak han soe  
Geuboh Raja Ahmad Kasari  
Geuhei sare kiam bunyoe

Meusu geundrang geutet beude  
Nyum-nyum reule kuta nanggroe  
Nama nanggroe Jarussalam  
Sang meuguncang langet bumoe

Ka geupeuek banta seudang  
Ateuh intan batee ujoe  
'Oh lheueh tabai po cut banta  
Poteu raja neuk dudoe

Ateuh batee nyang peurmata  
Sajan banta boh ate droe  
Neubri bi'at keu aneukda  
Meusempeuna pulang nanggroe

Neupeurunoe dum peukara  
Bijeh mata deungo lon nyoe  
Jinoe aneuk gata raja  
Waseit bapa beutapakoe

Baranggajan bek talupa  
Suntok masa lon leueng jaroe  
Kareuna lon ureueng tuha  
Pajan masa saleh lon woe

Pajan saleh ajai teuka  
Han troh juga baranggasoe  
Adat mate ulon tuan  
Tinggai intan peukong nanggroe

Beugot aneuk nanggroe tatimang  
Hukom seunang beutapakoe  
Beutapeubuet suroh Tuhan  
Beutimang hukum barangsoe

Cutmateu lhee bunda sajan  
Beusaban tahiho siboe  
Bek bri saket ate bunda  
Sireuta banlhee droe putroe

Beutapateh wasiet bapa  
Bek lupa malam ngon uroe  
Meutan takzim ayah bunda  
Meureuka ngon Tuhan sidroe

Bek meupake ngon syeedara  
Bek tom dawa deungon adoe  
Peureudan Ali Juhur Seutia  
Adoeteu dua gata sidroe

Beuta gaseh rok-rok masa  
Jeuep kutika malam uroe  
Tapeurunoë tapeulara  
Bandua tahiho pakoe

Aneuk nanggroe beutagaseh  
Bek peujayeh baranggasoe  
Bahle kawom bahle wareh  
Bek tapeujayeh aneuk nanggroe

Bek tapandang teubai lipeh  
Beutagaseh dum sinaroe  
Beutapateh lon peuneusan  
Gata intan lon peurunoe

Bek jeuet gata beunci reusam  
Han got tuan nibak budoe  
Meunyo salah bak atoran  
Han soe sayang bube bajoe

Beuthat gata aneuk sulotan  
Tinggai sinan di gop geuwoe  
Siblah mata han jipandang  
Meunyo sit tan bayek budoe

Pihak gata aneuk raja  
Di nap mata that jipujoe  
Di nap gata gaseh teuka  
Di likot gata laen bagoe

Meunyo gata jitakot that  
Han jipeurab rakan sinaroe  
Nanggroe laen jibeurangkat  
Bah meulata gata sidroe

Nyankeu aneuk ingat beuthat  
Meunyo silap teulah 'oh dudoe  
Meuka abeh jiplueng rakyat  
Soe lom deelat gata sidroe

Peukeu sabab lon kheun meunan  
Sabab tuan han got budoe  
Meunyo napsu bek roh meunan  
Beugot rakan dum tasiboe

Meunyo gata that budiman  
Meusidroe han jiboh nanggroe  
Ho nyang tajak ireng sajan  
Sikeujap han jifiek sidroe



Meunyo cidah bak jipandang  
Bandum rakan cit sajan droe  
Hana jiweh uroe malam  
Dumna insan galak han soe

Nyangkeu aneuk ka lon peugah  
Aneuk lidah beutapakoe  
Wasiet ulon bek taubah  
Beutakeubah lam ate droe

Meutapateh aneuk meutuah  
Sabe dahsyah lon leueng jaroe  
La ilaha illallah  
'Oh noe sudah haba peurunoe

Abeh wasiet poteu raja  
Keu aneukda boh ate droe  
Geufatihah lakee do'a  
Dum ulama geuleueng jaroe

Lheueh khanduri beudoh gisa  
Maseng tangga u gampong droe  
Poteu rajapi neugisa  
U istana laju neuwoe

Teuduek haba poteu raja  
Lon peugisa namiet putroe  
Amma bakdu 'ajab raya  
That ceulaka aneuk bisoe

Nyoe lon peugak Si Nyak Jeumpa  
Hana gisa u gampong droe  
Mantong jiduek si ceulaka  
Lam istana sajan putroe

Mita jalan aneuk sihe  
Goh lom ase hajat sampoe  
Barangpeuc buet siat ase  
Jitueng ate tuan putroe

Uroe malam pike syawe  
Utoh kon le bak jisiboe  
Bak pihak jeuet jitueng ate  
Gaseh kon le tuan putroe

Ho siuroe gaseh meutamah  
Putroe indah galak han soe  
Si Nyak Jeumpa haram jadah  
'Ajab leupah utoh siboe

Putroe gaseh nibak nyang ka  
Leubeh nyoe ka nibak baroe  
Bak pihak got jibicara  
Harap simata uleh putroe

Putroe harap si ceulaka  
Hana tara malam uroe  
Bukon utoh Si Nyak Jeumpa  
Balek mata bit that ragoe

Uroe malam jimeujaga  
Jibicara maudeh meunoe  
Padum lawet jiusaha  
Jinoe rab ka hajat sampoe

Lawet lawan saboh masa  
Reudok teuka bak siuroe  
Grak teukeudi Tuhan Esa  
Poteu raja ka rab paloe

Bak uroe nyan teuka reudaok  
Seubak-seubok kiroh tuloe  
Ujeuen raya meugeureutok  
Sang-sang teulet rumoh meuligoe

Ngon geulanteue that klam-kabot  
Teuka seupot hitam nanggroe  
Angenpi kreueh bade ribot  
That teukeujot dum sinaroe

Asoe meuligoe that teumakot  
Maseng jilop bak teumpat droe  
Dum dendayang dara-dara  
Plueng lam kama jijak som droe

Bak masa nyan poteu raja  
Di istana deungon peutroe  
Eh seumayam sapat dua  
Teungeut indra lam meuligoe

Bak watee nyan Si Nyak Jeumpa  
Jeuep-jeuep kama ka jipeutoe  
Jijak eu dendayang dumna  
Teungeut indra maseng sagoe

Si Nyak Jeumpa ate mangat  
Jiek leugat u meuligoe  
Ubak tilam le jipeurab  
Buka sahab idang putroe

Sit ka ase dum peukara  
Racon tuba sit bak jaroe  
Dalam idang sianika  
Meuh suasa cawan putroe

Dum makanan indah-indah  
Han peue peugah ladat han soe  
Ka jiboh le racon pantah  
Lam juadah ie rabin nyoe

'Oh lheueh jiboh racon keu nan  
Jitop idang lagee puroe  
Sare ase sileungkapan  
Jitren rijang aneuk bisoe

Po Jeumpa tren laju keu deh  
Jijak eh dalam kama droe  
Tarek limot tujuh lapeh  
Aneuk paleh peuteungeut droe

Mangat ate hana tara  
That ceulaka aneuk bisoe  
Nyankeu dum buet aneuk beulaga  
Jitem tuba pojih sidroe

Nyangsa di gop geupeulara  
Di jih hana ingat budoe  
Han jiingat nyan keu guna  
Biek beulaga paleh han soe

Nyangkeu ureueng bangsa kureueng  
Aneuk bajeueng biek geupeubloe  
Nyankeu bangsa biek jen uteuen  
Tan meuteumeung laen nanggroe

Adat sideh Kamariah  
Tan lon kisah lam surat nyoe  
Nyang jibloe uleh Habeusyah  
Jijok sah keu bungong jaroe

Dum jitem poh aneuk mirah  
Wahsyon Falah boh ate droe  
Hana panyang ulon peugah  
Maklum sudah dum geutanyoe

Lam surat nyoe Si Nyak Jeumpa  
That ceulaka namiet putroe  
Ureueng laen meunan hana  
Paleh raja aneuk bisoe

Han ek le lon peugah haba  
Si Nyak Jeumpa teutap 'oh noe  
Amma bakdu teungku badan  
Laen syahdan nyoe lon aju

Teuduek haba aneuk jalang  
Lon peuriwang aneuk teungku  
Puteh-puteh bungong geutoe  
Bungong panjoe buju-buju

Nyoe lon peugah bungong uroe  
Lam meuligoe panyot lampu  
Putroe teungeut di meuligoe  
Sajan lakoe eh beuradu

Nakeu watee leuho uroe  
Jaga putroe beudoh meupru  
Jaga sajan raja nanggroe  
Beudoh putroe lop keuleumbu

Putroe beudoh pantah rijang  
Bak idang jipeurab laju  
Poteu raja duek bak tilam  
Buka idang po cut meulu

'Oh sare lheueh buka idang  
Sulotan neumakeuen laju  
Abeh neujeb saboh cawan  
Junjongan minom ie madu

'Oh lheueh minom di sulotan  
Dalam pruet sang ka jimeusu  
Dalam ulee tuka mumang  
Geulunyueng sang ka meu'u-u

Raja tanyong le bak putroe  
Pakon meunoe judo teungku  
Nyang ka dilee han tom meunoe  
Makanan nyoe peuebu laku

Teuma seuot tuan putroe  
Tuanku droe bak ri laku  
Sabab neueh lama uroe  
Geutanyoe trep that beuradu

Kadang meunan tuanku droe  
Laen bagoe nyum sigeutu  
Meunan neukheun tuan putroe  
Raja nanggroe han gct laku

Poteu raja reubah keudroe  
Tuan putroe tajo meupru  
Jidrop raja jimueng ulee  
Jipangkee le aneuk teungku

Si nyak putroe moe meuree-ree  
Hai pangulee peuebu laku  
Jieu raja idong keumee  
Meutamah lhee hana le su

Si nyak putroe nyang ka padee  
Ho kujak kee wahe teungku  
Poteu raja laju layee  
Lam peunangkee abeh umu

Ka mate raja sulotan  
Neukheun han jan Allah hai ku  
Ka troh janji nibak Tuhan  
Ulon paban he tuanku

Si nyak putroe jimoe riah  
Allah hai beh sayang taeu  
Putroe poh droe ma teungku beh  
Sare riah bunyoe 'a' u

Ka teukeujot dum dendayang  
Jiplueng keu nan bandum pra-pru  
Si Nyak Jeumpapi plueng sajan  
'Oh troh keu nan peugot laku

Jipoh-poh droe sali 'ala  
Si ceulaka biek jen hantu  
Han jitukri tumbok dada  
Supi raya moe meu' u' u

Hana ureueng dum Si Jeumpa  
Sulet raya tukang tipu  
Jipeuleumah gaseh sayang  
Biek jen hutan bangsa hantu

Jiploh ngon ok teugeureubang  
Han jituban peugot laku  
Dendayang dum han peue peugah  
Taeu joh-jah ie mata ro

Jisumpom droe reuboh-reubah  
Supi cidah jimoe bae  
Wahe teungku uleebalang  
Han lon tujan abeh umu

Keupeue kamoe lom dendayang  
Soe lon khadam 'oh tan teungku  
Bukon sayang po buleuen trang  
Lam awan han deuh le lon eu

Hana lon thee uleebalang  
Woe bak Tuhan Rabbon :Ghafu  
Allah Allah untong badan  
Ampon laman han le lon eu

That jipoh droe han reunggang  
Dendayang namiet tuanku  
Lelan Syikri saboh bagoe  
Bok-bang keudroe sajan teungku

Jimoe bae nyan keu lakoe  
He judo droe pakri laku  
Ahmad Kasaripi ka sampoe  
Jingo bunyoe hana le du

Ka meusapat u meuligoe  
Laen putroepi troh laju  
Troh le wadi deungon meuntroe  
Bak sagoe jipeurab laju

Jicok gong jiseupot le  
Tanggoe u gle jideungo su  
Jitren rakyat dum sigala be  
Raja mate ka meusyehu

Abeh jitren agam inong  
Han peue tanyong uroe Rabu  
Timu Barat Baroh Tunong  
Dum jitamong bak tuanku

Abeh jitren dum sigala don  
Meusinthong lam kuta batu  
Bandum ureueng ka meuhimpon  
Jak kunjong mayet tuanku

Lam meuligoe kakah-kacoh  
Nyang that kiroh rumoh leupu  
Putroe lhee droe ka keu nan troh  
Meuh seuneupoh sabe madu

Bandum putroe jimoe bae  
Tadeungo sye mangat that su  
Ladom bae ladom meppho  
He teungku e deelat tuanku

Jitumbok droe dara baro  
Han le judo ka tan teungku  
Meunoe bangon putroe bae  
Bah lon ato meusigeutu

Bukon sayang bintang kala  
Reudok teuka hana le hu  
Wahe judo po meukuta  
Ka neubungka han jan lon eu

Allah hai teungku po samlakoe  
Pakon meunoe hana le su  
Hana saket meusiuroe  
Pane keu noe teuka hantu

Bukon sayang bintang tanjong  
Neutinggai lonneujak teungku  
Meuka tan le tuanku ampon  
Soe lam di lon neujak teungku



Putroe bae maseng-maseng  
Jimoe maken kiroh laju  
Ngon ie mata dum meuleng-leng  
Puteh lichen sayang taeu

Rakna Diwi moe meu'-i  
Geureudan Umami moe meu'-u  
Nyang that sayang Lelan Syikri  
Han jitukri meuhei teungku

Sabab jingieng aneuk dua  
Junur Seutia jimeuhei du  
Ali Peureudan meuhei bapa  
He abuya peuebu laku

Jingieng aneuk saboh bagoe  
Jingieng lakoepe ka teudu  
Bukon sayang si nyak putroe  
That jipoh droe aneuk teungku

Sinan jiduek sajan lakoe  
Meunoe bagoe putroe meusu  
Wahe judo raja nanggroe  
Ka neuwoe bak Rabbon Ghafu

Tinggai ulon lam meuligoe  
Po samlakoe neujak laju  
Wahe aneuk Ali Peureudan  
Hanalle wang soe peulaku

Allah Allah aneuk badan  
Ulon paban bri Tuhanku  
Ka troh janji nibak Tuhan  
Sulotan kasampoe umu

Wahe aneuk bijeh mata  
Soe peulara aneuk teungku  
Meunyo tan le poteu raja  
Lon ngon gata saleh soe eu

Allah Allah wahe Tuhah  
Tatueng sajan lon ngon teungku  
Deungon aneuk lon beusajan  
Bek meulang-lang hana soe eu

Meunan sabe si nyak putroe  
Hana padoe meuhei teungku  
Bandum putroe moe keu lakoe  
Lam meuligoe got that karu

Rakna Keumala nyang that sosah  
Sabab salah buet meutipu  
Dalam atejih that teulah  
Haram jadah tuba madu

Jiyue tuba Lelan Syikri  
Roh suami abeh umu  
Ka roh mate raja doli  
Meunan teukeudi bak Tuhanku

Raja mate putroe tinggai  
Goh lam ajai bungong meulu  
Nibak Tuhan goh lam ajai  
Panekeu hai ek tatipu

Rakna Keumala nyang that poh droe  
Mate lakoe han jeuet jieu  
Sabab salah that buet jaroe  
Nyangkeu putroe leubeh tunu

Sira bae balek ayat  
Su mangat that Putroe Keumala  
Rakna Keumala mukajih pucat  
Meuhei deelat wahe raja

Wahe judo teungku abang  
Bukan sayang lon eu gata  
Miscue bintang dalam awan  
Reudok datang gadoh cahya

Hana meujan deuh lon pandang  
Gaduh hilang cre di mata  
Bukon sayang lon kalon layang  
Teureubang buet bade raya

Wahe teungku ulon paban  
Bak Tuhan ka 'oh noe kada  
Bak Tuhan ka 'oh noe janji  
Ka teukeudi ateueh hamba

Bokon sayang bungong sirunoe  
Putoh taloe ro u lua  
Bukon paleh badan lon nyoe  
Mate lakoe tan kareuna

Bukon sayang bungong pade  
Sit lam sabe angen timpa  
Gata ngon lon Tuhan peucré  
Han meusampe lon usaha

Putroe bae haba mise  
Peupueh ate lam istana  
Han jeuet jieu raja mate  
Teulah kon le Putroe Keumala

Haba bae le that bagoe  
Han ek kamoé pakhok haba  
Bahle lon kheun haba nyang toe  
Geuseumanoe poteu raja

Lheueh seumanoe boh lam gafan  
Peulop rijang lam keureunda  
Sireuta ngon geuseumbahyang  
Ase keu nan dum ulama

Lheueh seumbahyang bri seudeukah  
Teungku Syiah neutheun ija  
Mayet raja geucok pantah  
Putroe sosah mat keureunda

Yoh masa nyan bandum putroe  
Jisumpom droe ateueh keureunda  
Putroe bae ngon tumbok droe  
Maklum adoe dumna gata

Haba bae teuduek 'oh noe  
Lon kheun jinoe mayat raja  
Putren mayet troh 'oh pinto  
Ureueng that le yup keureunda

Nyang theun ulee ladom baho  
Hai teungku e han ek kira  
Peng ngon ringget han ek pike  
Keu breueh pade poteu raja

Peuet ploh guni keu nan ase  
Geuseupreuek le ateueh keureunda  
Lheueh nibak nyan me u jeurat  
Ireng rakyat bansineuna

'Oh troh keu deh tanom leugat  
Malem meusapat lakee do'a  
Lheueh geuseubee beuet teuleukin  
Geuleueng amin rakyat dumna

Nyang beuet do'a Teungku Luddin  
That salihin guree raja  
Nyangkeu ayah Lelan Syikri  
Putroe ahli nyang got rupa

Sajan do'a seudeukah geubri  
Dumna faki uroe raya  
Lheueh geutanom raja doli  
Woe keumbali maseng tangga

Leupah rakyat woe keumbali  
Tinggai doli teumpang seulinya  
Raja mate ka lam jeurat  
Saleh nekmat saleh syeksa

Saleh saket saleh mangat  
'Oh nan teutap haba raja  
La ilaha illallah  
Nyang peurintah ateueh hamba

Muhammadur Rasulullah  
Gaseh Allah soe nyang baca  
Amma bakdu ploh siat  
Lon jak teebat watee 'asa

Lheueh seumbahyang lom lon surat  
Meuna kudrat tulong hamba  
Bah lon ploh jinoe siat  
Meugadoh prat bulee mata

Lagi jaroe lon keurawat  
Hana sihat dum anggeeta  
Lompi ate lon na gundah  
Pike payah akan beulanja

Tuboh saket muka mirah  
Mata bilah bak meujaga  
Peuekeu sabab lon seuleuah  
Sabab cidah that calitra

Hikayat nyoe kon le cakup  
Laju mangat maken jula  
Soe nyang deungo teuka 'ajab  
Bak duek siat roh bak jula

Miseue ureueng jak pot kulat  
Geujak siat geuwoe jula  
Lagi keunong buhu rajat  
Sanjak teupat meuadoe a

Keunong antok tango mangat  
Dumna rakyat jiplueng suka  
Nyang na bacut ulon surat  
Banja teupat sang kreh Jawa

Haba cakri teuduek siat  
Bek panyang that gadoh gura  
Bahle jinoe balek ayat  
Meudeh siat ulon cuba

Ie di laot that barollah  
Riyeuek bicah bineh pasi  
Teuduek 'oh nan saboh ulah  
Nyoe lon peugah laen lagi

Jinoe lon kheun po samlakoe  
Aneuk Putroe Geureudan Umami  
Nyankeu raja peugang nanggroe  
Ka saboh roe gantoe abi

Yoh masa nyan muda seudang  
Dum sibarang ka jiantri  
Ahmad Kasari meuheu bujang  
Hai tuan datang keu mari

Beudoh bandum uleebalang  
Beusajan meuntro ngon wadi  
'Oh meusapat dum sinaroe  
Beudoh jinoe geupeureugi

Geujak laju keu deh geuwoe  
U meuligoe Lelan Syikri  
Teuku meuntroe guree sajan  
Sikalian deungon wadi

Putroe nyang lhee sit di sinan  
Sajan-sajan Lelan Syikri  
Ka meusapat dum sibarang  
Yoh masa nyan Ahmad Kasari

Bet ngon jaroe di hadapan  
Jiduek jeunjang atueh keurusi  
Phon neutanyong meunoe bagoe  
Wahe meuntroe deungon kami

Wahé teungku guree kamoe  
Dan sinaroe laen lagi  
Wahé cutma po man putroe  
Tanyong kamoe jaweueb neubri

Lon tanyong nyoe kareuna Allah  
Nyang ekheulah jaweueb neubri  
Akan proe hai mate ayah  
Nibak Allah ka troh janji

Bak hakikat ka troh ajai  
'Oh nan sagai umu neubri  
Ka bak Tuhan meunan azai  
Nibak akaipi that jibri

Akan teutapi nibak adat  
Deungon sabab roh teukeudi  
Ayah matepi na sabab  
Na alamat leumah teurjali

Le that dali han ek hisab  
Jeuep-jeuep teumpang jaroe gaki  
Dalam idong te ubiet darah  
Dalam babah tan beureunti

Pakon meunan cuba peugah  
Asailiah cuba kheun kri  
Cuba peugah nyang sibeuna  
He peurdana teuku wadi

Mangat puleh ate hamba  
Meunyo hana ingat seundiri  
Meunan tanyong raja muda  
Seuot teuma teuku wadi

Sabet beuna po meukuta  
Tan meutuka ban kheun doli  
Beuthat mawot ajai teuka  
Sababjih na baranggari

Akan teutapi tuanku droe  
Bak kamoe han putoh tukri  
Hana trok thee bandum kamoe  
Di meuligoe raja doli

Meunan jaweueb teuku meuntroe  
Meusu Putroe Lelan Syikri  
He banta cut aneuk lidah  
Ngo lon peugah mangat meukri

Lagee lon eu meunan lon peugah  
Asailiah mate doli  
Masa teuka ujeuen raya  
Teungeut indra dua kami

Teungeutpi trep lama masa  
Han tom nyang ka meunan lawi  
Tiba-tiba lam nibak nyan  
Jaga tuan raja doli

Sireuta lon jaga sajan  
Beudoh laman cok khanduri  
Lon cok sahab buka idang  
Sulotan neuminom kanji

Abeh neujep saboh cawan  
Neukheun yoh nyan ubak kami  
Peuebu lagee tuan putroe  
Pakon meunoe rasa kanji

Nyang ka han tom dilee puroe  
Uroe nyoe laen teurjali  
Teuma seuot patek laman  
Untong kadang sabab ini

Sabab lama keutidoran  
Meunan nyum sang wahe doli  
Han jan lhee seun peugah haba  
Yoh nyan raja han le meukri



Sinankeu phon raja reubah  
Lon sambot pantah ulee doli  
Nyankeu sabab nyang na leumah  
Mate ayah teunku abi

Laen nibak nyan hana leumah  
Sidroe Allah nyang keutahwi  
Han jeuet aneuk lon meuteuoh  
Di lon reuloh that lam ate

Putroe peugah sira jimoe  
Meutaloe ie mata ile  
Po cut Ahmad seuot meunoe  
Buettan nyoe 'ajab sikali

Wahe cutma po ma badan  
Lon tanyong ban jinoe lagi  
Pat jiteubiet ma idang nyan  
Makanan datang keu mari

Pane teuka sret di manyang  
Keu junjongan soekeu nyang bri  
Pane ureueng laen datang  
Siri insan nyang beurani

Si Cut Ahmad muka masam  
Jipandang bak Lelan Syikri  
Jicok peudeueng le jireugam  
Putroe Lelan jimeung tadi

Meuntroe kalon han got lagee  
Peudeueng dilee neusambot le  
He raja cut bungong keumee  
Piyoh dilee he Kasari

Putroe dua beudoh sajan  
Marit nyoeban Rakna Diwi  
Wahe aneuk muda seudang  
Pakon rijang teuka beunci

Piyoh dilee uleebalang  
Hai intan tadeungo umi  
Ka lheueh lagoe raja pulang  
Peuneusan bak teungku abi

Pakon lupa wasiet ayah  
Aneuk lidah bek meupake  
Ka lheueh lagoe raja peugah  
Bek meubantah barangsoe le

Raja Ahmad muka mirah  
Teusuet pantah narit keuji  
Meuhan meukri buettan ayah  
Han kukeubah Lelan Syikri

Kupoh mate haram jadah  
Han jeuet keubah han got bagi  
Han jeuet keubah lam donya nyoe  
Bangsa geubloe biek abeudi

Teuboh adat rusak nanggroe  
Sabab gop nyoe buet that keuji  
Hana patot tuba lakoe  
Aneuk bisoe Lelan Syikri

Meuhan kupoh aneuk bisoe  
Kon ulon nyoe nan Kasari  
Si Cut Ahmad jimeusumpah  
Seuot pantah guree sani

Guree dua seuot pantah  
Nyankeu ayah Rakna Diwi  
Abdus Sa'id nan geupeugah  
Meunoe ulah jaweueb geubri

Wahe raja banta indah  
Sibeunalah ban kheun doli  
Sit na geukheun dalam kisah  
Na geupeugah dalam rawi

Tiep-tiep ureueng buettan salah  
Han jeuet keubah sikali-kali  
Boh barangsoe hina meugah  
Waleepon mbah raja neugri

Patot tapoh patot tadra  
Biek beulaga aneuk sihe  
Patot taboh ateueh sula  
Hana guna takeubah le

Akan teutapi he junjongan  
Keuteurangan dilee tacari  
Meunan bak lon nyang na reumbang  
Akhe datang cit teurjali

Baranggasoe nyang buet salah  
Cit leumah alamat meuri  
Hana sidroe hamba Allah  
Bangke gajah ek jibuni

Patot dilee sidek sasat  
Bek sigra that adeueb tabri  
'Oh meuteumeung nyan alamat  
Tapoh leugat ureueng deungki

Bekkeu jinoe tapeumate  
Di akhe lon takot rugi  
Meunyo kureueng pike syawe  
Teukeusa peue guna lagi

Meunan bak lon nyang meusampe  
Diakhie rugoe teurjali  
Ka lon peugah awai akhe  
Cuba pike toh nyang meukri

Kasari hana jipateh  
Di jih meudeh leumah rawi  
Bak pihak atejih peudeh  
Jikhen meuceh nan bak waki

Wahe bujang waki nanggroe  
Kacok Putroe Lelan Syikri  
Kabeureukah gaji jaroe  
Beudoh jinoe kaboh rante

Kajak hue ateuh bumoe  
Aneuk bisoe han got bagi  
Bahle mate umu sampoe  
Meuhan kamoe han pueh ate

Yoh nyan jiikat putroe seudang  
Sayang intan Lelan Syikri  
Teuma jihue rijang-rijang  
Uleuen peukan jikeubah le

Ka jirinthak keu noe keu deh  
Sira teureuh ulee ili  
Hana sidroe teuka gaseh  
Aneuk paleh bandum deungki

Luka asoe teubiet darah  
Hana gundah tuan Siti  
Dum peukara jok bak Allah  
Nyang peurintah langet bumi

Nyang na teubiet meunie mata  
Sayang raja putroe ahli  
Ucap syuko keu Rabbana  
Allah Ta'ala sidroe Rabbi

Paleng ate nibak donya  
Hadap Esa Tuhan Ghani  
Pulang bak Allah dum peukara  
Sosah hana Lelan Syikri

Syiah Luddin di meuligoe  
Ayah putroe tuan Siti  
Neubeuet do'a neuleueng jaroe  
Sira neumoe Teungku Kadi.

Neubeuet kulhu neubeuet yasin  
Syiah Luddin hana khali  
Hana teudoh neuleueng amin  
Ate yakin keu Putroe Ti

Nyang sayang that aneuk dua  
Seutot bunda moe meu'i-i  
Ho nyang jihue Putroe Lela  
Aneuk dua ulee ili

Ngon jipoh droe hana reuda  
Putroe Seutia ngon Cut Ali  
Putroe Juhur balek ayat  
Moe rayat that jipeubla ma

Bek kahue le wahe rakyat  
Pakon jeungkat bandum gata  
Sira jimoe Putroe Juho  
He dalem e bek tapoh ma

Si Cut Ali hana tuto  
Ie mata ro moe meu'a-a  
Aneuk jimoe hana teudoh  
Meuh seuneupoh seutot bunda

Putroe jihue Tunong Baroh  
Allah hai beh sayang raya  
'Oh lheueh jihue keu deh keu noe  
Keubah jinoe di teungoh banda

Jipeuayeb tuan putroe  
Aneuk bisoe tan seutia  
deungon ija abeh beukah  
Jihue pantah tan jikira

Luka asoe teubiet darah  
Allah Allah sayang raja  
Bitpi meunan putroe indah  
Hana gundah Putroe Lela

Suntok sabe dike Allah  
Ate dahsyah keu Rabbana  
Lheueuh jikeubah tuan putroe  
Lasyeuka woe ubak raja

'Oh leupah woe aneuk bisoe  
Ureueng nanggroe laen teuka  
Na padum droe gujak keu nan  
Nyang na iman dalam dada

Geupeurab bak putroe intan  
Pihak sayang inseueh teuka  
Ija geujok pantah rijang  
Geutop badan putroe muda

Sireuta ngon geucom tangan  
Ngon cut intan meuah deesya  
Hoh masa nyan ureueng nanggroe  
Dum jimeuproee tuha muda

Bukon sayang tuan putroe  
Trok bak dumnoe geupeusyksa  
Patot patot teugo salah  
Sidah geukeubah lam istana

Beuthat geupoh nyawong sudah  
Bek leumah bak asoe donya  
Hankeu na got ayeb bunyoe  
Bit raja nyoe tan bicara

Bit raja nyoe hana akai  
Sangat beubai bak ri rupa  
Meunan-meunan dum jimeuproee  
Sira jimoe rakyat dumna

Sireuta ngon jileung jaroe  
Keu putroe lakee sijahtra  
Allah Allah Tuhan kamoe  
Neubri putroe beuleupah bahya

Ka sidumnan neuteukeudi  
Jinoe neubri beusijahtira  
Sayang lon that Lelan Syikri  
Ya Ilahi neupeuglah bahya

Bandum meunan jimeulakee  
Hana padee rakyat dumna  
Yoh masa nyan bungong keumee  
Moe meuree-ree Putroe Lela

Sabab neungieng Peureudan Ali  
Dan lagi juhur Seutia  
Saboh aneuk meuhei abi  
Saboh lagi meuhei bunda

Nyankeu sabab putroe bae  
Hai ameuk e pakri daya  
Teukeudi Po Rabbon Ghafu  
Aneuk teungku ka troh masa

Allah Allah aneuk badan  
Ulon paban bijeh mata  
Ka troh janji nibak Tuhan  
Mate sajan lon ngon bapa

Ayah mate lonpi mate  
That meusampe bijeh mata  
Ka teukeudi Rabbon Kade  
Tuhan peuce lon ngon gata

Lon sangka aneuk mate abi  
Tinggai umu soe peulara  
Hana lon thee hai Cut Ali  
Lom teukeudi mate bunda

Bak lon sangka hai boh ate  
Beumeusampe lon peulara  
Hana lon thee lonpi mate  
Panyot kande tinggai gata

Allah Allah aneuk badan  
Bukon sayang boh ate ma  
Saleh mate ulon tuan  
Gata intan soe peulara

Ulon mate ngon teukeudi  
Saleh pakri gata dua  
Allah aneuk ulon paban  
Nasib badan bunda gata

Nasib tuboh laon hai intan  
Buet cut abang aduen gata  
Meunan sabe putroe bae  
Ie mata ro hana reuda

Aneuk dua sinan bae  
Putroe Juhur lhee sireuta  
Teutap putroe sinan jimoe  
Lasyeuka woe lon calitra

'Oh troh ubak raja nanggroe  
Kheun hareutoe dum peukara  
Lheueh nibak nyan raja nanggroe  
Neukheun meunoe bak lasyeuka

Wahe namiet riwang jinoo  
Jak cok putroe nyang ceulaka  
Kajak peulop keu deh leugat  
U dalam glap seupot buta

Yoh nyan namiet jibeurangkat  
Jicok leugat Putroe Lela  
Jicok putroe jiba rijang  
Seutot sajan aneuk dua

Ka jipeulop putroe seudang  
U yup bagan dalam kama  
Ngon seupot that hana bagoe  
Sayang putroe teupat hina



Jiploh ikat kaki jaroe  
Kon le bagoe miseue nyang ka  
Lheueh jikeubah putroe sinan  
Namiet yoh nyan woe bak raja

'Oh troh keu deh bak sulotan  
Jipeugah ban aneuk dua  
Ampon tuanku aneuk putroe  
Ka sajan droe Putroe Lela

Ban raja ngo meunan bagoe  
Riwang jinoe jak kagisa  
Kayue jak weh pantah rijang  
Bek sinan meusapat ngon ma

Namiet jiplueng teuma rijang  
Bak bagan jipeurab lanja  
'Oh troh keu nan ka jipeutoe  
Jihareutoe haba raja

He Cut Ali ngon cut putroe  
Han jeuet sinoe taduek gata  
Beudoh laju taweh leugat  
Bek meularat ngon poteu raja

Yoh masa nyan Putroe Juho  
Teudong tahe hana haba  
Po Cut Alipi tan tuto  
Sit nyang na ro meunie mata

Putroe Lelan neukheun meunoe  
He aneuk droe bijeh mata  
Beudoh aneuk keu deh jak woe  
Bek le sinoe duka cita

Bek le aneuk ate sosah  
Jik bak Allah dum peukara  
Aneuk beudoh yoh nyan pantah  
Taeu joh-jah ngon ie mata

Jijak laju bandua droe  
Keudeh jiwoe ubak raja  
'Oh troh jiwoe keu deh sampoe  
Marit meunoe ngon syeedara

He cut abang raja nanggroe  
Peulheueh jinoe bunda hamba  
Han soe bri bu lon dua droe  
Tan di kamoe laen bunda

Raja Ahmad seuot pantah  
Bunda kah that-that ceulaka  
Bah beumate umu sudah  
Han jeuet keubah dalam donya

Putroe Juhur maken jimoe  
Jikheun meunoe lom bak raja  
Wahe dalem aduen lon nyoe  
Ngieng keu kamoe siblah mata

Beutagaseh ngon tasayang  
He cut abang gata raja  
Tangieng keu lon adek sajan  
Bek tapandang ateueuh bunda

Adat salah ma boh ate  
Jinoe bek le tapeusyiksa  
Meunan jikheun sabe-sabe  
Saket ate poteu raja

Yoh nyan raja neuseuot le  
Aneuk sihe kreueh that jungka  
Kukheun meunoe kakheun meudeh  
Bit that paleh kah ceulaka

Kuteumeung poh aneuk sihe  
Bahle mate jih bandua  
Meukon meunan han meusampe  
Kutiek bangke sapat ngon ma

Kasari beudoh cok ngon kayee  
Bungong keumee jiplueng lanja  
Jiplueng laju woe u juree  
Moe meuree-ree adoe ngon a

'Oh sare troh u rumoh droe  
Jieh jinoe lam istana  
Bahle lon kheun haba nyang toe  
Aneuk putroe teungeut indra

Singoh beungoh teubiet uroe  
Beudoh jinoe po jroh rupa  
Jijak laju ubak ma droe  
Keu deh sampoe bak glap buta

Sare meu sapat nyan banlhee droe  
Lom ka geumoe jamong rugha  
Ngon ie mata sret teurijon  
Jimeucom-com ngon meuwa-wa

'Oh sare lheueh geumeucom-com  
Bungong sukon duek sajan ma  
Hingga seupot le ngon uro  
Beudoh jiwoe aneuk dua

Aneuk jiwoe u meuligoe  
Tinggai ma droe bak glap buta  
Singoh beungoh lom jiriwang  
Bungong karang jak saweue ma

Deungon adoe dua sajan  
Ali Peureudan boh ate ma  
Beungoh jijak seupot jiwoe  
Hana padoe suntok masa

Suntok sabe meunan bagoe  
Geunap uroe meunan keurija  
Suntok uroe meunan sabe  
Neutupeue le poteu raja

Yoh nyan raja saket ate  
Neumeuhei le sidroe hamba  
Troh le namiet jipeureugi  
Raja kheun kri meunoe haba

Kacok Putroe Lelan Syikri  
Lam glap sunyi keu deh kaba  
Bek le sinan jih kakeubah  
Kapinah bak leubeh hina

Kaboh gunci teuma pantah  
Bahle punah sinan fana  
Aneuk dua laen teupat  
Bek meusapat deungon bunda

Katop pinto beugot rapat  
Mangat teutap jih lam kama  
Mangat mate jih banlhee droe  
Bangsa geubloe biek ceulaka  
'Oh lheueh suroh bak tuanku  
Jijak laju le Si Kamba  
Hingga troh bak bungong meulu  
Aneuk teungku jicok sigra

Jicok Putroe Lelan Syikri  
Lam glap sunyi jisak lanja  
Nyankeu teupat nyang that keuji  
Ngon bee hanyi khép han tara

Lheueh jipeulop Lelan Syikri  
Jiboh gunci pinto kama  
Putroe Juhur deungon adoe  
Laen sagoe laen kama

Jitop pinto jiboh bajoe  
Aneuk bisoe jiwoe lanja  
Lelan Syikri teutap sinan  
Di yup bagan dalam kama

Hana sosah putroe intan  
Hana bimbang ate duka  
Hana saket mangatpi tan  
Peuteungohan lam antara

Neumeudike uroe malam  
Pujoe Tuhan hana reuda  
Meunan sabe baranggajan  
Pagi peutang hadap Esa

Putroe Juhur teumpat laen  
Bintang canden ngon syeedara  
Jimoe sabe that meuleng-leng  
Muka ceuken rok-rok masa

Bukon sayang bungong pade  
Suntok sabe dalam rugha  
Hana teudoh jimoe sabe  
Reuloh ate that bandua

Tujoh uroe tujoh malam  
Sikeujap han na tom reuda  
Lom jipoh droe hana reunggang  
Peureudan ngon Cut Seutia

Lawet lawan teuma dudoe  
Simalam nyoe po got rupa  
Ka teupike si nyak putroe  
Keupeue lon yoe jamong rugha

Bak malam nyan si nyak meugleueng  
Cut Juhur kheun bak adekda  
He adek cut intan buleuen  
Tango lon kheun sikrak haba

Nyang got adek bek tamoe le  
Bak lon pike hana guna  
Beuthat takhenn meunoe meudeh  
Han sit puléh ate duka

Nyang na reumbang bak lon pike  
Gotkeu bahle tapoh cakra  
Untong gadoh sosah ate  
Bekkeu that le jamong rugha

Meunan jikheun cut puteh di  
Si Cut Ali seuot sigra  
Di lon cutda han lon tukri  
Bak poh cakri tan biasa

Cuba takheun hai cutda Ti  
Sang beureuhi lon adekda  
Putroe Juhur su meualon  
Jikheun le pohn hai adekda

Geutanyoe na miseue tiong  
Dalam kurong cintramula  
Ka Tuhan bri meunan untong  
Gata ngon lon meunoe kada

Suara putroe go meusye-sye  
Sang buloh tho geuplah dua  
Lom putroe kheun lagee bae  
Meunoe ato basa Jawa

Ayo he nasib pike keu untong  
Nasib beugini kita keudua  
Nasib tuboh di dalam kurong  
Nasib datang dari kakanda

Ayo he sayang badanku ini  
Beurnyala-nyala sirupa api  
Ateku sosah tinggai di sini  
Pike teureubang bunda dicari

Kalee datang kapai Marikan  
Banyak muatan nyang bayek-bayek  
Kalee kuteumu bundaku sajan  
Sijuek badan ayer peureucek

Wahe Tuhan Rabbon 'Izzati  
Tuhan peurintah langet dan bumi  
Leupah badanku di dalam peuti  
Sajan adekda Peureudan Ali

Beutapa guna dudok sikarang  
Ate peureugi jawohnya hilang  
Dadaku hanco sibagoe reundang  
Sabab bundaku tidak kupandang

Badanku sayang di dalam rante  
Pike teureubang di dalam ate  
Bundaku hilang ayahpun mate  
Di mana teumpat jalan kucari

Allah hai lam sosah ate  
Sit lam sabe dukacita  
Ayah mate mapi tan le  
That meusampe ateueh hamba

Allah hai lam saket badan  
Pat kupeusan ie peunawa  
Apon mata apon badan  
Hai Peureudan meunyo tan ma

Allah hai adoe Peureudan Ali  
Tapaban tukri bijeh mata  
Grak bak Allah troh bak janji  
Ka jeuem teukeudi lon ngon gata

Putroe bae le that macam  
Han ek teelan lon calitra  
Ngon suara bagoe gambang  
Siat-siat sang genggong Jawa

Nakeu watee teungoh malam  
Teukeujot insan sidroe jaga  
Ban teukeujot nibak pangsang  
Yoh nyan dendayang deungo suara

Su cidah that jitupat tan  
Sabab jih nyan baro jaga  
Sang di likot sang hadapan  
Sang-sang manyang di antara

Sang di miyup sang di kanan  
Hireuen mandang meupat hana  
Sosah ate ureueng binoe  
Jitren jinoo jak peunyata

'Oh sare troh tren u bumoe  
Jingo bunyoe dalam kama  
Ban jideungo su cut putroe  
Dendayang nyoe gaseh teuka

Dalam ate pike meunce  
Bahle jinoo kujak buka  
Buka pinto mameung-mameung  
Sira jikheun meunoe haba

Wahe putroe intan buleuen  
Hai cut meugleueng deungo cutda  
Bek le pot cut taduek sinoe  
Laen nanggroe tajak bungka

Meunyo taduek laju sinoe  
Akhe dudoe mate fana  
Bek le po cut ate sosah  
Jik bak Allah dum peukara

Meuna bagi deungon tuah  
Dumpeue mudah neukaronya  
Taduek sinoe peue na ase  
Cuba pike peue na guna

Nyang na saja rusak ate  
Troh bak mate lama-lama  
Nyang got bak lon putroe intan  
Beudoh rijang jak neubungka



Meuna untong nibak Tuhan  
Nakeu jalan akhe masa  
Di lon po cut kupeuingai  
Sayang lon that gata dua

Po ma putroe bahle teutap  
Sinan meuhad dalam kama  
Ka lon peugah saket mangat  
Cuba ingat toh nyang laba

Meunyo po cut panyang ingat  
Teuntee arat bak neukira  
Teuma seuot si nyak putroe  
He po da droe sabet beuna

Bit meutuah gata sidroe  
Da sambinoe that seutia  
Tatem peugah dum keu kamoe  
Laen han soe lagee gata

Allah Allah da meutuah  
Han ek balah guna gata  
Sidroe Tuhan nyang ek balah  
Nyang peurintah ateuh hamba

Beudoh cutda jak ba kamoe  
Siat jinoe ubak bunda  
Dendayang ek u meuligoe  
Peukayan putroe jijok lanja

Teuma jitren rijang-rijang  
Putroe intan laju jiba  
'Oh troh keu deh bungong rihan  
Marit nyoeban meuhei bunda

Wahe mapo ma teungku droe  
Idin lon nyoe ngon adekda  
Hajat bungka bak uroe nyoe  
Tinggai sinoe gata bunda

Lon meung tamong hana jalan  
Pakriku ban lon ngieng mata  
Meunan jikheun cut meusubang  
Putroe Lelan jaweueb sigra

Han peue salah po sambinoe  
Idin lon nyoe bijeh mata  
Yoh neukheun nyan putroe neumoe  
Meuteutaloe ngon ie mata

Tajak aneuk beuseulamat  
Tuhan Hadarat nyang peulara  
Uroe page di akhirat  
Keu deh meusapat lon ngon gata

Allah hai aneuk bintang tanjong  
Meuah ampon bandum deesya  
Nyoekeu aneuk peulheueh apon  
Uroe nyoe lon cre ngon gata

Yoh masa nyan meuh seuneupoh  
Basah tuboh sret ie mata  
Rot deh geumoe rot noe riyoh  
Allah hai beh sayang raya

Lelan Syikri moe meuree-ree  
Sang ka pade lam glap hina  
Nyoe lon peugah bungong keumee  
'Oh lheueh lakee idin bak ma

Meumat jaroe ngon dendayang  
Cutda badan meuah deesya  
Jijok ija le dendayang  
Dum jipulang ngon boh dokma

Nyoe makanan saboh bungkoh  
Nyan peunajoh di rot raya  
Beuseulamat cut putroe beh  
Meuh seuneupoh beumeubahgia

Kukuek manok saboh-saboh  
Cut putroe jroh beudoh bungka  
Dumna cicem goh lom beudoh  
Awai suboh teubiet faja

Yoh nyan neujak putroe seudang  
Dua sajan ngon adekda  
Ngon ie mata meugeulumbang  
Bukon sayang aneuk raja

Sayang putroe panyot tanglong  
Ate tutong ingat bunda  
Jiteubiet blang tamong gampong  
Seutot untong ho langkah ba

Sira jijak si nyak putroe  
Pike meunoe dalam dada  
Keupeue di lon peukayan nyoe  
Dum sinaroe ngon boh dokma

Kadang mate nyawong simpan  
Rot lam hutan peukoh rimba  
Bandum alat ngon peukayan  
Keurugian sia-sia

Kamoe mate alat gadoh  
Sayang teuboh di rot raya  
Adat lon bri keu seudeukah  
Bak Allah meuteumeung fahla

Meunan pike putroe indah  
Tanda meutuah aneuk raja  
Teungoh-teungoh putroe pike  
Meuteumeung le ureueng tuha

Si nyak putroe yoh nyan pangge  
Panyot kande meunoe haba  
Nyoe hai teungku cok seudeukah  
Lon ekheulah bri keu gata

Teungku faki sambot pantah  
Meuh nyang mirah dum peurmata  
Sira neukheun alhamdulillah  
Ajarakallah nyang keudua

Lompi neukheun putroe indah  
Tuhan balah dum keu gata  
Oh lheueh jijok dum peukayan  
Putroe intan laju bungka

Deungon adoe dua sajan  
Cut Peureudan boh ate ma  
Hingga lon kheun haba nyang toe  
Aneuk putroe jimeusafa

Ka dalam gle keu deh sampoe  
Nakeu uroe watee 'asa  
Yoh masa nyan aneuk agam  
Cut Peureudan salah sangka

Si Cut Ali salah waham  
Muka masam jieu rimba  
Ka teuingat nyan u nanggroe  
Jikheun meunoe le bak cutda

Wahe cutda jak udeh woe  
U nanggroa bak teumpat nyangka  
Adat mate bah di nanggroe  
Peue buet keu noe peukoh rimba

Saket mangat laba rugoe  
Bah di nanggroeteu hai cutda  
Peue buet cutda keu noe lam gle  
Jak bloh awe rimba raya

Beudoh jak woe bek le pike  
Da boh ate jak tagisa  
Teuma seuot si nyak putroe  
Pakon adoe rijang lupa

Tan taingat yoh di nanggroe  
Geutanyoe keunong enaya  
Hana sabab geutanyoe geupoh  
Peue buet adoe jroh lom tagisa

Geutanyoe geupoh bunda sajan  
Sababjih tan geupeusyeksa  
Peue buet adoe lom tariwang  
Soe tapandang 'oh hana ma

Pakon adoe salah pike  
Bek boh ate salah sangka  
Di lon adoe han kuwoe le  
Bahle mate dalam rimba

Adat mate ulon paban  
Ka bak Tuhan meunoe kada  
Meunan jikheun putroe intan  
Ali Peureudan han le dawa

Meunyo meunan cutda badan  
Bri makanan deuk lon raya  
Si nyak putroe cok makanan  
Makeuen sajan dua-dua

'Oh lheueh makeun bungong meulu  
Beudoh laju leugat bungka  
Jipeuteupat nap u Timu  
Matauroe hu nyan keu tanda

Uroe malam jijak sabe  
Han le pike adoe ngon a  
Jibloh uteuen duroe awe  
Jiarong gle peukoh rimba

Abe jibloh lam-lam duroe  
Si nyak putroe tan jikira  
Beukah ija luka asoe  
Bandua droe sisyeedara

Tan jingrat teubiet darah  
Han le gundah aneuk raja  
Dum peukara jok bak Allah  
Hana ubah dalam dada

Hingga lon kheun haba nyang toe  
Malam uroe jijak lanja  
Tujoh malam tujoh uroe  
Troh sampoe bak saboh guha

Saboh naga lam guha nyan  
Padum jaman sinan jitapa  
Sit jpreh troh teuka insan  
Jimeung pulang hekeumat tapa

Sit ka janji masa dilee  
Jilakee bak Tuhan Esa  
Jimeung bri keu bungong keumee  
Soe nyang dilee keu nan teuka

Naga jieh lagee bateueng  
Meukuweueng sang kayee raya  
'Oh troh keu nan bandua droe  
Meusu adoe kheun bak cutda

Si Cut Ali jikheun meunoe  
Peue meubunyoe jeh hai cutda  
Peue binatang raya teudu  
Matapi hu miseue sua

Seuot putroe sang ban laku  
Uleue leumbu nyankeu naga  
Aneuk dua ate lucot  
U likot jipakat gisa

Naga jikheun hai bungong sret  
Bek teumakot po jroh rupa  
Tacok po cut nyoe peunulang  
Pusaka wang raja naga

Peukreueh ate putroe seudang  
Jita nyong ban ubak naga  
Peue tapulang he cut abang  
Peugah rijang wahe raja

Suot naga euncien malakat  
Deungon tungkat sajan dua  
Lom jitanyong pirak lipat  
Euncien ngon tungkat peue na guna

Suot haga hai nyak putroe  
Le that bagoe nibak guna  
Watee tungkat mat ngon jaroe  
Tase kamoe raja naga

Adat hajat nyan keu peudeueng  
Han soe linteueng tajam mata  
Le that guna han ek bileueng  
Po cut meugleueng tueng keu gata

Naga peugah awai akhe  
Ka teupika po jroh rupa  
Aneuk dua mangat ate  
Naga jok le nyan pusaka

Abeh wasiet dum amanat  
Pirak lipat sambot sigra  
Lheueh nyan putroe lom beurangkat  
Jijak leugat ngon adekda

Si Cut Ali lakee tungkat  
Tabri siat ulon bawa  
Deungon euncien nyang malakat  
Galak lon that wahe cutda

Si nyak putroe jijok leugat  
Pirak lipat hana dawa  
Jisok euncien nibak jaroe  
Po samlakoe ate suka

Hingga lon kheun haba nyang toe  
Sikhan uroe cre ngon naga  
Jijak laju bandua droe  
Troh bak sungoe krueng nyang raya

Ie dalam krueng hana that ie  
Pante dum tho leumah nyata  
Si Nyak putroe ka teusawo  
Jimeututo ngon syeedara

Tadeungo lon wahe adoe  
Tabri keumoe tungkat raja  
'Oh leupah krueng pulang bak droe  
Bahle jinoe ulon bawa

Si Nyak Ali seuo pantah  
Bek tagundah wahe cutda  
Nibak badan lon beureukah  
Adat reubah han peue mara

Si nyak putroe ka jiiem droe  
Hana sapeue le suara  
Takot beungeh ate adoe  
Po sambinoe jipeulara

Yon nyan putroe jijeumeurang  
Dua sajan ngon adekda  
Troh teungoh krueng muda seudang  
Ujeuen datang sajan ie raya

Teukeudi Po Rabbon Kade  
Alamat cre urueng dua  
Yoh masa nyan bungong pad'e  
Jigule uleh ie beuna

Ile laju si nyak putroe  
Laen nanggroe bineh kual  
Ka meusareueng ateuh tungoe  
Teupin sungoe dalam bangka



Sidroeu ureueng jak cok kayee  
Geueu lagee manusia  
Geujak laju keu nan dilee  
Bungong keumee jak peunyata

Nama gop nyan Cutti Male  
Inseueuh ate neueu rupa  
Neucok putroe neupuwoe le  
Galak kon le ureueng tuha

Troh u rumoh salen basahan  
Bri peukayan gantoe ija  
Si nyak putroe hana pangsan  
Tulong Tuhan neupeulara

Sabab le that bri seudeukah  
Tuhan balah akan dia  
Dalam ate that ekheulah  
Soe bri seudeukah raya fahla

Nyankeu fahla Tuhan balah  
Gadoh sosah lam ie raya  
Nyoe lon peugah Cutti Male  
Dumpeue asa sianika

Neubri ngon bu panyot kande  
Galak ate hana tara  
'Oh lheueh makeuen si nyak putroe  
Tanyong meunoe ureueng tuha

Wahe aneuk nyak sambinoe  
Peugah jinoo nyang sibeuna  
Patbu gampong deungon nanggroe  
Namateu soe geuhei gata

Soe nan ayah intan buleuen  
Soe keurajeuen nanggroe gata  
Bunda gata soe nan geukheun  
Sret dalam krueng peue kareuna

Putroe Juhur yoh nyan jimoe  
Ingat keu adoe si cut banta  
Sireuta ngon seuto meunoe  
E ma putroe hai ma raja

Ka tatanyong ma meutuah  
Ulon peugah ngon sibeuna  
Sabab nyang phon mate ayah  
Asailiah sinan mula

Lom teukeudi nibak Tuhan  
Bunda sajan keunong syeksa  
Lonpi geupoh adoe lon sajan  
Hai ma badan tan kareuna

Han ek lon theun sabe-sabe  
Lon plueng lam gle peukoh rimba  
'Oh troh lam krueng ie peuille  
Sinankeu cre ngon adekda

Saleh udep saleh mate  
Saleh han le adoe hamba  
Putroe peugah awai akhe  
Sajan ile ngon ie mata

Cutti Male yoh nyan teupike  
Neuseuot le meunoe haba  
Meunyo meunan hai sambinoe  
Deungo lon nyoe po jroh rupa

Bek le tajak keu deh keu noe  
Piyoh sinoe sajan hamba  
Meunyo tajak nyak meutuah  
Tan faidah bak lon kira

Si nyak putroe han le tuto  
Ka tahe ingat syeedara  
Nyang na jimoe ie mata ro  
Putroe Juhur sayang raya

Teutap sinan si nyak putroe  
Malam uroe sajan maha  
Bah lon balek ayat jinoo  
Bek le meunoe bacut saja

Teuduek haba si nyak putroe  
Jinoo adoe lon calitr  
Ia di laot meuwoe ulang  
Lam beurawang meujak meuwoe

Amma bakdu adek badan  
Ali Peureudan lon hareutoe  
Masa karam lam ie raya  
Cre ngon cutda dalam sungoo

Hana jeuh hanyot banta  
Bacut saja rab ngon bunoo  
Jime le ie bineh reuleueng  
Jidrop naleueng deungon jaroo

Jimat kayee mameung-mameung  
Bungong seupeueng teungoh keudroe  
Troh u darat bungong pade  
Jieu han le syeedara droe

Sira jimoo meunoe pike  
Dalam ate po samlakoo  
Allah hai Po Rabbon Kade  
Ka neupeuce cutda kamoo

Saleh udep saleh mate  
Saleh han le pakri jinoo  
Si Cut Ali moe meu'u-'u  
Soe nyan na eu gundah han soe

Jipeugah bak Rabbon Ghafu  
Pakri laku ulon jinoo  
Meunyo hana le syeedara  
Keupeue guna kamoo sidroe

Ya Tuhanku neupeulara  
Lon ngon cutda bandua droe  
Udep mate beusijahtra  
Tuhan Esa tulong kamoe

Allah Allah ya Rabbana  
Kabui do'a lakee kamoe  
Banta jimoe sabe-sabe  
Weueh that ate hana bagoe

Ngon ie mata sret meugule  
Sampoh sabe deungon jaroe  
Teuma teupike dalam dada  
Peue na laba lon duek sinoe

Jibeudoh le teuma sigra  
Dalam rimba jijak sidroe  
Han piyohjijak sabe  
Hingga troh le ujong nanggroe

Nanggroe Tunong lam lungkiek gle  
Panyot kande tamong nanggroe  
Meuteumeung le sidroe teungku  
Meunan laku neutanyong proe

Hai aneuk cut bungong meulu  
Aneuk teungku patbu nanggroe  
Si Cut Ali jiseuot le  
Di dalam gle di lon nanggroe

Taukaudi Po Rabbon Kade  
Ie peuile u nanggroe nyoe  
Ban neudeungo ie peuile  
Ka teupike di teungku nyoe

That meutuah panyot kande  
Dalam ate meunoe bagoe  
Nan teungku nyan Abdus Su'ud  
Kayem khaluet neuboh nanggroe

Teuma neupeuwoe po banta cut  
Hajat peubeuet po samlakoe  
Sabab neungieng ateuh banta  
Neupareksa gaki jaroe

Teungku neuthee that bahgia  
Aneuk raja neuthee keudroe  
Neueu sigak deungon laku  
Utoh teungku neufam keudroe

Troh u rumoh ka neubri bu  
Bungong meulu makeuen sidroe  
'Oh lheueh makeuen muda seudang  
Piyoh sinan malam uroe

Singoh beungoh hari siang  
Teungku yoh nyan peubeuet keudroe  
Phon neupeubeuet sit Quruan  
Jeuet le rijang utoh han soe

Watee tamat beuet Quruan  
Peubeuet lheueh nyan kitab jawoe  
Nyanpi siat jeuet le rijang  
Banta ajam sit that ragoe

Ate peungeuh muda seudang  
Uroe malam that jipakoe  
Teungku kalon meunan macam  
Peubeuet yoh nyan laen bagoe

Neupeurunoe dum peukar  
Si cut banta utoh han soe  
Dum eleumee teungku aja  
Jeuet le sigra jifam keudroe

Peue nyang jieu siat jeuet le  
Peungeuh ate po samlakoe  
Utoh jifam bungong pade  
Dumpeue ase bansinaroe

Bahle lon kheun haba nyang rab  
Pirak lipat rayek keudroe  
Umu peuet thon sinan teutap  
Dum hekeumat utoh han soe

Deungon badan rayek leugat  
Miseue kulat ujeuen baroe  
Akai lisek ceureudek that  
Hana sapat kureueng pindoe

Si Nyak Ali tulong Tuhan  
Utoh jifam jeuep-jeuep sagoe  
Ate teungku galak han ban  
Dum neupulang hekeumat sinaroe

Teutap sinan bungong keumee  
Sajan guree malam uroe  
Jinoe teungku balek lagee  
Bungong keumee teuduek 'oh noe

Puteh-puteh pirak lipat  
Soe ngieng kilat gadoh tunu  
Amma bakdu balek ayat  
Meudeuh siat ulon aju

Nyoe lon peugah sidroe raja  
Lon calitra meusigeutu  
Nama nanggroe nyan Palistina  
Di sinan na sidroe tuanku

Nama Raja Adil Parisi  
Sit geuturi that meusyeuhu  
Nama Putroe Syarifah Binti  
Nyan esteuri deelat tuanku

Nyanpi saboh raja meugah  
Meusyeuhu gah troh u Timu  
Neumeuaneuk putroe indah  
Rupa cidah han jeuet taeu

Raja boh nan Cut Ariyan  
Kulet bad... ng keululu  
Watee jijak taloe jalan  
Uraueng pandang lenyang tunu

Cahya badan meujeureulang  
Han ubah ban panyot lampu  
Bahle lon kheun aneuk raja  
Lon peuhaba meusigeutu

Rupa cidah hana tara  
San g Diwa aneuk Diu  
Cahya gigoe miseue intan  
Dhoe meupatam keunong laku

Soe nyang kalon napsu bimbang  
Le nyang bok-bang teuku teungku  
Bulee keuneng buleuen siuroe  
Rancong tajoe meunan laku

Got meutanggong ngon patam dhoe  
Muka putroe han that buju  
Watee jikhem leumah gigoe  
Baranggasoe ate tunu

Jeuep-jeuep gampong jeuep-jeuep nanggroe  
Hana sidroe nyang sikufu  
Hana bandeng ngon teuladan  
Cut Ariyan that meusyehuhu

Paleuet jaroe jroh meukulam  
Dhoe meupatam keunong laku  
Nibak bibi jiboh kaca  
Got meucahya watee taeu

Cahya gigoe sang suasa  
Le nyang gila guru-guru  
Soe nyang kalon Cut Ariyan  
Han peue tuan le pajoh bu

Pruetteu tarek badan seunang  
'Oh tapandang ate rindu  
Meunankeu nyum nibak rasa  
'Oh watee ka siblet taeu

Meunyo putroe aneuk raja  
Maklum sit ka teungku-teungku  
Han peue panyang le lon peugah  
Sang bedeuah narit payu

Bahle lon kheun haba pantah  
Putroe indah lheueh pajoh bu  
'Oh lheueh makeuen bak siuroe  
Si nyak putroe jak bak abu

'Oh troh jijak bak ayah droe  
Marit keudroe bungong meulu  
Tabri idin he ayahda  
Lon aneukda ate rindu

Hajat di lon jak pot gaca  
Keubon bunga nyang meusyeuhu  
Teuma seuot poteu raja  
He aneukda bungong meulu

Han peue salah bijeh mata  
Ban nyang suka aneuk teungku  
'Oh lheueh idin bak ayah droe  
Si nyak putroe beudoh meupru

Ngon dendayang dum sinaroe  
Jijak jinoe po cut meulu  
Troh u taman jijak leugat  
Pirak lipat ate rindu

Jeuep-jeuep sago e jibeura ngkat  
Rata teumpat dum jijak eu  
Putroe meu'en keu deh keu noe  
Hingga uroe seupot laju



Yoh masa nyan si nyak putroe  
Bak sinaroe ka jibri su  
Wahe cutda beudoh rijang  
Bungong rihan tapot laju

Sajan ngon droe putroe seudang  
Jipot rijang bungong meulu  
Haba nyang rab ulon peugah  
Bungong mirah jipot laju

Ngon teukeudi nibak Allah  
Putroe indah gundah ragu  
Saboh kala sangat juah  
Jikap pantah po cut bungsu

Sangat bisa han peue peugah  
Rupa mirah sang aupi hu  
Jikap nibak aneuk jaroe  
Reubah putroe bungong meulu

Yo ngon badan leungo asoe  
Bungong geutoe gadoh ngon su  
Yoh masa nyan dumna rakan  
Ngon dendayang moe meu'u-u

Dalam keubon sare kiam  
Ureueng datang got that karu  
Ureueng teuka Tunong Baroh  
Dalam lampoh ka'a-ka'u

Ladom tanyong peue nyan kiroh  
Meuh seuneupoh hana le su  
Jimeupakat dum sinaroe  
Jicok putroe peuwøe laju

'Oh sare troh u meuligoe  
Raja nanggroe ka raya su  
Syarifah Binti majih putroe  
Hana bagoe moe meu'u-u

Wahe aneuk bungong nroe  
Pakon meunoe hana le su  
Raja peurab bak aneukda  
Neueu rupa han got laku

Neueu hitam jiek bisa  
Han le cahya putroe bungsu  
Neuhei tabib teuma sigra  
Neuyue tawa po cut meulu

Troh le keu nan dum jiteuka  
Ubat jiba ban silaku  
Ladom tawa ladom gajah  
Putroe indah han teubiet su

Nibak puleh that meutamah  
Raja sosah moe meu'u-'u  
Si nyan putroe Cut Ariyan  
Reuoh peusam han jeuet taeu

Jipoh-poh droe hana reunggang  
Soe nyang pandang ate tunu  
Poteu raja sosah ate  
Ka neupangge nujum laju

Teuku nujum siat troh le  
Raja kheun he teungku-teungku  
Cuba kalon jinoe leugat  
Pirak lipat mantong umu

Jikalee na mantong ubat  
Neupeugah pat nak lon bri su  
Yoh nyan nujum buka kitab  
Jikalon bab peupoh laju

Leumah jieu dalam kitab  
Pirak lipat panyang umu  
Ubatjih na tatapat tan  
Pakriku ban he tuanku

Ban neudeungo haba meunan  
Sulotan meutamah tunu  
Hingga teuma padum uroe  
Raja nanggroe ka neumeusu

Wahe bujang jak lam nanggroe  
Kahareutoe meunoe laku  
Soe peupuleh si nyak putroe  
Nyankeu lakoe po cut meulu

Uleebalang imum nanggroe  
Beuthat meuntroe teungku-teungku  
Beuthat aneuk sigeumadoe  
Boh barangsoe si duek keu bu

Ban nyang lon kheun hana ubah  
Jak keumeurah jinoe laju  
Bandum ureueng hina meugah  
Kayue langkah dum jijak eu

'Oh lheueh suroh nibak raja  
Bujang lanja jijak laju  
Jipeh mongmong jiseuranta  
Jikheun haba bak tuanku

Hingga lon kheun haba nyang toe  
Ureueng nanggroe deungo laku  
Dumna tokang dalam nnggroe  
Cut putroe bandum meunapsu

Dumna tabib abeh teuka  
Jijak tawa putroe bungsu  
Bek antara puleh bisa  
Maken lanja saket laju

Teubiet tamong hana teudoh  
Seun sireutoh seun siribu  
Dalam kuta sare riyoh  
Sang seunujoh kiam 'a-'u

Si nyak putroe that meutamah  
Raja sosah leubeh laju  
Ubak bujang lom neupeugah  
Kajak pantah ubak teungku

Beutroh keu deh ujong nanggroe  
Teungku keu noe kayue laju  
Kayue abeh dum sinaroe  
Rijang jinoe sajan teungku

Teuma jijak teuku bujang  
Siat datang troh bak teungku  
Teungku Su'ud cit di sinan  
Jipeugah ban teuma laju

Wahé teungku guree hamba  
Suroh raja deelat tuanku  
Sajan murid beusireuta  
Beusigra jinoe ngon aku

Bujang peugah ngon sibeuna  
Aneuk raja han got laku  
Ka jikap le saboh bisa  
Putroe muda gadoh ngon su

Dumna tabib gadoh ragoe  
Hana sidroe ek boh laku  
Meuk puleh tuan putroe  
Nyankeu lakoe po cut bungsu

Si Cut Ali jideungo proe  
Po samlakoe seut laju  
Meunyo meunan wahé meuntroe  
Taba kamoe lon meung jak eu

Lagi ulon ureueng hina  
Teupat rajahan tom lon eu  
Han peue salah seut bujang  
Sit han jeuet han beuneujak eu

Teuma beudoh teungku sajan  
Cut Peureudan neuba laju  
'Oh troh keu deh tamong rijang  
U dalam kuta meusyehu

Laju jiba bak sulotan  
Peugah rijang ban silaku  
Laju neume nibak putroe  
U meuligoe neupeuek laju

'Oh troh keu deh bungong geutoe  
Rab ngon putroe neuduek meupru  
Ka neulakee saboh cawan  
Geujok rijang keu nan laju

Neusuet euncian nibak tangan  
Dalam cawan neulhom laju  
Ateueh putroe ie neusiram  
Rahop badan putroe meulu

Bak jaroe jikap le kala  
Gadoh bisahana le hu  
Gadoh saket nekmat teuka  
Teubleut mata putroe bungsu

Cut Ariyan beudoh sigra  
Jiheh bunda jilakee bu  
Mangat ate raja raya  
Cut meutia ka teubiet su

Cut Ariyan bayak rupa  
Jingieng banta malee sipu  
Sabab han tom jieuh nyang ka  
Paleng muka ubek ibu

Syarifah Binti sirong mata  
Bak aneukda po cut meulu  
Putroe areh tupeue basa  
Teuot banta seumbah laju

'Oh lheueh seumbah Cut Peureudan  
Jiduek sajan rab ngon teungku  
Teuma geubet le ngon idang  
U hadapan keu nan laju

Si Cut Ali makeuen sajan  
Cut Ariyanpi pajoh bu  
'Oh lheueh makeuen pinah idang  
Teutap sinan panyot lampu

Nyoe lon peugah poteu raja  
Bak sineuna ka neubri su  
Neuhei guree ngon peurdana  
Peugah haba ban silaku

Meusapat dum uleebalang  
Bale keumang nyang meusyuehu  
Sare ase sikalian  
Meuntroe sajan deungon teungku

Turon sabda nibak raja  
Si cut banta neuyue jak eu  
Si Cut Ali keu nan geuba  
Poteu raja neukheun laku

Wahe aneuk bijeh mata  
Deungo hamba aneuk teungku  
Lon peukawen jinoe gata  
Putroepi ka sampoe umu

Si Cut Ali seuat meunoe  
Ampon kamoe he tuanku  
Pakri neubri keu lon putroe  
Lon sidroe ureueng duek keu bu

Lagi nanggroe hana meupat  
Teubeulasat roh bak teungku  
Nibak ulon ampon deelat  
Sang han meuhad keunong laku

Seuot raja neukheun nyoe ban  
Beuthat meunan aneuk teungku  
Ka teukeudi nibak Tuhan  
Di gata nyan roh sikufu

Adat meukon ka teukeudi  
Pane neubri dumnoe laku  
Bek le aneuk panyang cakri  
Nyan esteuri putroe meulu

Lagi ulon ka lheueh janji  
Han jeuet ungki aneuk teungku  
Barangasoe ubah janji  
Adeueb neubri le Tuhanku

Meunan neukheun raja nanggroe  
Po samlakoe han le su  
Ka tahe teuingat keudroe  
Seungap 'oh noe bungong meulu

Puteh kuneng bungong geutoe  
Bungong panjoe sret meutabu  
Bah lon balek ayat jinoe  
Bek le meunoe wahe teungku

Meunan adat bak hikayat  
Balek ayat seun sigeutu  
Meunoe siat meudeh siat  
Toh nyang mangat ulon aju

Meunyo hana balek ayat  
Sit malah that ureueng nyang eu  
Miseue mangat bak bu leukat  
Tapeusapat ngon sroekaya

Amma bakdu balek ayat  
Raja deelat lon calitra  
Nyoe lon peugah Adil Parisi  
Peutroh janji bek meutuka

Oh lheueh neukheun bak Cut Ali  
Ubak meuntri neumeuhaba  
Neutueng pakat ubak kadi  
Lom bak waki meunoe-haba

Takrah rakyat dalam nanggroe  
Beutroh jinoe tayue teuka  
Imum geusyk. peutua sagoe  
Dum sinaroe ngon bentara

Beutroh keu noe asa uroe  
Takheun kamoe na peukara  
Bujang beudoh jijak keu deh  
Aneuk paleh galak raya

Jicok le gong nibak binteh  
Jipileh nyang raya taga  
Jipeh ngon gong tet ngon beude  
Jimeuhei le sigom dunya

Jikrah rakyat dum sagoe be  
Tangoe u gle jiseuranta  
Abeh bandum jiyue ilu  
Geusyk waki maharaja

'Oh troh keu nan ubak doli  
Junjong jibri raja raya  
Ampon tuanku syahi alam  
Uleebalang dum ka teuka

Peue tuanku na surohan  
Peugah rijang po meukuta  
Poteu raja seuot meunoe  
Tadeungo nyoe dumna gata

Nyang lon pangge gata keu noe  
Hajat kamoe meukeurija  
Lon peukawen si nyak putroe  
Bisan lon nyoe bandum gata



Meunan narit bak sulotan  
Seuot nyoeban dum peutua  
Insya Allah he junjongan  
Nibak laman ateuh jeumala

Lheueh nibak nyan rakyat jiwoe  
Peuase droe balatantra  
Teungku kadi deungon meuntroe  
Geutueng jinoe po cut banta

'Oh sajan troh ubak kadi  
Peukayan geubri bajee dokma  
Geuboh gaca jaroe gaki  
Peureudan Ali ureueng teuka

Geusie keubeue geukhanduri  
Geunap sare jeuep kutika  
Peurasan le han soe tukri  
Teungku kadi meukeurija

Peh hareubab ngon kudangdi  
Kucapi ngon genggong Jawa  
Jitet beude peh bunyian  
Ali Peureudan geuboh gaca

Ka geupeungui ngon peukayan  
Bak badan alat mutiara  
Jaramani pudoe intan  
Di ateuh nyan kulahkama

'Oh lheueh meungui dum peukayan  
Soe nyang pandang ladat mata  
Jiek jahat nibak badan  
Meujeureulang that ie muka

Jisok ragam intat linto  
Ureueng tahe keu nan mata  
Geupeusok ngon luweue hijo  
Linto baro cidah rupa

Lheueh di sinan nibak kadi  
Lom bak wadi ngon peurdana  
Di sinanpi hana sakri  
Peh rapai ngon nukara

Bak kadi dumnan peurasan  
Bak sulotan laot raya  
Han ek peugah dum binyian  
Meunyo 'oh jan meukeurija

Geusie keubeue troh meureutoh  
Puteh leusoh geuboh gaca  
Jitet beudepi han teudo  
Rakyat kiroh dalam lua

Le peurasan nibak putroe  
Hana padoe jitet lila  
Jitet ngon dhien jeuep-jeuep sagoe  
Malam uroe hu meunyal

Tujoh uroe tujoh malam  
Meupeurasan dalam kuta  
Rakyat meusak uroe malam  
Inong agam tuha muda

Han ek peugah buet peurasan  
Maklum tuan dumna gata  
Buet peurasan teuduek 'oh nan  
Han ek teelan lon calitra

Nyoe lon peugah Cut Ariyan  
Rupajih ban bintang kala  
Geuseumanoe geucet andam  
Ban atoran aneuk raja

Sit ka maklum dumna rakan  
Han peue tuan lon calitra  
Gaca hitam jaroe gaki  
Lom bak bibi geuboh baja.

Boh ngon aneuk jaramani  
Nibak gaki gleueng meugeunta  
Peusok subang meuteurapan  
Han jeuet pandang jiplueng cahya

Mata euncien mata subang  
Blet-blot intan dum peurmata  
Ngon ie muka lang-geumilang  
Badan timang sang geuupa

Soe nyang kalon Cut Ariyan  
Le nyang pangsang punyo gila  
Si nyak putroe that analan  
Lom dendayang dara-dara

Tujuh ploh dor saban-saban  
Ngon peukayan bandum sama  
Lam meuligoe uroe malam  
Jarakjih tan siklep mata

Rupa jroh-jroh seudang-seudang  
Peungapetan putroe muda  
Teuduek 'oh noe si nyak putroe  
Po samlakoe lon calitra

Hingga trok had tujuh uroe  
Linto geupeuwoe u istana  
Intat mampleue dum sinaroe  
U meuligoe poteu raja

Buet meuampeueng han lon peugah  
Karot babah tacalitra  
Ka geupeuek banta indah  
Dumpeue sudah sianika

G  
Geuleueng tika bak duek linto  
Ateueh kaso mutu ratna  
Got meusigak dum meuato  
Meurungko ngon tireerawa

Anteng-anteng puteh hijo  
Reumboe le manek meutia  
Jibeudoh hu sang meuhambo  
Brat-breut hijo meucuaca

Peureumadani ateueh kaso  
Bak duek linto po cut banta  
Soe nyang kalon hireuen take  
Ek teusawo dalam dada

Meusapat dum uleebalang  
Sajan intan ateueh geuta  
Meuntroe-meuntroe bentara blang  
Peungapetan po cut banta

Sare asa dumna rakyat  
Yoh nyan deelat neubri basa  
Ubak guree neuisyarat  
Maklum leugat teungku ulama

Teungku cok ie neusrah babah  
Neupeunikah putroe muda  
Pohon-pohon neukheun ngon bismillah  
Alhamdulillah nyang keudua

Anfusikum 'ibadallah  
Banta indah kabui sigra  
'Oh lheueh ijab kabul nikah  
Teungku syiah baca do'a

Haba singkat ulon peugah  
Rijang sudah buet keurija  
Lheueh khanduri bri seudeukah  
Dumna syiah woe neugisa

Ka geupeuek linto baro  
Jitajo seurahi kaca  
Lheueh srah gaki bungong kundo  
Banta lalo u istana

Ka jibeudoh dum dendayang  
Seumbah rijang teuot banta  
Aneuk dara seudang-seudang  
Apet intan putroe muda

Banta neuduek ateuh tilam  
Cut Ariyan teutop muka  
Putroe cidah that analan  
Bantapi tan na saboh sa

Tamse buleuen deungon uroe  
Meunan bagoe ureueng dua  
'Oh meusapat bandua droe  
Keu deh keu noe jiplueng cahya

Soe nyang kalon mata laloe  
Nyum bek tawoe siklep mata  
Meunankeu nyum lam ate droe  
Baranggasoe ladat teuka

Miseue banta matauroe  
Miseue putroe buleuen purnama  
Dendayang na miseue bintang  
Lam kandang buleun purnama

Meusapat buleuen ngon bintang  
Meutamah trang malam jula  
Cut Ariyan putroe linteng  
Jikeureuleng ateuh banta

Ali Peureudan sang-sang neukhem  
Putroe maken jitop muka  
Teuma geupeumueng dara baro  
Khem meuhubo lam istana

Ureueng meusak nibak pinto  
Jitajo jak jingeuk banta  
Watee meunan peue tapeugah  
Maklum sudah dumna gata

Nyang ladom ureueng beurakah  
Pakri meukah kalon saja  
Dikee nyang that reuoh-reuah  
Hana leumah kueurupa

Meunankeu dum jimeusah-sah  
Bahle pantah lon peuhaba  
Jibet idang pantah-pantah  
Jaroe geusrah banta muda

Banta suleueng putroe indah  
Lhee boh babah aseksigra  
'Oh lheueh makeuen sikalian  
Pinah idang pantah sigra

Sare ase sileungkapan  
Rakyat pulang maseng tangga  
Tinggai Banta Ali Peureudam  
Teutap sinan lam istana

Sajan Putroe Cut Ariyan  
Eh tidoran sama-sama  
Sare faja beungoh uroe  
Beudoh putroe sajan banta

Cut Ariyan tren jak manoe  
Jipeugleh droe jeuep anggeeta  
Nguin gon beudak dum bee-beewan  
Ate seunang hana tara

Lheueh meusalen ngui peukayan  
Duek seumayam ateueh geuta  
Meunan sabe baranggajan  
Maklum tuan dumna gata

Teutap sinan po samlakoe  
Sajan putroe lam istana  
Ate galak hana bagoe  
Malam uroe meuseusuka

Lale ate Ali Peureudan  
Cut Ariyan leubeh suka  
That beureuhi napsu bimbang  
Got timang sang on neuraca

Rot deh buleuen rot noe bintang  
Jroh sopadan ureueng dua  
Hana kureueng leubehpi tan  
Saboh seudang saboh dara

Ate galak hana macam  
Cut Ariyan sajan banta  
Meunan sabe uroe malam  
Sikeujap han jarak tangga

Hingga lon kheun haba nyang toe  
Po samlakoe lon calitra  
Padum lawet sinan laloe  
Bak siuroe teuingat keu a

Ka teuingat keu cutda droe  
Cut Putroe Juhur Seutia  
Nibak pike po samlakoe  
Cutda droe mantong lam donya

Goh lam mate Putroe Juho  
Teusawo lam ate banta  
Yoh masa nyan bungong kundo  
Ie mata ro jamong rugha

Bak wates nyan Ali Peureudan  
Peugah rijang bak putroe muda  
Wahe judo Cut Ariyan  
Lon tuan siat kubungka

Pakon teungku neuboh nanggroe  
Po samlakoe peue kareuna  
Meunyo tuanku cre di sinoe  
Ulonteu nyoe sajan neuba

Meunan jikheun Cut Ariyan  
Ile sajan ngon ie mata  
Peureudan Ali seuot rijang  
Bek hai intan ate duka

Kon hai po cut lon boh nangroe  
Rijang keunoe ulon gisa  
Meuna tulong Tuhan sidroe  
Meugoh sampoe nyawong fana

Tinggai sinoe gata intan  
Lon tuan jak seutot cutda  
Tameulakee bek na reunggang  
Hai intan bek tajak gata

Hana teuntee uroe malam  
Rot lam hutan peukoh rimba  
Nyankeu sabab hai boh ate  
Panyot kande bek jak gata

Talekee bak Rabbon Kade  
Beumeusampe seutot cutda  
Saleh udep saleh mate  
Saleh han le di lon cutda

Banta peugah awai akhe  
Sajan ile ngon ie mata  
Cut Ariyan yoh nyan jimoe  
Sambinoe ingat keu banta

Hana meujan padum uroe  
Samlakoe ka cre di mata  
Si nyak putroe sangat gundah  
Arwah sang ka keulua

Yoh masa nyan putroe indah  
Jiseumbah bak gaki banta  
Yoh nyan jitren Cut Peureudan  
Tinggai bintang lam istana



Banta jidak bak sulotan  
Jak peugah ban pasai bungka  
Troh bak raja sujud seumbah  
Banta peugah dum peukara

'Oh lheueh idin nibak ayah  
Ubak syiah jipeuteuka  
Banta riwang ubak guree  
Jidak teuntee nyang sijahtra

'Oh troh keu deh bungong keumee  
Jilakee peunutoh dumna  
'Oh lheueh idin nibak teungku  
Bungong meulu laju bungka

Jiharap sidroe Tuhanku  
U Timu jipeunap lanja  
Bak jaroe euncien malakat  
Sajan tungkat raja naga

Jidak sidroe pirak lipat  
Nyankeu alat po jroh rupa  
'Oh leupah Ali Peureudan  
Cut Ariyan alet ie mata

Rusak ate that han macam  
Sayang intan jamong rugha  
Cut Ariyan jimoe bae  
Bungong kundo lam istana

Sabab bungka linto haro  
Tahe gante putroe muda  
Teutap putroe lam meuligoe  
Teuduek 'oh noe siat haba

Bungong asan mirah hilam  
Sret meurumpan duroh keudroe  
Si Cut Ali teutap 'oh nan  
Bukon sayang jiboh nangroe

Amma bakdu laen syahdan  
Ali Peureudan teuduek 'oh noe  
Teuduek haba Cut Ariyan  
Lon peuriwang cutda putrøe

Nyoe lon peugah Putroe Juho  
Tahe gante geunap uroe  
Jiduek jidong jimoe bae  
Ie mata ro suntok padoe

Suntok buleuen meunan sabe  
Silawet cre deungon adoe  
Ngon ia mata sret meugule  
Weueh that ate tinggai sidroe

Padum lawet lama masa  
Hingga teuma narit nyang toe  
Ngon teukeudi Tuhan Esa  
Saboh masa meunoe bagoe

Bak simalam teungeut indra  
Putroemuda leumah lumpoe  
Dalam lumpoe meunoe leumah  
Teungku syiah keu nan sampoe

Ubak potroe geujak peugah  
Meunoe ulah geuhareutoe  
Wahe aneuk bungong pade  
Bek sosah le gata putroe

Si Cut Ali goh lom mate  
Meute guble juep-juep nanggroe  
Deungon tulong Rabbon Kade  
Sit meusampe hajat sampoe

Betthat jinoe meute guble  
Dudoe akhe sit troh keu noe  
'Oh nan saja teungku peugah  
Putroe indah seungap iem droe

'Oh lheueh teungku neuseumeugah  
Gadoh syaih tinggai putroe  
Na sikeujap gadoh teungku  
Po cut meulu jaga dudoe

Ban teukeujot bak beuradu  
Beudoh meupru teuduek keudroe  
Putroe jideuk sampoh mata  
Teuingat ka nyan keu lumpoe

Ban teuingat keu rahsia  
Sret ie mata si nyak putroe  
Sira jimoe jimeupinta  
Putroe muda jileueng jaroe

Wahe Tuhan Po Nyang Esa  
Bak gata lon lakee sidroe  
Ya Ilahi Po lon Tuhan  
Cut Peureudan beutroh keu noe

Apon mata apon badan  
Lon meupandang di lon adoe  
Meunan sabe jimeulakee  
Geunap watee jileueng jaroe

Teutap meunan bungong keumee  
Teuduek dilee haba putroe  
Bahle lon kheun pantah-pantah  
Putroe indah sinoe dukhoe

Padumna trep sinan dahsyah  
Hingga meugah dalam nanggroe  
Jimeututo sibabah-babah  
Meusyeuhu gah troh bak meuntroe

Lam na iggroe nyan tan le raja  
Pusong Rawa nama nanggroe  
Raja mate saboh masa  
Aneuk hanapi meusidroe

Nyankeu meuntroe badai raja  
Mat neuraca peugang nanggroe  
Peurangui got hana tara  
Gaseh teuka barangasoe

Lompi mameh that suara  
Galak raya aneuk nanggroe  
Nyankeu sabab jeueut keu raja  
Budoe basa nibak meuntroe  
Geuseubot nan Meuntroe Adan  
Jih nyang peugang dum sinaroe  
Rupa hibat that analan  
Hana lawan barangasoe

Umu baro muda seudang  
Meuntroe Adan that samlakoe  
Bak masa nyan bungong kundo  
Goh na judo teuku mentroe

Jideungo gah gro궇 meututo  
Putroe Juho dalam manggroe  
Meuntroe deungo got that rupa  
Putroe teuka laen nanggroe

Putroe hanyot lam ie raya  
Meunan haba dum lam nanggroe  
Ka geucok le Cutti Male  
Ie peule dalam sungoe

Meuntroe yoh nyan ka teupike  
Dalam ate sang teugoe-goe  
Han ek jitheun sabe-sabe  
Jiheudoh le jijak sidroe

Troh le u leuen beungong pade  
Cutti Male di seuramoe  
Yoh masa nyan Cutti Male  
Neumeuhei le po samlakoe

Taek keun noe intan buleuen  
Bungong supeueng pane tawoe  
Ban jideungo meunan geukheun  
Meuntroe timpeueng u seuromoe

Cutti Male neuleueng tika  
Hak bentara piyoh sinoe  
Meuntroe jiduek keu nan sigra  
Ureueng tuha kheun bak putroe

Tacok ranup takoh tangke  
Boh lam batee peutren keu noe  
Si nyak putroe jicok batee  
Jipasoe le dum sinaroe

Jeumuju ngon bungong lawang  
Sikalian dum jirampoe  
Pasoe ranup keunong ragam  
Jiboh sajan bakong asoe

Sare ase pasoe puan  
Peutren rijang u seuramoe  
Troh seuramoe putroe intan  
Seumbah rijang teuot meuntroe

Sajan jajok ranup bate  
Bungong pade jiduek bak sagoe  
Yoh nyan meuntroe ka teupike  
Jimeurawe le that bagoe

Nibak jaroe teutap bate  
Meuntroe han le jitupeue droe  
Han jitupeue pajoh ranup  
Meuntroe teuduek tahe keudroe

Teubiet nafah seun-seun bacut  
Tarek ngon pruet sang-sang ka troe  
Sabab jingieng Putroe Juho  
Meuntroe tahe mata laloe

Puleh nubak hireuen tahe  
Meunoe tuto teuku meuntroe  
Allah Allah ma meutuah  
Nyang troh langkah ulon keu noe

Tuboh saket ate gundah  
Pat tailah ubat jinoo  
Cutti Male seuto leugat  
Pirak lipat deungo kamoo

Meuna saket nakeu ubat  
Asai meupat meuri sagoo  
Seuto meuntroe meunoe kalam  
Hai ma badan tahareutoe

Adat ureueng saket badan  
Tapeugah ban ubat jinoo  
Lom neuseuto ureueng tuha  
Deungo maha wahe meuntroe

Meunyo saket tuboh gata  
Ie peunawa boh bak asoo  
Meunyo saket nibak ate  
Sit puleh le meunoe bagoo

Saket ate ubat ate  
Siat ase nekmat sampoo  
Soe nyang deungo Cutti Male  
Ek teupike barangasoo

Sang bangon pheut teuuke  
Meunan mise ureueng dua droe  
Tuto meuntroe saboh mise  
Cutti Male saboh bagoo

Jimeuteuoh sabe-sabe  
Ujong akhe sret keu putroe  
Teuku meuntroe saboh utoh  
Tuto bayoh meunoe bagoo

Di leuen rumoh saboh lampoh  
Bah lon boh tanaman jinoe  
Hajat hai ma lon seumula  
Dum sigala ayeuem jaroe

Saleh timoh bijeh mula  
Khen le gata hai ma jinoe  
Cutti Male neukheun nyoeban  
Hai intan bak penyum lon nyoe

Meuka talhom bijeh bawang  
Ujeuen datang timoh keudroe  
Meunan neukheun Cutti Male  
Mangat ate teuku meuntroe

Jimeuteuoh sabe-sabe  
Hingga akhe seupot uroe  
Abeh tuto seungap kalam  
Meuntroe Adan jilakee droe

'Oh han ek le geupoh rantam  
Jitren rijang teuku meuntroe  
Cutti Male teuduek 'oh nan  
Meuntroe Adan lon hareutoe

Teuku meuntroe woe u leupu  
Lheueh pajoh bu tarek asoe  
Dalam ate sangat rindu  
Eh beuradeu dalam meuligoe

Singoh beungoh pagi hari  
Macut Haji jihei sidroe  
Troh le keu nan geupeureugi  
Meuntroe kehun kri meunoe bagoe

Taja ubak Cutti Male  
Tajak langke si nyak putroe  
Meuntroe peugah awai akhe  
Geubeudoh le geujak sidroe

Geujak laju Macut Haji  
Geuili keu deh troh sampoe  
'Oh troh keu deh geupeureugi  
Geutiti laju seuramoe

Cutti Male geujok tika  
Piyoh cutda laju keu noe  
Pajoh ranup sinan dua  
Sabe tuha han le gigoe

Macut Haji phon seumeugah  
Insya Allah wahe adoe  
Ulonteu nyoe nyang troh langkah  
Suroh titah nibak meuntroe

Neumeunapsu puteh licen  
Bungong sunteng ayeuem jaroe  
Hajat meuntroe neumeukawen  
Kon peue laen pakri jinoe

Cutti Male seuo leugat  
Sit patot that nibak kamoe  
Akan teutapi taprah siat  
Musyawarat dilee ngon droe

Cutti Male meuhei rijang  
Aneuk badan tatren keu noe  
Teuma jitren putroe intan  
Jiduek sajan deungon ma droe

Cutti Male tanyong sigra  
Bijeh mata deungo lon nyoe  
Lon peukawen jinoe gata  
Meusyen bunda hai sambinoe

Deungon banta nyang budiman  
Meuntroe Adan raja nanggroe  
Hajat ulon cit han jeuet han  
Ate bimbang bundateu nyoe



Beumeusampe lon peutimang  
Putroe intan meusyen lon nyoe  
Nyankeu aneuk lon peuhaba  
Nibak gata pakri jinoe

Meunan neukheun ureueng tuha  
Po jroh rupa seuo meunoe  
Putroe jikheun insya Allah  
Han peue salah nibak lon nyoe

Narit gata ma meutuah  
Sit lon keubah lam ate droe  
Cit patot that neupeukawen  
Hana laen ma di kamoe

Meunyo ka sep bak tabandeng  
Tuto bareng ulon kheun nyoe  
Pakri hai ma tameubisan  
Meuntroe Adan raja nanggaroe

Bak lon pike sang han reumbang  
Han sipadan ngon geutanyoe  
Lagi ulon ureueng tuka  
Pakri raja tueng keu lakoe

Deungon bangsa hina dina  
Hana guna lon hareutoe  
Allah Allah wahe bunda  
Pakon gata han thee keudroe

Tan tapike ateueh kada  
Pakon hai ma buta tuloe  
Meunan jikheun Putroe Juho  
Ka tahe ureueng dua droe

Cutti Male lom meututo  
Bungong kundo aneuk putroe  
Keupeue aneuk panyang haba  
Hana guna hai sambinoe

Lon tanyong narit sibeuna  
Sikrak saja bri keu kamoe  
Harap ulon bijeh mata  
Bek meudawa ngon mateu nyoe

Beumeusampe lon peulara  
Lon cok gata dalam sungoe  
Meunan neukheun Cutti Male  
Bungong pade seut meunoe

Meunyo maunan ma boh ate  
Ulon pike siat jinoo  
Lon meutanggoh hai ma sikarang  
Cut Peureudan dang troh keu noe

Lon preh teuka Ali Peureudan  
Di lon bimbang that keu adoe  
Han jeuet hai ma lon meuteuoh  
Sangat reuloh ate lon nyoe

Yoh jikheun nyan putroe muda  
Sret ie mata meuteutaloe  
Cutti Male lom pareksa  
Bijeh mata tahareutoe

Padum na trep aneuk badan  
Tangohteu nyan padum uroe  
Lom jiseuot putroe intan  
Hana meujan nibak lon nyoe

Hana teuntee siploh buleuen  
Han lon jeuet kheun siploh uroe  
Si nyak putroe meunan jikheun  
Maken hireuen ureueng dua droe

Ureueng dua yoh nyan tahe  
Putroe Juhur lom kheun meunoe  
Keupeue hai ma panyang tuto  
Bahle bek le lon hareutoe

Jinoe lon kheun sikrak saja  
Hana guna meudeh meunoe  
Meunyo hana troh adekda  
Beuthat bek na di lon lakoe

Meunyo napsu buet beurijang  
Ali Peureudan seutot keu noe  
Meunyo hana Cut Peureudan  
Hareuem badam lon keu lakoe

Si nyak putroe jimeusumpah  
Teuhah babah bandua droe  
Ureueng dua yoh nyan meusah  
That meutuah si aneuk nyoe

Meunyo hana troh syeedara  
Beuthat hana di jih lakoe  
Nyankeu aneuk nyang seutia  
Laen hana meunoe bagoe

Meunan-meunan geumeuteuoh  
Di phon bungoh troh cot uroe  
Ureueng dua ate reuloh  
Han ek satoh si nyak putroe

'Oh han ek le geupoh cakri  
Macut Haji geutren geuwoe  
Troh bak meuntroe Macut Haji  
Neupeugah kri narit putroe

Wahe meuntroe uleebalang  
Putroe intan lakee adoe  
Meunyo hana Cut Peureudan  
Hareuem badanjih keu lakoe

Meunan jikheun Putroe Juho  
Nyankeu tutojih nyang tanggoe  
Meunyo napsu tueng keu gata  
Beudoh sigra seutot adoe

Meunyo hana si cut banta  
Apon asa gata meuntroe  
'Oh tapeuwoe Si Cut Ali  
Peutroh janji deungon putroe

Meuhan meunan hana sakri  
Bek poh cakri geunap uroe  
Meunan narit bak teulangke  
Ka teupike po samlakoe

Lheueh geupeugah awai akhe  
Teungku langke laju geuwoe  
Macut Haji geuwoe rijang  
Tinggai sinan teunku meuntroe

Yoh masa nyan Meuntroe Adan  
Geuhei rijang geusyik sagoe  
Troh le keu nan dum meusapat  
Bri hroeumat teungku meuntroe

Meuntroe Adan marit leugat  
Jitueng pakat bak sinaroe  
Nyang lon pangge dumna gata  
Lon meuhawa si nyak putroe

Hajat meukawen putroe teuka  
Nibak gata pakri jinoe  
Dum peutua seot pantah  
Insya Allah tuanku droe

Cit patot that hai khalifah  
Seuon titah bandum kamoe  
Meunyo meunan dumna gata  
Jak usaha siat jinoe

Peureudan Ali tajak mita  
Peuwoe sira laju keu noe  
Meuntroe peugah awai akhe  
Jibeudoh le dum sinaroe

Peuet ploh ureueng jijak lam gle  
Meute guble jeuep-jeuep nanggroe  
Ladom u Timu ladom u Barat  
Jipeuteupat maseng sagoe

Jijak mita pirak lipat  
Jitanyong pat na meubunyoe  
Leupah ureueng jak beurangkat  
'Oh nan teutap nyang haba nyoe

Haba meuntroe teuduek siat  
Lon riwayat laen jinoo  
Teuduek 'oh nan saboh ato  
Laenpi le deungokeu nyoe

Amma bakdu teuma dudoe  
Roh bak sagoe wahe rakan  
Kon lon saja wahe adoe  
Ka roh keudroe bak lon reusam

Proekeu sabab hai boh ate  
Hantroh pike ulon tuan  
Lagiulon sosah ate  
Jimeurawe uroe malam

Adat salah bacut sapat  
Bek teupat lon hai rakan  
Ulon baro lon seumurat  
Goh lom cakap bak keumarang

Lah bak pihak jaroe cabak  
Miseue budak mantong seudang  
Baro jeuet duek goh lom jeuet jak  
Jimeukheundak mat seunapang

Cuba pike wahe nyak cut  
Troh meukeusud meunoe macam  
Pihak napsu dalam pueued  
Jitem peubuet dum sibarang

Nyankeu sabab nyak meutuah  
Tapeumeuah sikalian  
Nyang na rancak cit meubabah  
Allah Allah bukon alang

Astagfirullahal 'azim  
Rabbon Karim ampon hamba  
Tameuucap wahe sahat  
Beutateebat nibak Tuhan

Beuthat hai nyak kheun hikayat  
Ubak teebat beutariwang  
Uroe malam beutateebat  
Ingat beuthat wasiet abang

Jeuetkeu domnoe wahe sahat  
Bek panyang that jeuet keu wayang  
Teuduek 'oh nan haba kamoe  
Laen jinoe ulon karang

Nyoe lon kisah saboh nanggroe  
Deungon asoe sikalian  
Nama nanggroe Anta Ladeh  
Raja Syareh nyang sulotan

Nyangkeu bangsa mata puteh  
Kaphe paleh sitree Tuhan  
Deungon badan raya-raya  
Dum sigala simban-simban

Musoh Tuhan Po Nyang Esa  
Seumbah beurala uroe malam  
Nyankeu bangsa biek meureuka  
That ceulaka aneuk jalang

Muka mirah ban aneuk saga  
Nyankeu bangsa nyang that suang  
Raja Syareh nyang keupala  
Dua blah raja taklok keunan

Bak siuroe si ceulaka  
Jingo haba gop peugah ban  
Jideungo gah puteh licen  
Ka meukawen Cut Ariyan

Kon ngon raja geupeukawen  
Nanggroe laen ureueng datang  
Sidroe ureueng keu nan teuka  
Biek si Kamba jak meu dagang

Hana geutueng saba bangsa  
Raja-raja uleebalang  
Meunan jingo bak gop peugah  
Teuka marah aneuk jalang

Dalam ate beungeh leupah  
Muka mirah jiek biram  
Bak masa nyan lam meusapat  
Raja deelat jimeukalam

Wahe meuntroe takrah rakyat  
Ngon sit keu noe beurijang  
Tayue jitren beujinoe le  
Dum sigala be uleebalang

Ngon alat prang dum beuase  
Tumbak beude sikin panyang  
Bandum beutroh singoh uroe  
Takheun kamoe peubeudoh prang

Adil Parisi kuprang jinoe  
Bak siseun nyoe han kupantang  
Hana patot buetjih meunoe  
Bit raja nyoe akai kurang

Tueng meulintee barangasoe  
Lakoe Putroe Cut Ariyan  
Bek antara ureueng meusoe  
Gampong nanggroe tatupat tan

Meunan jikheun Raja Syareh  
Ate peudeh that han macam  
Bujang cok gong nibak binteh  
Jiplueng keu deh laju curam

Yoh nyan bujang jimeulangkah  
Jak keumeurah sigala alam  
Jeuep-jeuep gampong jijak peugah  
Suroh titah bak sulotan

Hingga lon kheun haba nyang toe  
Ureueung nanggroe jitren curam  
Uleebalang dun sinaroe  
Imum nanggroe bentara blang

Tunong Baroh Timu Barat  
Dumna rakyat abeh datang  
Dum pahlawan kuat-kuat  
Ek jime brat siploh kuyan

Sira jijak jipeh mongmong  
Urueung tunong jak meukawan  
Meupeurasan han peue tanyong  
Got that keunong dum bunyian

Abeh jitren dumna rakyat  
Meusapat baik kuta dalam  
'Oh troh keu nan ka meusapat  
Jideelat ampon jeunulang

Ampon tuanku raja nanggroe  
Dumna kamoe abeh datang  
Dum peutua abeh keu noe  
Peue buet jinoe neusurohan

Meunan tanyong dum peutua  
Turon sabda bak sulotan  
Nyang lon pangge dumna gata  
Saboh raja hajat lon prang



Adil Parisi di Palistina  
Buetgeu hana ateueh reumbang  
Geuboh adat raja-raja  
Geucok kada nyang sibarang

Meunan jikheun uleh raja  
Seuot lanja uleebalang  
Ampon tuanku ateueh patot  
Kamoe turot sikalian

Pajan tuanku neubeurangkat  
Peugah leugat he sulotan  
Meuka ase cukop alat  
Jinoe meuhad lon jeumeurang

Lom jiseuot dum peutua  
Bak kamoe hana le lintangan  
Dumna kamoe sit ase ka  
Dum sigalargon alat prang

Raja deungo meunan haba  
Ikat ija dum peureuban  
Lheueh peureuban dum sigala  
Beudoh sigra peh ngon geundrang

Geucok langkah poteu raja  
Sireuta bandum pahlawan  
Raja Syareh jibeurangkat  
Dumna rakyat ireng sajan

Tumbak beude han ek hisab  
Cukip alat peukakah prang  
Sira jijak jihei sare  
Dumna kaphe sangat girang

Bandum rakyat galak ate  
Rot dalam gle jisrang-abrang  
Jareueng-jareueng jitet beude  
Suntok sabe meupeurasan

Padum lawet jiarong gle  
Hingga troh le bineh padang  
Bak ujong nanggroe Palistina  
Ka troh teuka dum angkatan

'Oh troh keu nan dumna tantra  
Peugot sigra ngon bantayan  
Maseng-maseng peudong kimah  
Maseng syeekeh ban atoran

Jitarek ngon alam mirah  
That barollah ka peunoh blang  
Sare ase cukup teupat  
Peugot leugat surat kireman

Lheueh jisurat teuma jilipat  
Geuyue intat bak utosan  
Saboh meuntroe nyang me surat  
Jibeurangkat sajan rakan

Na padum droe seutot rakyat  
Jijak leugat keu deh curam  
Padum na trep jicre teupat  
Troh leugat bak kuta dalam

'Oh troh keu deh tamong sigra  
Ngadap raja syahi alam  
Lheueh jiseumbah puteu raja  
Surat haba jijok rijang

Poteu raja sambot surat  
Neuploh lipat ka neupandang  
Meunoe haba dalam surat  
Ngo he sahbat phon mulaan

Seumbah sujud sireuta takzim  
Peutakeurim lon kheun saja  
Keu bawah kidam ampon dili  
Adil Parisi meukuta alam

Surat nibak Raja Syareh  
Anta Ladeh teupnat makam  
Lon meunanpsu bungong puteh  
Sabab sideh keu noe datang

Kucre gampong deungon teupnat  
Nyang lon hajat bungong rihan  
Meunyo napsu keu seulamat  
Intat leugat Cut Ariyan

Bek kutamong dalam nanggroe  
Roh meupaloe dumna urang  
Lon takot leupah buet jaroe  
Pike jinoe pakri reumbang

Dua uroe kupreh tanggoh  
Meuhana troh nanggroe kuprang  
Nang got bak lon tuanku beh  
Meuh seunupoh bek tatahan

Tajok keu noe si nyak putroe  
Nak lon jak woe ubak makam  
Pakon tabri keu barangsoe  
Si nyak Putroe Cut Ariyan

Kamoe laen dum sineuna  
Bak gata hana sigupang  
Taboh adat raja-raja  
Tacok kada nyang sibarang

Pakon meunan cut di gata  
Sang beulga meunan macam  
Meuhan tabri si nyak putroe  
Ingat keudroe hai sulotan

Kupoh mate dum lam nanggroe  
Kutueng putroe gata kucang  
Nyangkeu narit lon nyang tanggoe  
Pike jinoe toh nyang reumbang

Ka lon peugah laba rugoe  
Bek meupaloe akhe datang  
Nyanggot pike bek panyang that  
Intat leugat Cut Ariyen

Meunan jiboh dalam surat  
Raja deelat muka masam  
Leungo badan sang meutat-tat  
Yoh nyan surat neupriek rijang

Sireuta ngon neukheun meunoe  
Beudoh jak woe hai utosan  
Kayue jiprang laju keu noe  
Singoh uroe beutroh datang

Bek jipike meujih raja  
Laen hana ureueng agam  
Nyoepi saboh biek meubaka  
Bek jisangka kon keulantan

Beudoh laju keu deh jak woe  
Bek kutasoe nyawong simpan  
Utosan meunyum teumakot  
U likot laju jiriwang

Dalam ate that meupot-pot  
Jisurot jiwoe u padang  
Teuduek haba utusan woe  
Raja nanggroe neumeukalam

Wahe bujang jak lam nanggroe  
Yue tren keu noe dumna urang  
Kayue jime tumbak beude  
Uroe nyoe le jitren curam

Dum alat prang dum beuase  
Bek taduek le beudoh rijang  
Yoh nyan bujang beudoh meupru  
Plueng meu'u-u teuploh pinggan

Jeuep-jeuep gampong jijak bri su  
Tuanku suroh u dalam  
Bujang peugah musoh teuka  
Le that tantra dum angkatan

Jimeung tawan putroe muda  
Poteu raja jikeumeung prang  
Hingga teuma haba nyang rab  
Ulun rapat mangat rijang

Abeh jitren dumna rakyat  
Meusapat baik kuta dalam  
Dumna alat cit ka ase  
Tumbak beude peudeung sajan

'Oh troh keu nan hana pike  
Jirok beude dum sinapang  
Yoh masa nyan raja doli  
Hukom geubri teubiet u blang

Ka meusapat dum sipai  
Jiantri teudong meureuntang  
Teupat banja dum meuato  
Meujudo-judo maseng kawan

Ngon peukayan hijo-hijo  
Nibak baho dum sinapang  
Cukop alat dum sinaroe  
Ureueng nanggroe geulawan prang

Teutap meunan ureueng nanggroe  
Lon kheun jinoe musoh datang  
Nyoe lon peugah utosan woe  
Ka troh sampoe ubak makam

'Oh troh keu deh teuku meuntroe  
Jibet jaroe bak sulotan  
Meuntroe peugah laju-laju  
Peuek ngadu meunoe macam

Ampon tuanku sit meupatot  
Geupeusambot Cut Ariyan  
Geuyue langkah keu deh beutrok  
Sit geumeung jok bungong rihan

Akan teutapi nyang na bacut  
Nyang meukeusud lon peugah ban  
Surat geupriek deungon geutet  
Kamoe geudhot geulakee cang

Adat kon bagah ulon surot  
Bandum lupot nyawong hilang  
Bek neusangka Adil Parisi  
Tan geuturi laen urang

Bandum kamoe geumeung tadi  
Meuplueng lari keu noe u blang  
Ban jideungo meuntroe peugah  
Muka mirah aneuk jalang

Raja Syareh beungeh leupah  
Jikheun pantah bak angkatan  
Wahe rakyat bek le pike  
Pasang beude ngon sinapang

Dumna rakyat jibeudoh le  
Jirok beude rijang-rijang  
Saboh meuntroe nyang that ahli  
Sit geuturei dalam makam

Geurasi nan Meuntroe Sakdi  
That beurani bak jimeuprang  
Raja Syareh jikheun meunoe  
Ubak meuntroe nyang pilehan

Beudoh laju wahe meuntroe  
Bak siseun nyoe gata urem  
Hingga taume haba nyang rab  
Beudoh rakyat meuntroe sajan

Ladom beusoe jimeutungkat  
Ladom alat sikin panyang  
Jipeubeude na dum tupheuen  
Sang-sang ujeuen kiroh alam

Ureueng nanggropi han meupeue kheun  
Leu'am-leu'um lheueh meuriam  
Rot noe beude rot deh beude  
Sang-sang reule geulanggang prang

Surak deumpek jihei sare  
Asap beude seupot alam  
Nanggroe Palistina sang-sang teulet  
That klam-kabot su meuriem

Dum pahlawan jimeugrop-grop  
Kalang-kalot han soe tuban  
Asep beude that meukalot  
Nanggroe seupot sang ka malam

Jimeupoh-poh leubab-leubob  
Patah teuot keunong parang  
Jipeuek prang got that rapat  
Hana siat jarak reunggang

Rot deh rot noe prang jikarat  
Hana lukat that gurantam  
Meunan sabe geunap uroe  
Teuduek 'oh noe ureueng di blang

Ureueng meuprang teutap sinoe  
Laen jinoe lon peuriwang  
Amma bakdu keu deh meuriwang  
Banta seudang lon calitra

Nyoe lon peugah Ali Peureudan  
Jisrang-abrang dalam rimba  
Si Cut Ali han le pike  
Jiarong gle suntok masa

Uroe malam jijak sabe  
Panyot kande seutot cutda  
Timu Barat Baroh Tunong  
Dum jitamong jeuep-jeuep kualala

Jeuep simpang krueng banta tamong  
Jeuep-jeuep seunong dalam bangka  
Abek jijak Tunong Baroh  
Meuh seuneupoh jak meumita

Jeuep-jeuep panton jeuep-jeuep paloh  
Abek jibloh jeuep-jeuep paya  
Bu sianeuk tan jipajoh  
Pijuet tuboh pucat muka

Bukon sayang meuh seuneupoh  
Cut banta beh seutot cutda  
Padumna trep peukoh aroh  
Jinoe ka troh u Pusong Rawa

Troh lam nanggroe banta seudang  
Tren u peukan tamong banda  
Jimita rot deungon jalan  
Cut intan mita rahsia

Banta deungo gop meututo  
Putroe Juhur ureueng teuka  
Pura-pura tahe gante  
Bungong kundo le bicara

Gop meututo seun-seun siat  
Jipeusapat jeuep-jeuep banja  
Keu deh keu noe sidek sasat  
Hingga meupat rumoh cutda

Sare teuntee meuri rumoh  
Buleuen peunoh tamong lanja  
Po Cut Ali tamong laju  
U leupu jipeurab sigra



Troh u rumoh bungong meulu  
Beudoh meupru putroe muda  
Ban jikalon Putroe Juho  
Jitajo sigo bandua

Rot noe tajo rot deh tajo  
Ie mata ro han teukira  
Jimeucom-com jimeumoe-moe  
Rot deh rot noe jampong rugha

Cutti Male saboh bagoe  
Peue bala nyoe hai aneukda  
Putroe Juhur tan padoli  
Cut Ali laju jiwa-wa

Allah hai adoe Peureudan Ali  
Peutang pagi lam kucinta  
Bak lon sangka cit hana le  
Ka mate lam ie raya

Lam kuteuoh suntok sabe  
Reuloh ate lon adekda  
Allah Allah hai boh ate  
Bak lon pike tinggai cuta

Tulong Tuhan Rabbon Kade  
Ka meusampe lon ngieng mata  
Rot deh geumoe rot noe riyoh  
Allah hai beh sayang raya

Si Cut Ali teuma meubayoh  
Bek le kiroh wahe cutda  
Si nyak putroe moe meu'u-'u  
Han jeuet jieu ateueh banta

Putroe Juhur sayang taeu  
Gadoh ngon su keumong mata  
Cutti male nibak dapu  
Neupeulaku dum peukara

Siblah dapu neutaguen bu  
Siblah dapu reundang Jawa  
Bupi masak rijang-rijang  
Paseo idang urueng tuha

Sare ase sileungkapan  
Beuet rijang keu naeukda  
Si Cut Ali jisrah tangan  
Sireuta ngon Cut Seutia

Putroe Juhur makeuen sajan  
Duek sipangan sapat dua  
'Oh lheueh makeuen pinah idang  
Sayang bokbang ureueng tuha

Nyang ranup sit ka lam puan  
Makeuen intan ngon syeedara  
Pajoh ranup baro bicah  
Yoh nyan geupeugah dum peukara

Rot noe peugah rot deh peugah  
Maklum sudah adoe ngon a  
Dum jipeugah awai akhe  
Baten lahe jeuep-jeuep punca

Teutap sinan bungong pade  
Cutti Male lon peuhaba  
'Oh lheueh bri bu banta seudang  
Neutren rijang ureueng tuha

Neujak ubak Meuntroe Adan  
Jak peugah ban meunoe haba  
Ali Peureudan ka troh jiwoe  
Adoe putroe nyang Seutia

Ban jideungo uleh meuntroe  
Ureueng nanggroe jiseuranta  
Troh le keu nan geusyik waki  
Bujang tandi maharaja

'Oh troh keu nan dum jiili  
Hukim jibri maseng jeumba  
Jiyue ikat ngon pupalang  
Got meureuntang ban seulingka

Ladom peugot ngon bantayan  
Ureueng datang han teukira  
Maseng pangkat maseng babat  
Ban nyang adat ateueh kada

Bandum ureueng sit meupakat  
Deungon siat sit ase ka  
Meuntroe meuhei Macut Haji  
Datang keu mari keu noe gata

Troh le keu nan geupeureugi  
Meuntroe kheun kri dum peukara  
Yoh masa nyan Macut Haji  
Ka neuili keu deh lanja

'Oh troh keu deh neupeureugi  
Han tatukri bak meuhaba  
Duek meusapat Cutti Male  
Panyot kande ngon syeedara

Macut Haji neumarit le  
Cutti Male dampeng haba  
Teuku langke neuboh seupah  
Insya Allah phon neumula

Ulonteu nyoe nyang troh langkah  
Lon jak peusah janji nyang ka  
Janji deungon putroe indah  
Maklum sudah ubak gata

Nyankeu sabab ulon keunoe  
Suroh bunoe meuntroe raja  
Geuyue teuntee dum sinaroe  
Hajat kamoe sit beusigra

Lompi meuntro yue tanyong ban  
Peue na alang lintang mara  
Walee hana jeuet lintangan  
Tapeugah ban lon jak gisa

Po Cut Ali seuot meunoe  
Bak kamoe eteueh jeumala  
Saboh nibak teuku meuntroe  
Siploh sinoe nibak hamba

Allah ka na geutem peusayang  
Adat han sang la bala-bala  
Geutem tueng le Meuntfoe Adan  
Kamoe dagang ureueng hina

Teuku teulangke lom peuteuntee  
Bungong keumee kheun beusigra  
Padum di peuha nyan jeunamee  
Nak lon bri thee ubak raja

Lom jiseuot Ali Peureudan  
Hai ma badan deungo hamba  
Ban nyang napsu Meuntro Adan  
Bak lon tuan tan meuhingga

Ban geudeungo haba meunan  
Seungap kalam han le haba  
Yoh nyan teulangke geutren curam  
Geuwoe rijang ubak raja

Geujak peugah ubak meuntroe  
Dum sinaroe geucalitra  
Hingga teuma haba nyang toe  
Yoh nyan meuntroe phon keurija

Geubri hukom ureueng nanggroe  
Dum sinaroe maseng jeumba  
Mupeurasan tujuh uroe  
Geutueng putroe u istana

Geusie keubeue geukhanduri  
Dumna faki ngon ulama  
Teubiet tamong ulee ili  
Ureueng bangki galak raya

Tet ngon beude peh rapai  
Han tatukri peucalitra  
Buet peurasan han lon peugah  
Tan faidah lon calitra

Nyang na saja kuweut babah  
Maklum sudah dum syeedara  
Dalam kuta kacah-kacoh  
Tunong Baroh ureueng teuka

Geutet beude meugeureupoh  
Meuh seuneupoh geuboh gaca  
Ban atoran putroe geutueng  
Po cut meugleueng ureueng teuka

Galak ate bandum ureueng  
Got that bangon geupeumulia  
Na ban lagee sigak bangon  
That meukeunong meukeurija

Rakyat le that agam inong  
Teubiet tamong dalam kuta  
Tujoh uroe tujuh malam  
Sikeujap tan nyang na reuda

Ngon su beude geumpa alam  
Dum bunyian meusuara  
Uroe malam hana teudoh  
Got that kiroh dalam kuta

Han soe tukri kacah-kacoh  
Han jeuet lon boh lam calitra  
Bahle lon kheun haba nyang toe  
Rijang sampoe buet keurija

'Oh sare troh tujoh uroe  
Linto geupeuwoe u istana  
Peuk linto u rumoh inong  
Got meukeunong meusapat dua

Soe nyang kalon seunang bingong  
Sabab keunong that bak rupa  
Agam keunong inong keunong  
Sang-sang bangon pura-pura

Putroe cidah agam linteng  
Jiduek sapeng kon le gura  
Rot deh rot noe meukeureuleng  
Han peue po lem lon peuhaba

Buet seumeumah han lon peugah  
Kuweut babah tacalitra  
Agam inong maklum sudah  
Keu peue lon peugah hana guna

Teuma geubet le ngon idang  
Makeuen sajan rakyat dumna  
'Oh lheueh makeuen pinah idang  
Lon kheun rijang malam jula

Hikayat nyoe lon peurijang  
Bek that girang ureueng baca  
Sare ase sikalian  
Jitren rijang rakyat dumna

Ureueng gampong jilakee droe  
Maseng jiwoe dum u tangga  
Abeh jitren dum sinaroe  
Tinggai putroe deungon raja

Peulen panyot rijang-rijang  
Eh tidoran pura-pura  
Putroe Juhur kana kalam  
Meuntroe Adan sali 'ala

Teutap sinan lam keuleumbu  
Eh beuradu sama-sama  
Kukuek manok puteh Timu  
Beudoh meupru ureueng dua

Awai suboh tren jak manoe  
Beungoh uroe adee ija  
Lheueh meusalen bandua droe  
U meuligoe duek sibanja

Lam meuligoe han peue peugah  
Ase sudah sianika  
Dum makanan indah-indah  
Dendayang keubah sajan ie kahwa

Si nyak putroe makeuen laju  
Sajan teungku meuntroe raja  
Sit ka maklum teungku-teungku  
Pisang susu sajan dua

Meunan sabe geunap uroe  
Si nyak putroe are suka  
Si Cut Ali saboh meuligoe  
'Oh uroe sajan syeedara

Galak ate hana bagoe  
Si nyak putroe ngon adekda  
Teutap sinan bandua droe  
Sajan meuntroe lhee sireuta

Amma bakdu teuma keumudian  
Teuduek 'oh nan siat haba  
Teuduek siat muda seudang  
Lon peuriwang ureueng bungka

Nyang ka leupah yoh saboh roe  
Suroh meuntroe jak meumita  
Geuyue mita po samlakoe  
Goh lom sampoe troh u tangga

Dua ureueng nyang goh lom woe  
Laen sinaroe abeh gisa  
Jijak mita Peureudan Ali  
Jipeureugi jeuep-jeuep banda

Uroe malam ulee ili  
Tan beureunti beungoh sinja  
Abeh sigampong tamong sigampong  
Sret bak ujong nanggroe raya

Jikalon prang that meukeupong  
Meusong-abong lam blang raya  
Jingo bunyoe bak lakuan  
Cut Ariyan jikeumeung ba

Nyankeu judo Ali Peureudan  
Meunan macam gop peuhaba  
Ban jideungo meunan bagoe  
Jiplueng jiwoe pantah sigra

Troh u gampong laju jiwoe  
Jingo bunyoe ka woe banta  
Ubak meuntroe sit jipeutroh  
Meuh seuneupoh sinan sireura

Ka jibet le jaroe siploh  
Tuanku beh lon meuhaba  
Nanggroe Palistina raya that prang  
Le angkatan musoh teuka

Raja Syareh sangat girang  
Cut Ariyan jikeumeung ba  
Si Cut Ali sinan sajan  
Leungo badan miseue geumpa

Jiek seudong lagee biram  
Matajih sang meugisa-gisa  
Yoh nyan banta jilakee droe  
Idin lon nyoe hai kakanda



Beungeh meuntroe seuot meunoe  
Pakon adoe lon han taba  
Pakri gata tajak bak prang  
Meuntroe Adan peue tasangka

Meuhan kujeuet theun geudubang  
Han kupandang cutda gata  
Ulon di nap gata di likot  
Meunan patot hai adekda

Meunyo bak prang han kusurot  
Meugoh lupot nyawong fana  
Meunan jikheun Meuntroe Adan  
Seungap kalam si cut banta

Putroe Juhurpi di sinan  
Jikheun nyoeban bak syeedara  
Udep sare mate sajan  
Hai peureudan ngon kakanda

Si Cut Ali han le kalam  
Adat jeuet sang jiteureupa  
Teuku meuntroe kheun bak bujang  
Pangge rijang rakyat dumna

Tayue jime ngon alat prang  
Angkatan cukop beurata  
Tapeugah lon jak bantu prang  
Sikarang jinoe beusigra

Yoh nyan bujang jibeudoh le  
Yue peuase balatantra  
Dengon siat keu non troh le  
Han peue pike tajam raya

Sikin panyang tumbak beude  
Bandum sare sama rata  
Ka meusapat dum sigala be  
Cukop ase sianika

Limong ploh droe nyang pahlawan  
That pilehan nibak nyang na  
Nyankeu ureueng panglima prang  
Hana lawan that peurkasa

Cukop alat dum bak asoe  
Jiikat droe simplah dada  
Seuon di ulee keutupong beusoe  
Bansinaroe nyang peutua

Balot gateh dum peureuban  
'Oh tapandang hibat raya  
Tumbak leumbeng cit ka sajan  
Han jeuet tuan lon calitra

Nibak keuieng jilhat peudeueng  
Sare kingkeueng taeu rupa  
Hana laen meunan ureueng  
Aneuk bajeueng rampak raya

Abeh meusapat dumna sudah  
Geucok langkah meuntroe raja  
Sireuta ngon banta indah  
Sajan syeekeh balatantra

Yoh masa nyan Peureudan Ali  
Hukom jibri bak sineuna  
Jipeurunoe dum sipai  
Wahe meuntri deungo hamba

Nyoe amanat tuanku beh  
Deungo beutroh kheun adekda  
Dum geutanyoe jak prang musoh  
Ate sunggo bek syok sangka

Bahle rot uteuen keu deh tabloh  
Beuthat jeuh keu deh talingka  
Beuroh rot likot nyan tapagap  
Prang takarat talet lingka

Meukon meunan hana cakup  
Musoh le that han ek sangga  
Barangpeue buet dengon ilah  
Miseue gajah ta peufana

Gajah beumate kayee bak patah  
Meunan nyang sah bek bicara  
Meunan jikheun po samlakoe  
Bak sinaroe jibri basa

Cit meupakat deungon meuntroe  
Sabet adoe ban kheun gata  
Meunan-meunan dum jipeugah  
Banta indah bijaksana

Sira geujak pantah-pantah  
Dum jipeugah akai bicara  
Teutap banta teungoh jeumeurang  
Meuntro Adan sajan sireuta

Teuduek haba muda seudang  
Lon peuriwang lam blang raya  
Amma bakdu keu deh u blang  
Ureueng meuprang lon calitra

Meuntro Sakdi keupala prang  
That pahlawan hana ngon sa  
Rakyatjih le got peunoh blang  
Laen urang teungoh teuka

Meubacut han jibri reunggang  
Jikarat prang lagee raya  
Hana teudoh meusu beude  
Sang-sang reule nanggroe raja

Uroe malam jimeupake  
Ureueng mate that meukeuba  
Surak deumpek jihei sare  
Rakyat kaphe that guranta

Ureueng nanggroe meunyum singke  
Sang han ek le lawan ngaza  
Tujoh uroe prang jikeupong  
Meusong-abong hana reuda

Nibak adat gadoh untong  
Ureueng gampong masam muka  
Bandum ureueng ate lucot  
Ka meusurot seun sideupa

Mata kayem ngieng u likot  
Mukajih krot hajat teureupa  
Le that beude sret bak jaroe  
Peusiblah droe surot sigra

Ureueng gampong kakeu talo  
Ka geuundo lop lam kuta  
Musoh surak that meuo-o  
Jadeh talo bak jisangka

Bak masa nyan bungong kundo  
Troh jilalo ubak tantra  
Roh rot likot jipeutajo  
Tan teusawo musoh dumna

Yoh masa nyan Ali Peureudan  
Ubak rakan jibri basa  
Jiklep mata ubak rakan  
Lheueh sinapang sigo rata

Sinankeu phon prang meuseubee  
Le that sitree mate fana  
Dumna musoh hana jithee  
Keunong tipee banta muda

Jipeubeude na dum tupheuen  
Sang ujeuen teungoh keunong sa  
Le that mate kaphe bajeueng  
Meukeubeueng darah keulua

Ube rakan Meuntro Adan  
Jipeuek prang that guranta  
Ladom saho jiyue rakan  
Nyang pahlawan teuga-teuga

Rakan meuntroe juah-juah  
Tarek leupah bak jimeutha  
Dalam kawan prang jigagah  
Le that bicah musoh teuka

Peureudan Ali han peue pike  
Jiseupot le tungkat raja  
Jimat tungkat bungong pade  
Laju jise raja naga

Yoh nyan tungkat jeuet keu peudeueng  
Intan buleuen 'ajab raya  
Jimasok prang jicang ureueng  
Keunong pang-peung han soe peubla

Ho nyang jihue mata peudeueng  
Dum meuruweueng mate fana  
Le that mate dum seulinteueng  
Buet peudeueng si raja naga

Bitpi dumnan le that mate  
Hana singke musoh teuka  
Surak deumpek jihei sare  
Sang-sang reule nanggroe raya

Nyang udep jimeuprang sabe  
Nyang mate sinan meukeuba  
Rot deh rot noe prang jikarat  
Hana lukat siklep mata

Ureueng musoh mate le that  
Han ek hisab deungon hingga  
Ladom keunong tungkat beusoe  
Ladom jaroe puntong dua

Ile darah ateueh bumoe  
Sang sijak nyoe ujeuen teuka  
Bak masa nyan prang meukalot  
Bagoe ribot bade raya

Ngon su beude that klam-kabot  
Sang-sang teulot kuta raja  
Si Cut Ali gadoh ingat  
Timu Barat peudeueng jiba

Keu noe siat keu deh siat  
Na ban kilat teungoh faja  
Jicang musoh le that mate  
Meutindeh bangke dum meukeuba

Prang jikarat bungong pade  
Beungeh ate that han tara  
Si Cut Ali saboh sagoe  
Teuku meuntroe blah Utara

Prang jikarat aduen adoe  
Jikap gigoe jipet mata  
Jipeusak dak jime mate  
Nibak keuji ayeb nama

Nibak jicok bungong pade  
Gotkeu bahle nyawong fana  
Nyoe lon peugah si nyak putroe  
Di meuligoe duka cita

Jideungo gah ka woe lakoe  
Sajan Meuntroe Pusong Rawa  
Peureudan Ali teungoh meuprang  
Cut Ariyan lakee do'a

Ya Ilahi Po lon Tuhan  
Ali Peureudan neubri sijahtra  
Beuseulamat bungong kundo  
Beuek talo musoh dumna

Sira jimoe ie mata ro  
Sujud syuko keu Rabbana  
Jimeulakee jileueng tangan  
He Tuhan neukabui do'a

Neubri kuat Ali Peureudan  
Beuek geucang si ceulaka  
Beuek talo Raja Syareh  
Kaphe paleh darohaka

Hana teudoh jileueng jaroe  
Lakee lakoe beusijahtra  
Teutap sinan lam meuligoe  
Si nyak putreo jimeupinta

Meunan sabe si nyak putroe  
Teuduek 'oh noe siat haba  
Nyoe lon peugah raja nanggroe  
Masa bunoe talo ngaza

Raja kalon prang ka talo  
Ureueng undo plueng lam kuta  
Musoh surak that meuo-o  
Ka teusawo puteu raja

Yoh nyan raja ate peudah  
Bak binteh peudeueng neuhila  
Neucok peudeueng reugam ngon kreh  
Neugrop keu deh pantah sigra

Neusuet peudeueng neukoh sarong  
Jiek seudong mirah muka  
Mata mirah ban boh jantung  
Boh idong sang bungong kala

Nibak dali deungon adat  
Beungehneu that poteu raja  
Yoh masa nyan dumna rakyat  
Ka meusapat sajan raja

Poteu raja teubiet rijang  
Jak lawan prang musoh teuka  
'Oh troh raja keu deh u blang  
Neukalon prang that meutaga

Troh le ureueng sideh datang  
Sulotan laju pareksa  
Pane ureueng mantong meuprang  
Angkatan pane jiteuka

Teuma seuot ureueng datang  
Angkatan di Pusong Rawa  
Po Cut Alipi na sajan  
Meuntroe Adan nyang keupala

Ban neudeungo linto baro  
Raja tahe han le haba  
Dalam ate ka teusawo  
Bungong kundo meubahgia

Yoh nyan raja piyoh sinan  
Neukalon ban buet aneukda  
Neukalon buet Meuntroe Adan  
Keulakuan pakri rupa

Neukalon buet Si Cut Ali  
Sang beureuhi ate raja  
Raja neuduek bineh padang  
Teuduek 'oh nan siat haba

Nyoe lon peugah ureueng meuprang  
Meuntroe Adan sajan banta  
Meuntroe Adan blah rot Barat  
Prang jikarat han ban peubla

Sajan rakan kuat-kuat  
Hibat-hibat taeu rupa  
Jipoh musoh han peue peugah  
Le that bicah si ceulaka



Ureueng kaphe yoh nyan sosah  
Han ban jibah peubicara  
Jieu rakan le that bicah  
Jimeusah-sah rakyat dumna

Sira meuprang dum jimeuproe  
Peue bala nyoe pane teuka  
Bak takalon masa bunoe  
Ureueng nanggroe talo ngaza

Abeh jiplueng dumna ureueng  
Ka meuruweueng bak ri rupa  
Jinoe pane laen ureueng  
Aneuk bajeueng le lagoina

Pat jiteubiet dalam uteuen  
Pene ureueng saleh nyoe ka  
Teungoh meunan jimeukheun-kheun  
Leupuk peudeueng troh bak muka

Ladom takue putoh meukhan  
Ladom badan beukah dua  
Hana meujan deuh jipandang  
Jih ka simpan peudeueng seuba

Teutiek bangke dum meutimpan  
Darah lam blang sang ie raya  
Rakan meuntroe sangat 'ajam  
Bak jimeucang utoh raya

Ladom leumbeng ladom peudeueng  
Ladom ureueng mat geulawa  
Keu deh keu noe jicang ureueng  
Dum seulinteueng mate fana

Le that mate kaphe bajeueng  
Han jan jikheun Allah hai ma  
Yoh masa nyan ureueng kaphe  
Kuyut ate han ek sangga

Han ek jitheun meunyum singke  
Yoh nyan kaphe talo nga za  
Nyang na udep jiplueng sabe  
Nyang mate sinan meukeuba

Bandum musoh jiplueng u gle  
Nyang goh mate nyawong fana  
Meuntroe Sakdi nyang pahlawan  
Mantong sinan dalam tantra

Bak masa nyan Meuntroe Adan  
Sajan rakan dum sireuta  
Ka jipagap Meuntroe Sakdi  
Lom jisudi meunoe haba

Hai pahlawan Meuntroe Sakdi  
Napsu mate atawa hana  
Meunyo gata tameung lawan  
Angkat prang pantah sigra

Walee hana tameung lawan  
Ucap rijang kalimah dua  
Meuntroe Sakdi teuma seut  
Bit that karot tuto gata

Meuka u nap han u likot  
Han kusurot peue tasangka  
Beuthat gata saboh kawan  
Kupantang han bek takira

Meuntroe Sakdi peue takian  
Bak jimeucang guna biasa  
Han jan abeh jihareutoe  
Rakan meuntroe troh le sigra

Saboh kawan sigra sampoe  
Ladom jaroe mat jiputa  
Ladom reupah jicok peudeueng  
Ladom ureueng weng keupala

Jipeureubah le seulinteueng  
Han jan jikheun Allah hai ma  
Yoh nyan jikat jaroe gaki  
Meuntroe Sakdi han le haba

Adat meukon sapeue ate  
Han jitukri peubicara  
Sabab meuntroe nyan keubai that  
Dumna rakyat ate lia

Nyankeu sabab got jirapat  
Meupakat rakan sineuna  
Meuntroe Adan mangat ate  
Rakan sare dum sireuta

Surak deumpek geuhei sare  
Meuntroe kaphe keunong singkla  
Mangat ate prang ka meunang  
Teuduek 'oh nan siat haba

Nyoe lon peugah Peureudan Ali  
Beungeh sang ri uleue bisa  
Jilet musoh han soe tukri  
Jiplueng lari talo ngaza

Raja Syareh kalon macam  
Dum angaktan jiteureupa  
Ka jibeudoh aneuk jalang  
Plueng teureuban tan jikira

Tinggai sinan dum rampasan  
Le that beuban balot ija  
:Raja Syareh jiplueng curam  
Meu'u-'u sang bade raya

That teukeujot aneuk bajeueng  
Sunggoh jiplueng tan jikira  
Meucarueh gaki deungon naleueng  
Reubah teugageueng si ceulaka

Keunong batee ulee beukah  
Teubiet darah kulet mata  
Lom jibeudoh haram jadah  
Jiplueng pantah nibak nyang ka

Abeh kaphe dum sinaroe  
Ka jiboh droe rot lam rimba  
Teuduek haba kaphe pindoe  
Lon kheun jinoo si cut banta

Neueu musoh han le sinan  
Ali Peureudan woe neugisa  
Teutap banta neubeurjalan  
Teuduek 'oh nan siat haba

Jinoo lon kheun Meuntroe Adan  
Sajan rakan balatantra  
Sidek sasat dumna rakan  
Sikalian dum pareksa

Lheueh geukat Meuntroe Sakdi  
Peureudan Ali geueu hana  
Maseng rakan ka jiantri  
Ulee ili jak meumita

Yoh nyan neubeudoh le deungon droe  
Jak eu adoe si nyak banta  
Bahle lon kheun haba nyang toe  
Rot deh rot noe geujak lanja

Sinoe geujak sideh ili  
Meureumpok le ngon syeedara  
Ban meureumpok Si Cut Ali  
Han geutukri meucom meuwa

Geumeucom-com rot deh rot noe  
Aduen adoe ate suka  
Adoe aduen mangat ate  
Panyot kande meunoe kata

Deungon tulong Rabbon Kade  
Ka meusampe leupah bahya  
Nyang na tinggai ureueng kaphe  
Abeh u gle jiteureupa

Beudoh bandum wahe rakan  
Jak cok beuban balot ija  
Teuma beudoh dumna rakan  
Cok rampasan peuwoe sigra

Le that beunda tueng rampasan  
Ube rakan meuntroe raja  
Dumna rakyat galak han ban  
Rampasan le that pusaka

Hingga teuma haba nyang toe  
Geucok meuntroe nyang lam singkla  
Geuploh ikat kaki jaroe  
Hajat peuwoe u lam kuta

'Oh lheueh geuploh sikalian  
Ali Peureudan meunoe haba  
Wahe meuntroe nyang pahlawan  
Seumbuh Tuhan jinoe gata

Bek le ikot ureueng kaphe  
Suntok sabe seumbuh beurala  
Pakon meuntroe salah pike  
Silap sabe sampoe tuha

Tantaningat ngon ate droe  
Wahe meuntroe cuba kira  
Soe nyang peujeuet langet bumoe  
Dum ngon asoe sianika

•Laot darat jen ngon insan  
Dum binatang asoe donya  
Kayee batee dum sibarang  
Nyawong badan soe nyang peuna

Langet bumoe sikalian  
Dum buet Tuhan nyang karonya  
Masa dilee sapeuepi tan  
Miseue badan tuboh gata

Pat jiteubiet pane datang  
Yoh dilee tan jinoe ka na  
Tan taingat sikalian  
Nyawong badan Tuhan peuna

Soe peudep soe peumate  
Dudoe akhe bandum fana  
Pakon meuntroe tan tapike  
Pakon ate dungoe raya

Nyang got bak lon wahe meuntroe  
Riwang jinoe bak agama  
Beutaseumbah Tuhan sidroe  
Bek le jinoe seumbah beurala

Allah hai meuntroe beutapateh  
Tanda kugaseh di lon keu gata  
Dalam nanggroe Anta Ladeh  
Bandum paleh manusia

Bak lon pike wahe meuntroe  
Gata sidroe nyang meubahgia  
Hana kuthee dumnoe bagoe  
Peusaban droe ngon si ceulaka

Haba mangat dum jipeugah  
Banta indah le bicara  
Lagipi got pusa lidah  
Teuhah babah rakyat dumna

Meunankeu dum jipeurunoe  
Laba rugoe jipeurasa  
Meuntroe Sakdi ngo hareutoe  
Dum geupasoe dalam dada

Yoh masa nyan Meuntroe Sakdi  
Jaweueb jibri meunoe haba  
Allah hai adoe Peureudan Ali  
Keu lon tabri nyang sijahtira

Nyankeu gata di lon adoe  
Nyang peurunoe dum peukara  
Sira beudoh jicom jaroe  
Po samlakoe peumulia

Meumat jaroe laen sajan  
Bandum rakan meuah deesya  
Sinankeu phon masok Islam  
Meuntroe pahlawan meubahgia

Peureudan Ali suroh titah  
Ucap pantah kalimah dua  
Asyhadu an la ilaha illallah  
Wa asuhadu anna Muhammadar Rasulullah

Meuntroe Sakdi kebui leugat  
Ate mangat tamong agama  
Agama Islam le that nekmata  
Donya akhirat lam sijahtira

Tanda meutuah Meuntroe Sakdi  
Tuhan neubri meubahgia  
Masa dilee agama Yahudi  
Jinoe Tuhan bri agama syeuruga

Rayek tuah deungon bagi  
Meuntroe Sakdi ka sijahtira  
'Oh lheueh Islam Meuntroe Sakdi  
Salen geubri gantoe ija

Teuma beudoh woe keumbali  
Meuntroe Sakdi sajan geuba  
Peureudan Ali Meuntroe Adan  
Sajan rakan balantantra

Got meuron-ron jak dalam blang  
Prang ka meunang woe u tangga  
Teudeuk haba po samlakoe  
Teungoh geuwoe lam blang raya

Nyoe lon pegah raja nanggroe  
Ayah putroe lon calitra  
Raja neudeuk bineh padang  
Neupandang dalam blang raya

Deuh neukalon ulee kawan  
Angkatan bandum meugisa  
Poteu raja beudoh mameung  
Neujak ampeueng peumulia

Geutet beude jareueng-jareueng  
Raja jak tueng nyan aneukda  
Rot noe geujak rot deh geujak  
Ka meureumpak pihak dua

Oh takalon got that sigak  
Bungong meurak eu ayahda  
Peureudan Ali kalon ayah  
Neujak seumbah pantah sigra

Raja neukheun that meutuah  
Aneuk lidah meubahgia  
'Oh lheueh seumbah le samlakoe  
Laen sinaroe maklum gata

Poteu raja mat bak jaroe  
Laju neupeuwoe u lam kuta  
Meuntroe Adan sajan rakyat  
Tamong leugat bansineuna

Troh u dalam dum meusapat  
Geubri teumat maseng jeumba  
Meuntroe-meuntroe bak keurusi  
Dum sipai ngadap lingka



Duek meusapat meuntroe Sakdi  
Horeumat geubri ban adat raja  
Teutap sinan sikalian  
Ali Peureudan beudoh sigra

Lheueh na teumpat bandum rakan  
Neuek rijang u istana  
Lakee idin ubak rakan  
Meuntroe Adan dum sireuta

Troh u rumoh muda seudang  
Cut Ariyan tajo sigra  
Jijak seumbah teungku abang  
Ali Peureudan sampoh keupala

Han tatukri kalang-kabot  
Sang leuek meulet ngon cempala  
Si nyak putroe com bak teuot  
Banta sambot com bak muka

Lheueh nyan banta duek bak tilam  
Cut Ariyan rampot tika  
Si nyak putroe sangat bokbang  
Jicok puan roh ceurana

Syarifah Binti nibak dapu  
Neupeulaku dum peukara  
Cut Ariyan ate rindu  
Jiek laju u istana

Jipasoe bu dalam idang  
Jibet keu nan pantah sigra  
Po Cut Ali neusrah tangan  
Putroe sajan makeuen dua

Oh lheueh makeuen po samlakoe  
Teutap jinoe lam istana  
Seunang ate mangat asoe  
Sajan putroe nyang jroh rupa

Teuduek haba po samlakoe  
Lam meuligoe meusuka-suka  
Ate galak bandua droe  
Teuduek 'oh noe siat haba

Ie di laot meujak meuwoe  
Bineh nanggroe riyeuek bicah  
Tapeumeuah aduen adoe  
Bacut sinoe ulon tambah

Jinoe teungku balek ayat  
Meudeh siat lon ci peugah  
Nibak ate lon sang hajat  
Sang-sang mangat bak lon kisah

Miseue ureueng dahga raya  
Jikalon na ie dalam glah  
Teuntee napsu deungon hawa  
Jiyue rasa meusibabah

'Oh tarasa beuthat beuphet  
Han ek tajep ulak pantah  
Napsu ulon meunan sabet  
Wehe taleb kon beurakah

Ladom napsu na lon pateh  
Ladom keudeh ulon keubah  
Kon meulon nyang surat nyoe  
Barangasoe hamba Allah

Napsu hawa that jipakoe  
Malam uroe turot sosah  
Bit pi meunan wahe rakan  
Beuthat meunan ulon peugah

Lon meulakee ruoe malam  
Ubak Tuhan sidroe Allah  
Insya Allah heundak Tuhan  
Napsu nyan beuek lon pinah

Beuek lon boh keujeuhatan  
Meulayenkan lon seuon titah  
Meuna kheundak Tuhan sidroe  
Baranggasoe ate dahsyah

Lam ibadat malam uroe  
Hana padoe dike Allah  
La ilaha illallah  
Muhammadur Rasulullah

Wahe kawom aduen adoe  
Beutapakoe nyoe kalimah  
Beuta seubot malam uroe  
Baranggasoe hamba Allah

Teuduek 'oh noe saboh rawi  
Laen lagi nyoe lon peugah  
Jinoe lon kheun Adil Parisi  
Ayah Siti putroe indah

Amma bakdu teuma dudoe  
Raja nanggroe sajan syeekah  
Poteu raja hei aneuk droe  
Po samlakoe banta indah

Yoh masa nyan Ali Peureudan  
Neutren rijang jak bak ayah  
Troh u bale muda seudang  
Sujud rijang bak khalifah

'Oh lheueh seumbah nyan ayahda  
Po cut banta neuduek pantah  
Sit meusapat dum sineuna  
Meuntroe raja sinan dahsyah

Uleebalang dum peutua  
Dum sigala hina meugah  
Duck meusapat got that keunong  
Raja tanyong meunoe ulah

Wahe aneuk intan bungong  
Lon tanyong narit sipatah  
Patbu gampong bijeh mata  
Soe nan bunda deungon ayah

Peugah aneuk ngon sibeuna  
Bek meutuka ban ekheulah  
Siri ujong nanggroe gata  
Kheun beusigra aneuk lidah

Teuma seuot po jroh rupa  
Jaroe dua beuet pantah  
Ampon meuribee tuanku droe  
Deungo jinoe ulon peugah

Jarussalam nama nanggroe  
Gampong lon nyoe nyan daerah  
Nama ayah Sulotan Yahya  
Nyangkeu raja mat peurintah

Ayah mate saboh masa  
Teukeudi ka nibak Allah  
Nibak Tuhan ka teukeudi  
'Oh nan janji abeh langkah

Nama ulon Peureudan Ali  
Ampon doli ngo lon peugah  
Nama bunda Lelan Syikri  
Teungku abi peuet droe zeejah

Bunda ulonpi teukeudi  
Lam glap sunyi sideh dahsyah  
Ahmad Kasari nan syeedara  
Laen bunda he khalifah

Mate ayah badai raja  
That angkara mat peurintah  
Geuboh bunda dalam syeksa  
Ulon dua lon plueng pantah

Cutda ulon Cut Seutia  
Saboh bunda he khalifah  
Nyang lon seutot dilee masa  
Pusong Rawa sideh dahsyah

Padumna trep lon jak mita  
Meuteumeung ka bri Po tallah  
Ka lheueh kawen deungon meuntroe  
Cutda lon nyoe tueng keu zeejah

Geupeusayang syeedara kamoe  
Uleh meuntroe nyang khalifah  
Banta peugah sira jimoe  
Meutaloe ie mata jojoh

Ingat bunda nyan di nanggroe  
Samlakoe ate that gundah  
Abeh neukheun awai akhe  
Raja teupike ate dahsyah

Poteu raja hireuen ate  
Neungo ruhe banta indah  
Dalam ate teupike keudroe  
Jimeurawoe meunoe ulah

Roh bak untong aneuk badan  
Ariyan rupa that cidah  
Roh judo aneuk sulotan  
Peureudan sangat meutuah

Abeh narit muda seudang  
Sulotan hireuen meutamah  
Abeh meufom bak sulotan  
Sibarang ka maklum sudah

Yoh nyan raja kheun hareutoe  
Bujang jinoe jak keumeurah  
Kayue jitren rakyat nanggroe  
Sinaroe hina ngon meugah

Teuma beudoh teuku bujang  
Jiplueng curam sangat pantah  
Jak peugah jeuep-jeuep simpang  
Sulotan suroh meulangkah

Hingga teuma haba nyang rab  
Jitren rakyat subhanallah  
Tunong Baroh Timu Barat  
Meusapat lam kuta meugah

'Oh troh keu nan dum sinaroe  
Beuet jaroe bak khalifah  
Peue tuanku pangge kamoe  
Dum sinaroe datang sudah

Teuma seuo poteu raja  
Saboh haba lon meung peugah  
Nyang lon pangge dumna gata  
Taboh raja banta indah

Lagi ulonpi ka tuha  
Pajan masa saleh leupah  
Peureudan Ali mat neuraca  
Bandum gata bek meubantah

Teuma seuo dumna rakyat  
Cit patot that he khalifah  
Bandum kamoe sit meupakat  
Pirak lipat mat peurintah

Hingga teuma haba nyang rab  
Dumpeue leungkap ase sudah  
Sit ka asa sikalian  
Cut Peureudan geucok pantah

Peuek ateuh batee intan  
Rakyat pandang bukon cidah  
Beudoh sidroe ureueng tuha  
Suroh raja kheun peurintah

Geuyue meuhei ban seulingka  
Geupeuhaba meunoe ulah  
Wahe kawom cut ngon raya  
Dum sigalahina meugah

Beuna tathee uleh gata  
Jinoe raja banta indah  
Beutagaseh sajan takot  
Beutaturot ban peurintah

Beutapateh ngon taikot  
Beungoh seupot bek meubantah  
Abeh geupeugah awai akhe  
Geutet beude subhanallah

Sireuta ngon geuhei sare  
Sang-sang reule nanggroe luah  
Geupeh ngon gong sajan geundrang  
Dum binyian le that ulah

Hana lon kheun buet peurasan  
Maklum tuan dum ka sudah  
Lheueh boh raja Peureudan Ali  
Teungku Kadi neufatihah

Teuma geubet le khanduri  
Sajan geubri ngon seudeukah  
Hingga teuma haba nyang toe  
'Oh seuleusoe dumpeue sudah

Ureueng gampong jilakee droe  
Bandum jiwoe ubak zeejah  
Meuntroe Adanpi lakee droe  
U gampong droe sajan syeekah

Meuntroe Sakdi sinan dukhoe  
Ngon samlakoe sinan dahsyah  
Abeh jiwoe sikalian  
Tinggai sinan banta indah

Sajan Putroe Cut Ariyan  
Sinan bimbang reubah limpah  
Han tom jarak meusipade  
Hana tom cre meusilangkah

Uroe malam meunan sabe  
Panyot kande sit lam dahsyah  
Ceupet urot uleh putroe  
Puleh asoe nibak payah

Rindu ate po samlakoe  
Si nyak putroe han peue peugah  
Ate galak bandua droe  
Dum geutanyoe maklum sudah

Padumna trep sinan dukhoe  
Po samlakoe sinan dahsyah  
Lawet lawan teuma dudoe  
Bak siuroe bri Po tallah

Ka teuingat po samlakoe  
Dum jeuep-jeuep syoe abeh leumah  
Peureudan Ali panyang pike  
Jimeurawe meunoe ulah

Han jeuet meunoe kupeuiem le  
Di akhe meuteumeung susah  
Yoh masa nyan Peureudan Ali  
Neuyue waki jak keumeurah

Teuma bujang beudoh peureugi  
Suroh doli dum jipeugah  
Ban jideungo dalam nanggroe  
Jitren jinoe dum barollah

Ka meusapat dum sinaroe  
Samlakoe jijunjong seumbah  
Lheueh jiseumbah poteu raja  
Turon sabda bak khalifah



Meunoe neukheun po cut banta  
He syeedara ka troh langkah  
Dum peutua seuot rijang  
Jilayang jaroe dua blah

Ampon kamoe po jeunulang  
Abeh datang dum ka filah  
Uleebalang abeh teuka  
Sigala rakyat barollah

Meunan jikheun dum peutua  
Seuot banta meunoe ulah  
Nyang lon pangge dumna gata  
Peugot kuta jinoe pantah

Sajan taboh pacang junga  
Parek kuta kueh beuluah  
'Oh lheueh suroh nibak banta  
Peubuet sigra dumna syeekah

Sajan ngon droe po jroh rupa  
Lam uroe kha reuoh-reuah  
Geutueng ate dumn rakyat  
Haba mangat dum geupeugah

Bandum ureueng ate mangat  
Hana siat na meubantah  
Peue nyang geuyue siat ase  
Panyot kande 'ajab leupah

Rakyat peubuet galak ate  
Hana pike beuthat payah  
Siploh uroe peugot kuta  
Cukop leungka dumna sudah

Lheueh geupeugot dum sigala  
Woe lam kuta rakyat barollah  
Troh lam kuta dum sipai  
Khanduri ase ka sudah

Peuduek idang dum meuriti  
Cut Ali tangan that murah  
Teungoh ureueng dum pajoh bu  
Beudoh meupru banta indah

Rata ureueng dum neujak eu  
Bungong meulu 'ajab leupah  
Neueu ureueng nyang budiman  
Nyang tuban adat peurintah

Nyang ceureudek balek batang  
Neupandang bandum ka sudah  
'Oh lheueh makeuen rakyat sinaroe  
Samlakoe yoh nyan peusiblah

Ureueng nyang ka neungieng bunoe  
Saboh sagoe banta keubah  
Ka lheueh neunging nyang ceureudek  
Nyang jeuet balek akai pantah

Abeh neungieng ureueng lisek  
Neufam tarek banta indah  
Nyang na iman dalam dada  
Nyang seutia bek na bantah

Ureueng nyang na budi basa  
Dum peukara jeuet peurintah  
Nyang na tukri kanun reusam  
Banta pandang dum ka sudah

Ureueng nyang jeuet boh atoran  
Keubajikan bek roh salah  
Abeh neungieng gaki jaroe  
Neufam keudroe banta indah

Ka meusapat sireutoh droe  
Marit jinoe meunoe ulah  
Wahe rakan adoe aduen  
Ngo lon kheun narit sipatah

Ulonteu nyoe nakeu tatueng  
Cuba takheun jinoe pantah  
Rakan sireutoh seuto meunoe  
Ampon kamoe he khalifah

Udep mate laba rugoe  
Bandum kamoe seunon titah  
Barangpeue buet kamoe seunon  
Tuanku ampon cuba peugah

Seuto banta meunoe neukheun  
He bandum rakan meutoh  
Meunyo gata ate yakin  
Ban lon kheun bek sagai ubah

Meunyo tapateh ka seulamat  
Tulong Hadarat Insya Allah  
Meuhan tapateh jeuet meularat  
Akhe meuhad meuteumeung sosah

Mula nyang phon lon peuhaba  
Bandum gata tameulangkah  
Meuka leupah tajak gata  
Nyang beulanja bek tagundah

Boh beulanja boh peukayan  
Boh makanan aneuk zeejah  
Na bak ulon sikalian  
Asai tuan turot titah

Lon meulakee ubak Tuhan  
Dum sibarang insya Allah  
Meunyo bak buet keubajikan  
Tulong Tuhan dumpeue mudah

Dalam nangroe Anta Ladeh  
Tajak keu deh jinoe pantah  
Tatueng ate kaphe paleh  
'Oh troh keu deh turot titah

Tangieng beuabeh lua dalam  
Pakri macam jipeurintah  
Bandum ureueng beujeuet rakan  
Turot reusam bek meubantah

Gata tajak meukat ija  
Maniaga peue nyang mudah  
Bek meusapat dumna gata  
Dua-dua tameulangkah

Lom bak raja tajak sidroe  
Tapeujok droe ban peurintah  
Bek tapeugah sinoe nanggroe  
Tahareutoe barang mudah

Raja Syareh nyang keupala  
Dua blah raja nyang di bawah  
Saboh raja sidroe gata  
Dum beurata tameulangkah

Nyang beulanja cok bak kamoe  
Lon bri jinoe dumpeue sudah  
Sidroe gata siploh katoe  
Ba sajan droe nyan nafakah

Nyang di gampong aneuk binoe  
Siploh katoe jak takeubah  
Adat han sep uroe dudoe  
Dum sinaroe lom lon tamah

Bandum gata bek tawoe-woe  
Malam uroe mita ilah  
Peue nyang taeu dum peukara  
Nyang rahsia tadeungo gah

Peugot surah pantah sigra  
Yue bawa keu noe beupantah  
Lon bri jinoe ngon peukayan  
Tame sajan ho nyang langkah

Sidroë gata dua pasang  
Cap lon tuan daweuet mirah  
Banta peugah laba rugoe  
Bansinaroe seunon titah

Awai akhe neuhareutoe  
Samlakoe 'ajab sileupah  
Hingga teuma haba nyang rab  
Beudoh rakyat geucok langkah

Cok peukayan bandum leungkap  
Teugon ngan cap banta indah  
Ladom geucap nibak bajee  
Ladom lagee bak kupiah

Maseng-maseng dum meuteuntee  
Keunong lagee that peurintah  
Leupah ureueng sireutoh droe  
Nyang di nanggroe meunoe ulah

Teungoh u gle saboh bagoë  
Samlakoe yue jak ceumeucah  
Maseng-maseng dum sinaroe  
Ban adat droe hina meugah

Nyang na tinggai dalam nanggroe  
Sidroe-droe han saho leupah  
Neuyue peugleh jeuep-jeuep teumpat  
Jalan teupat peugot pantah

Peugot jalan Timu Barat  
Ube neumat keurajeuen luah  
Peugot keude han ek hisab  
Deungon siät ase dum sudah

Ladom ureueng neuyue meukat  
Hareukat mita nafakah  
Nyang duek mantong hana neubri  
Peureudan Ali that neuteugah

Bandum neuyue mita raseuki  
Tacari tailah-ilah  
Bek duek mantong tawa tuboh  
Peue tapajoh meunan neupeugah

Sajan neuyue ngon ibadat  
Peubuet taat suroh Allah  
Peubuet suroh ngon hareukat  
Pirak lipat that neupapah

Buet meujudi ngon meureubot  
Neupeutakot banta indah  
Sit han neubri buet nyang karot  
Manok meulet dum neuteugah

Peugot peue laen sibagoe nyan  
Sikalian buet nyang salah  
Hana neubri buet han reumbang  
Meulayenkan nyang suroh Allah

Neuyue peubuet nyang suroh Tuhan  
Mauhammadan ikot titah  
Peue nyang wajib sikalian  
Seumbahyang jakeuet ngon pitrah

Saleh ate Ali Peureudan  
Keubajikan dum peurintah  
Lawet banta mat keurajeuen  
Bandum ureueng ate dahsyah

Galak ate bandum ureueng  
Intan buleuen 'ajab leupah  
Rakyat nanggroe le that hireuen  
Bandum jikheun bukon cidah

Adat nanggroe neupeukureueng  
Peng han neutueng nikah pasah  
Adat siploh neutueng limong  
Meunan bangon dum peurintah

Mangat ate agam inong  
Han peue tanyong hina meugah  
Geutueng sikhian bandum adat  
Bukon cakap banta indah

Meuhan neutueng hana cakap  
Gadoh adat jeuet keu sosah  
Peureudan Ali sangat utoh  
Akai haloh bri Po tallah

Ureueng teuka Tunong Baroh  
Meuh seuneupoh junjong titah  
Rakyat gampong dum sinaroe  
Han tom sidroe na meubantah

Bujang tandi waki meuntroe  
Lam jipujoe banta indah  
Lawet banta mat neuraca  
Raseuki hamba dumpeue mudah

Kareuna Po Tuhan Esa  
Sabab raja ade leupah  
Nanggroe makmu banda rame  
Asoe keude that barollah

Ureueng teuka sidroe sane  
Keunan jime peue nyang mudah  
Meugot raja makmu nanggroe  
Raseukipi troe bri Po tallah

Galak ate asoe nanggroe  
Dum jipujoe banta indah  
Peureudan Ali ceureudek that  
Hana sapat pike salah

Paḍum na trep sinan teutap  
Pirak lipat mat peurintah  
Teukeudi Po Tuhan Esa  
Yoh nyan banta ate gundah

Ka teuingat nyan keu bunda  
Dalam kama aduen keubah  
Yoh masa nyan po samlakoe  
Neuhei sidroe keunan pantah

Banta kalon ureueng binoe  
Nyang pindoe bak mita ilah  
Neuyue bungka keu deh jinoe  
U nanggroe droe teumpat ayah

Banta peugah dum hareutoe  
Haba puroe asailiah  
Neupeurunoe dum peukara  
Meukat gula suroh titah

'Oh lheueh wasiet nibak banta  
Jak peucara pantah-pantah  
Hingga ase sianika  
Balot gula lam beureukah

Jarussalam hajat bungka  
Ngon beulanja neujok pantah  
Cukop ase dum peukara  
Beudoh sigra geucok langkah

Geujak laju pantah sigra  
Meuhei gula nyan di babah  
Keu noe gula keu deh gula  
Hana reuda poh beurakah

Ureueng inong leupah bungka  
Po cut banta sinan dahsyah  
Sajan judo nyang analan  
Ariyan putroe that cidah

Pike syawe uroe malam  
Cut Peureudan rancak leupah  
Teuduek siat muda seudang  
Lon peuriwang nanggroe ayah



Balek ayat wahe teungku  
Amma bakdu roh bak sagoe  
Lon peuriwang nanggroe ibu  
Deungo teungku lon hareutoe

Nyoe lon peugah Ahmad Kasari  
Gantoe abi peugang nanggroe  
'Oh lheueh jiglap Lelan Syikri  
Tuhan neubri dum ateueh droe

Sabab jireuloh peneuduek ayah  
Bandum jiubah tan jipakoe  
Haba amanat peuneusan ayah  
Kon le cidah raja peurunoe

Tan jipateh jitiek u likot  
That geuturot ban napsu droe  
Rakyat nanggroe dum jireubot  
Abeh teukeujot aneuk nanggroe

Le that ureueng ka jibungka  
Han ek saba dum sinaroe  
Nanggroe laen dum jibungka  
Dalam rimba ladom jiboh droe

Tinggai sinan sisukee bagi  
Akan teutapi meunoe bagoe  
Adat geumeuhei Ahmad Kasari  
Hana padili dum jiiem droe

Sabab lam ate tan jigaseh  
Geumeuhei keu deh jitajo keu noe  
Raja Ahmad ate peudeh  
Ureueng ka abeh musoh sinaroe

Ho nyang geujak rakan hana  
Suntok masa cit lam sidroe  
Meutan tuah ngon bahgia  
Padumkeu na gop peurunoe

Geuduek geudong tahe gante  
Bungong kundo sayang sidroe  
Miseue ureueng mate judo  
Tahe gante geunap uroe

Nyankeu bala nibak Tuhan  
Sabab gop nyan han got budoe  
Sidek sasat tan di sinan  
Leupah tuan dum bak buet jaroe

Saboh bangon truek meuteumeung bala  
Sabab ayahda neulungkop jaroe  
Lakee meukawen ngon aneuk raja  
Hana suka barangri nanggroe

Sabab han got bidi basa  
Beuthat raja ureueng meusoe  
Ahmad Kasari han got baten  
Meusyeuhu po lem han got budoe

Ngon aneuk raja lakee meukawen  
Han jitem barangri putroe  
Sabab geungieng pie ngon guna  
Dum syeedara han le di nanggroe

Peureudan Ali ngon Cut Seutia  
Tan jipura tanyong pat jinoo  
Nyankeu sabab putroe han jitem  
Lakee meukawen keu deh keu noe

Nyoe han jitem jeh han jitem  
Sosah teungku lem malam uroe  
Nyankeu bala Tuhan balah  
Neupeuleumah dum sinaroe

Laen nibak nyan tan lon peugah  
Maklum sudah dum geutanyoe  
Dalam ate neubri sosah  
Uleh Allah po alam nyoe

Uroe malam ate gundah  
Teuduek kisah siat 'oh noe  
Teuduek kisah 'oh nan saboh  
Jinoe lon satoh tuan putroe

Cut Keumala rupa that jroh  
Nyanpi saboh geuthee keudroe  
Bukon sayang Putroe Keumala  
Sosah teuka malam uroe

Lawet mate poteu raja  
Cut Keumala tan le asoe  
Tuboh awoh ate rusak  
Jipandang bak jeurat lakoe

Gadoh utoh gadoh rancak  
Gadoh cangklak gadoh pindoe  
Jiduek jidong teutahe-tahe  
Bungong kundo teupike keudroe

Uroe malam ingat judo  
Ie mata ro lam paleuet jaroe  
Nyanpi saboh bala raya  
Cut Keumala sosah keudroe

Abeh ngon peng dum beulanja  
Namiet dua that jisiboe  
Pengpi abeh lakoe pi tan  
Bukon sayang aneuk meuntroe

Ate teulah hana macam  
Uroe malam tahe keudroe  
Allah Allah wahe rakan  
Bek roh meunan barangasoe

Hana panyang lon calitra  
Maklum gata dum sinaroe  
Hikayat nyoe he syeedara  
Bacut saja lon hareutoe

Meubek gadoh asai punca  
Maklum haba maseng bak droe  
Tiep-tiep ureueng nyang ceulaka  
Beuthat raja boh barangsoe

Deungon Tuhan teumeureuka  
Neubri bala dum sinaroe  
Neubri bala le that macam  
Uleh Tuhan Po geutanyoe

Maseng-maseng ban atoran  
Ladom tuan ateuh āoe  
Ladom bala bak areuta  
Jeuep-jeuep punca roh bak rugoe

Meunan-meunan dum peukara  
Maseng jeumba maseng bagoe  
Miseue haba ureueng tuha  
Geucalitra meunoe bagoe

Baranggasoe jiusaha  
Jiseumula ateuh bumoe  
Meunyo jipula bijeh rambot  
Hana patot timoh geutoe

Pula rambot timoh rambot  
Meunan patot wahe adoe  
Nyankeu hai nyak lon boh mise  
Beutapike narit lon nyoe

Meunyo kureueng pike syawe  
Teukeuse meuteumeung dudoe  
Haba lon nyoe jeuet keu ubat  
Beutaingat dum sinaroe

Baranggasoe ingat beuthat  
Bek silap teulah dudoe  
Miseue bungong hana le bee  
Meuka layee han le soe bloe

Barangpeue buet pike dilee  
Meuka balee toh lom lakoe  
Jeueutkeu dumnan bek panyang that  
Gadoh beureukat le nibak nyoe

Cut Keumala teuduek siat  
Ureueng meukat lon kheun jinoe  
Amma bakdu nyoe nyang gura  
Lon calitra ureueng binoe

Ureueng inong meukat gula  
Suroh banta yoh saboh roe  
Padumna trep jisrang-abrang  
Ka troh datang teumpat putroe

Ban sare troh Jarussalam  
Tamong rijang dalam nanggroe  
Meukat gula sangat ajam  
Bak poh rantam utoh han soe

Sira geujak poh beurakah  
Meunoe ulah kheun hareutoe  
Gula ulon mangat leupah  
Yumpi murah soe na tem bloe

Soe nyang deungo khem meuhah-hah  
'Ajab leupah ureueng binoe  
Lompi geukheun meunoe ulah  
Kon beurakah mameh han soe

Ban jideungo geukheun meunan  
Meuhei yoh nyan ureueng nanggroe  
Pakri rupa gulateu nyan  
Cuba kaman tamong keu noe

Geupeutamong pantah sigra  
Bak bale ka geuduek keudroe  
Ka jitanyong pane gula  
Hareuga padum sikatoe

Hanya panyang lon peuhaba  
Bacut saja lon hareutoe  
'Oh lheuch teuntee ngon hareuga  
Timang gula na lhee katoe

Bayeue ngon peng rijang-rijang  
Bak masa nyan phon geumeuproe  
Ureueng meukat tanyong nyoeban  
Hai tuan pakonbu meunoe

Jarussalam masa jameun  
Le that ureueng asoe nanggroe  
Pakon jinoe tan le ureueng  
Ho ka jiplueng dum jiboh droe

Lagee bangon teuka waba  
Ureueng hana troh padum droe  
Seuot sidroe ureueng tuha  
Allah cutda malang nanggroe

Sabab raja hana ade  
Abeh cre-bre dum sinaroe  
Jeuep-jeuep gampong meute guble  
Ladom u gle ka jiboh droe

Meunyo hana ade raja  
Teuntee hana aman nanggroe  
Allah Allah hai syeedara  
Hana guna lon hareutoe

Meunyo hana ade raja  
Haro-hara that lam nanggroe  
Teuntee ureueng that seungsara  
Meunyo raja han got budoe

Ureueng meukat seuot pantah  
Haba bantah meunoe bagoe  
Pakri patot raja salah  
Sang beurakah naritteu nyoe

Lom jiseuot ureueng tuha  
Narit beuna ban lon kheun nyoe  
'Oh dum putroe ka jisyeiksa  
Sireuta bandua adoe

Hana sinan sidek sasat  
Kon lon upat kon lon pujoe  
Lom geutanyong ureueng meukat  
Bukon 'ajab sang haba nyoe

Pakon meunan cuba peugah  
Asailiah pakri bagoe  
Bak lon deungo 'ajab leupah  
Seuot pantah ureueng nanggroe

Meunoe bangon asai mula  
Poteu raja peuet judo droe  
Putroe Lelan cidah rupa  
Umu muda po sambinoe

Leubeh cidah Lelan Syikri  
Raja doli sinan laloe  
Padumna trep teuma lawi  
Teukeudi bak Tuhan sidroe

Teukeudi Po Tuhan Esa  
Mate raja tinggai putroe  
Meusikeujap saket hana  
Siklep mata umu sampoe

Bak alamat keunong racon  
Meunan meufom nibak kamoe  
Teubiet darah dalam idong  
Lam-lam punggong gaki jaroe

Nyankeu sabab nyang na leumah  
Asailiah troh bak dumnoe  
Laen bak nyan hana leumah  
Poteu Allah nyang thee sidroe

Ureueng meukat deungo meunan  
Tanyong rijang meunoe bagoe  
Padum droe na ureueng sinan  
Dendayang asoe meuligoe

Ureueng laen nakeu datang  
Kutika nyan padum uroe  
Ureueng gampong jaweueb sigra  
Asai mula na tujuh droe

Dudoe nibak nyan saboh masa  
Laen teuka keu nan sidroe  
Si Nyak Jeumpa keu nan datang  
Jeuet lapan asoe meuligoe

Ureueng meukat lom tanyong ban  
Nyak Jeumpa nyan patbu nanggroe  
Padum na trep jih di sinan  
Lam rumoh nyang padum uroe

Masa mate poteu raja  
Si Nyak Jeumpa kakeu sampoe  
Atawa goh keu nan teuka  
Cuba kata awai ngon dudoe

Ureueng nanggroe jaweueb sigra  
Awai Si Jeumpa peuet ploh uroe  
Neugaseh that uleh raja  
Sireuta ngon tuan putroe

Ureueng meukat deungo meunan  
Teupike yoh nyan lam ate droe  
Pike syawe balek batang  
Seungap kalam bandua droe

Pajoh ranup meumat tangan  
Beudoh rijang geulakce droe  
Cok ngon beuban balot gula  
Geujak lanja dalam nanggroe



Keu noe gula keu deh gula  
That ceuncala babahgeu nyoe  
Bahle lon kheun pantah leugat  
Jak beurangkat laju sidroe

Keu noe siat keu deh siat  
Sidek sasat jeuep-jeuep sago  
Jeuep-jeuep jurong meukat gula  
Jak pareksa utoh han soe

Geumeuteuoh pura-pura  
Rahsia geumita keudroe  
Hingga teuma geujak lanja  
Bak Si Jèumpa ka troh sampoe

Troh bak rumoh Si Nyak Jeumpa  
Jimeuhei ka aneuk bisoe  
Wahe cutda peue barang nyan  
Tamong rijang laju keu noe

Lon meung kalon pakri macam  
Bak laku sang jadeh lon bloe  
Ban geudeungo narit meunan  
Tamong rijang laju sidroe

Ureueng meukat tamong sigra  
Tren po Jeumpa di seuramoe  
Peutren ranup sajan tika  
Piyoh cutda laju keu noe

Bahle lon kheun haba nyang rab  
Lon peurapat rijang sampoe  
Jibloe gula lhee katoe brat  
Cutda meukat marit meunoe

Allah Allah adoe badan  
Gaseh sayang keu lon sidroe  
Tateurimong lon eh malam  
Lon jualan watee uroe

Si Nyak Jeumpa seuot leugat  
Kru seumangat hai po da droe  
Watee uroe neujak meukat  
Malam meuhad keu noe neuwoe

Ban geudeungo narit meunan  
Piyoh sinan bak malam nyoe  
Singoh beungoh hari siang  
Jak me beuban keu deh keu noe

Watee malam keu nan riwang  
Eh tidoran di seuramoe  
Meunan sabe baranggajan  
Dudoe nibak nyan meunoe bagoe

Neutueng ate inong badu  
Geupeulaku indah han soe  
Neuplah rujee neutaguen bu  
Soe nyang na eu teukap jaroe

Adee pade srah ngon ija  
Jeup peukara dum seuleusoe  
Mangat ate Si Nyak Jeumpa  
Payah han dum buet jaroe

Umu sibuleuen meunan sabe  
Gaseh ate ining bisoe  
Deungon gulapi hana le  
Abeh sare dum geupeubloe

Abeh pike balek batang  
Ureueng meukat nyan bak siuroe  
Ngon ie mata sret meurumpan  
Geupeusayang sira geumoe

Di hadapan Si Nyak Jeumpa  
Peugah haba meunoe bagoe  
Allah Allah hai adekda  
Ngieng keu cutda bak siseun nyoe

Beutapandang siblah mata  
Laen hana pat lon kheun droe  
Ulon hai nyak ate sosah  
Taseuleuah siat jinoe

Deungokeu nyoe ulon peugah  
Asai sosah ulonteu nyoe  
Lhee boh aneuk lon boh ate  
Jinoe han lepi meusidro

Mate sigo lhee sirungke  
Jiracon le geusyik sagoe  
Lheueh lon tanom uroe tujoh  
Lon adoe beh kuboh nanggro

Lon arong gle peukoh aroh  
Nyoe baro troh keu noe sampoe  
Jeuep-jeuep gampong lon jak tuntut  
Sapat han jeuet lon peugah droe

Sang bak gata hai adoe cut  
Troh meukeusud cutdateu nyoe  
Abeh geukheun awai akhe  
Aneuk mate geupeugah proe

Si Nyak Jeumpa jiseuot le  
Aneuk sihe jikheun meunoe  
Ka tapeugah asai mula  
Hajat gata pakri jinoe

Hajat ulon kutueng bila  
Meunyo na racon bak adoe  
Si Nyak Jeumpa seuot nyoeban  
Han sapeu tan meunyo sinoe

Sidro

Sidro ureueng ka lheueh simpan  
Geukheun han jan pakri lon nyoe  
Beusep lam pruet wahe cutda  
Laen hana jithee sidroe

Dilee mate poteu raja  
Lon bri tuba tuan putroe  
Lon keumeung bri Lelan Syikri  
Roh teukeudi raja nanggroe

Got that cutda ulon buni  
Tan keutahwi asoe meuligoe  
Meunan jikheun inong badu  
Seuot laju ureueng binoe

Meunyo meunan adoe teungku  
Bri sigeutu ulonteu bloe  
Han peue tabloe wahe cutda  
Lon bri saja bungong jaroe

Sajan jicok racon tuba  
Nyopat cutda beudoh jak woe  
'Oh nan seungap abeh haba  
Sambot tuba beudoh geuwoe

Amma bakdu balek ayat  
Wahe sahbat laen macam  
Kakeu geuwoe ureueng meukat  
Geubeurangkat rot lam hutan

Jinoe lon peugah haba nyang toe  
Malam uroe **geubeurjalan**  
Umu lhee buleuen siploh uroe  
Troh u nanggroe teumpat makam

Geutamong laju dalam kuta  
Ubak Raja Ali Peureudan  
'Oh lheueh seumbah puteu raja  
Peugah haba meunoe lakuan

Amon tuanku meuribee katoe  
Ka troh ulon nyoe Jarussalam  
Deungon tulong Tuhan sidroe  
Troh sampoe hajat sulotan

Dum rahsia abeh meupat  
Lon urat uroe ngon malam  
Tulong Tuhan Rabbon 'Ibad  
Ka lon tupat sikalian

Deungon tuah po meukuta  
Ngon bahgia syahi alam  
Lon teumeung dum rahasia  
Si Nyak Jeumpa nyang that ajam

Jihkeu nyang boh racon tuba  
Putroe Keumala nyang surohan  
Jiyue bri keu Putroe Lela  
Sabab raja sinan bimbang

Sampoe jinoe mantong jitroh  
Tuba tikoh got jisimpan  
Dalam kaca lon eu jiboh  
Inong biyoh buet han reumbang

Na tuanku bacut lon peuwoe  
Lon lakee bloe na lhee gupang  
Peureudan Ali lakee bak droe  
Ureueng binoe jok le rijang

Banta sambot racon tuba  
Boh lam kaca ka neusimpan  
Ureueng binoe dum calitra  
Maklum banta sikalian

Abeh narit deungon banta  
Geutren lanja geuwoe rijang  
Teuduek haba ureueng meukat  
Lon riwayat muda seudang

Po Cut Ali beudoh leugat  
Pirak lipat jak bak tuan  
Troh bak raja banta indah  
Neuseumbah teuot sulotan

'Oh lheueh seumbah neuduek pantah  
Neupeugah meunoe lakuan  
Neuidin lon tuanku droe  
Siat lon woe ubak makam

Hajat saweue bunda sidroe  
Saleh jinoe pakriku ban  
Poteu raja seut leugat  
Kru seumangat aneuk badan

Patot aneuk woe u teumpat  
Beuseulamat nibak jalan  
Akan teutapi bijeh mata  
Meunyo gata woe bak makam

Peuwoe sajan putroe muda  
Sireuta deungon angkatan  
Han jeuet tawoe badan bulat  
Gadoh adat gadoh reusam

Patot aneuk taba rakyat  
Tabeurangkat rot lam hutan  
Lom neuseuot pirak lipat  
Ampon deelatdeungo laman

Han jeuet lon woe sajan rakyat  
Lon meuhajat mita keutangan  
Bahle jinoe lon woe sidroe  
Rijang sampoe ban pintaan

Meuna umu tuanku droe  
Uroe dudoe laen jalan  
Ban neudeungo meunan haba  
Seungap raja han le kalam

Abeh tuto deungon raja  
Beudoh sigra Cut Peureudan  
Banta neuk u meuligoe  
Po samlakoe cok peukayan

Sira neukheun ubak putroe  
Deungo lon nyoe judo badan  
Ulonteu nyoe woe u nanggroe  
Tinggai sinoe gata intan

Awai akhe dum neupeugah  
Nyang goh leumah akan datang  
Putroe seuot han peue salah  
Ban peurintah he junjongan

Ban nyang hukom bak khalifah  
Hana bantah bak lon tuan  
Yoh jikheun nyan si nyak putroe  
Meuteutaloe ie mata sajan

'Oh lheueh meungui Peureudan Ali  
Sang beureuhi Cut Ariyan  
Si nyak putroe com bak gaki  
Idin neubri keu junjongan

Po cut Ali sampoh ulee  
Bungong keume lom kheun nyoeban  
Hai putroe do'a talakee  
Geunap watee uroe malam

Talakee bak Tuhan sidroe  
Beusampoe hajat lon tuan  
Abeh tuto rot deh rot noe  
Po samlakoe neutren rijang

'Oh ban neutren po cut banta  
Ro ie mata putroe intan  
Jingieng lakoe puteh mata  
Aneuk dara bukon sayang

Sinan jiduek nibak pinto  
Ie mata ro hana reunggang  
Si nyak putroe tahe gante  
Bungong kundo teuduek 'oh nan

Nyoe lon peugah po Cut Ali  
Meuntroe Sakdi meuhei rijang  
Neuba sajan Meuntroe Sakdi  
Neupeureugi laju rot blang

Peukoh uteuen arong rimba  
Neujak lanja uroe malam  
Padum na trep neumeusafa  
Pusong Rawa troh le datang

Troh nanggroe nyan po jroh rupa  
Tamong banda ngon pahlawan  
Troh lam keude pot cut banta  
Meuntroe raja cit di sinan

Meuntroe kalon troh adekda  
Peurab lanja rot noe rot nan  
Meumat jaroe ngon syeedara  
Sireuta meuntroe pahlawan

Lheueh horeumat peumulia  
Lam kuta peutamong rijang  
Peuek laju u seuramoe  
Po samlakoe duek bak tilam

Putroe Juhur di meuligoe  
Jingo adoe ka troh datang  
Jicok ranup jikoh tangke  
Jipasoe le dalam puan

Jimat puan tatang bate  
Jipeutren le pantah rijang  
Troh u ramoe Cut Seutia  
Beudoh banta com bak tangan

Putroe Juhur piyoh sigra  
Rab syeedara duek teusumpan  
Pajoh ranup baro bicah  
Marit sipatah Cut Peureudan



'Oh lheueh banta neuboh seupah  
Insya Allah neumulaan  
Ulonteu nyoe nyang troh langkah  
Lon jak peugah wahe cut abang

Hajat ulon kujak gisa  
Woe bak bunda teumpat makam  
Sajan cutda beusireuta  
Kakanda langkah beusajan

Meuntroe Adan seut meunoe  
Wajib adoe cit han jeuet han  
Wajib adek woe u nanggroe  
Patot kamoe seutot sajan

Meunan jaweub raja meuntroe  
Po samlakoe lom peugah ban  
Lahe baten neuhareutoe  
Maklum meuntroe putroe sajan

Teutap sinan bungong pade  
Peuet sirungke ngon pahlawan  
Dum makananpi ka ase  
Geupeutren leu keunan idang

Tunggeng geupet basah jaro  
Makeuen jinoo peuet sikarang  
'Oh lheueh makeuen dum sinaroo  
Raja meuntroe yue bak bujang

Geuyue pangge asoo nanggroe  
Lhee reutoh droe ureueng agam  
Dua reutoh ureueng binoo  
Ngon putroe dendayang sajan

Dum peukayan indah-indah  
Hijo mirah meujeureulang  
Agam inong ase sudah  
Geucok langkah watee reumbang

Nyang jak di nap ureueng lakoe  
Limong ploh droe ulee kawan  
Sama teungoh ureueng binoe  
Got meurandoe jak meurumpan

Troh bineh gle cre ngon nanggroe  
Geucok putroe nyang analan  
Si nyak putroe boh lam uosng  
Uroe tutong payong sajan

Han ek jijak panyot kande  
Jigulam le ureueng agam  
Tamong uteuen geuarong gle  
Rakyat sare meupeurasan

Uroe malam geubeurangkat  
Hana siat beureuntian  
Umu lhee buleuen geucré teumpat  
Sampe hajat Jarussalam

Ban sare troh bineh nanggroe  
Geupiyoh droe dalam padang  
Peudong kimah dalam uroe  
Sinaroe pegot bantayan

Teutap sinan dumna tantra  
Ureueng tuha beudoh rijang  
Dua ureueng suroh banta  
Jak bak raja kuta dalam

Lheueh peurunoe lahe baten  
Bintang canden akai ajam  
Yue jak peugah ubak dalem  
Lagee laen kheun lakuan

Geujak laju bandua droe  
Troh sampoe bak bale keumang  
Bak watee nyan raja nanggroe  
Wadi meuntroe cit na sajan

Troh le keu nan ureueng dua  
U bale ka geuek rijang  
Lheueh geuseumbah poteu raja  
Peugah sigra ban suruhan

Ampon kamoe he khalifah  
Nyang troh langkah ulon tuan  
Raja kamoe jarak langkah  
Uroe sudahpi ka malam

Poteu raja sideh piyoh  
Ulon peutroh keu noe datang  
Neubri idin tuanku beh  
Kamoe piyoh siat di blang

Lagi sosah ureueng binoe  
Tuan putroe payah jalan  
Meunan narit ureueng tuha  
Poteu raja seuot nyoeban

Pane gampong ho geuhala  
Soebu nama nyang sulotan  
Lom geuseuot ureueng tuha  
Nyang keupala Meuntroe Adan

Nama nanggroe Pusong Rawa  
Nyankeu raja nyang sulotan  
Yoh masa nyan Raja Ahmad  
Ka teuingat meunoe macam

Tiep-tiep raja lakee teumpat  
Nyang meuhad keu noe u dalam  
Meukon meunan han meulagee  
Ulon malee akhe datang

Poteu raja marit meunoe  
Piyoh sinoe gata tuan  
Ho ka bujang waki nanggroe  
Jak tueng keu noe Meuntroe Adan

Tayue langkah bandum keu noe  
Meusidroek bek tinggai di blang  
Bujang beudoh jajak laju  
Meu'u-'u keu deh u padang

'Oh troh keu deh peugah laku  
Tuanku suroh u dalam  
Ban neudeungo Peureudan Ali  
Hukom neubri dum bak rakan

Beudoh bandum jak peureugi  
Bek lanti sinan dalam blang  
Hingga teuma haba nyang rab  
Tamong leugat kuta dalam

Troh u dalam geubri teupat  
Ban adat meujeulih reusam  
Meuntroe-meuntroe bak keurusi  
Cut Ali sajan ngon rakan

Akai sulet po Cut Ali  
Bek geuturi le cut abang  
Ureueng binoe u meuligoe  
Roh rumah droe putroe intan

Rumoh ka soh jeh 'oh uroe  
Hana sidroe ureueng sinan  
Teuduek siat haba putroe  
Ban sinaroe uleebalang

Nyoe lan peugah ureueng nanggroe  
Masa bunoe rakyat lam blang  
Ban jikalon rakyat that le  
Jimeututo inong agam

Saleh pane dara baro  
Mirah hijo dum peukayan  
Teungoh-teungoh jimeuteuoh  
Jieu beudoh ulee kawan

Jieu bandum geubeurangkat  
Tamong leugat kuta dalam  
Yoh masa nyan jimeupakat  
Meusyawarat sikalian

Jimeupakat dumjih rata  
Meubicara meunoe macam  
Uroe nyoe geutanyoe dumna  
Bak raja tamong u dalam

Bek jeuheut ayeb ngon malee  
Sabab jamee keu noe datang  
'Oh jikalon uleh jamee  
Gotkeu lagee ngon atoran

Bek taingat meudeh meunoe  
Bak uroe nyoe dumteu tuan  
Beuthat singoh laen uroe  
Meusidroek bek tajak keu nan

Keumah pakat bandum sare  
Jitamong le kuta dalam  
Troh lam kuta dum ka hade  
Jipeubuet le peue nyang reumbang

Yoh masa nyan Ahmad Kasari  
Hukom geubri ubak bujang  
Raja yue sie kameng biri  
Itek gasi manok panggang

Matauroepi ka jilop  
Lampu geutet meujeureulang  
Ureueng makeuen kalang-kabot  
Ladom eungkot boh lam idang

Bupi masak dumpeue ase  
Geubeuet le pantah rijang  
Cukop keu nan bandum sare  
Geubeuet le jaroe sajan

Bahle lon kheun haba nyang rab  
Makeuen leugat sikalian  
'Oh lheueh makeuen dumna rakyat  
Geupeurab jak pinah idang

Sajan geubet keu nan pantah  
Ija mirah sampoh tangan  
Nyang ranup hana peue peugah  
Dalam karah cit ka sinan

Gotkeu bangon geupeujamee  
Ban lagee raja ban datang  
Malampi ka jula watee  
Ureueng jamee teutap sinan

Ureueng gampong lon peuhaba  
'Oh ase ka pinah idang  
'Oh lheueh bri bu jamee teuka  
Maseng tangga jiwoe rijang

Abeh bandum ka jigisa  
Seungap kuta han le kiam  
Maseng-maseng woe u rumoh  
Singoh beungoh laen syahdan

Bak malam nyan buleuen peunoh  
Ka neubeudoh Cut Peureudan  
Jula malam watee sunyi  
Peureudan Ali neubeurjalan

Neuba sajan Meuntroe Sakdi  
Neupeureugi lam seupot klam  
U meuligoe Cut Keumala  
Neuek lanja keu nan curam

'Oh troh keu nan po cut banta  
Sireuta meuntroe pahlawan  
Meuntroe sungket bintang laju  
Neuek meupru Cut Peureudan

Troh u rumoh bungong meulu  
Panyot lampu neutet rijang  
Tuan putroe sidroe neuh  
Putroe paleh teungeut pangsan

Lop keuleumbu tujuh lapeh  
Neulop keu deh banta seudang  
Sit ka ase po samlakoe  
Ngon taloe ka neume sajan

Banta ikat gaki jaroe  
Yoh nyan putroe sare kiam  
Meuhei bantu lagee raya  
Sidroe hana ureueng datang

Putroe meulawan hana daya  
Leubeh teuga ureueng agam  
Ureueng binoe kuat hana  
Padumkeu na ek meulawan

Sira jimoe Cut Keumala  
Rupa banta deuh jipandang  
Tuan putroe ret seumangat  
Klik raya that geumpa alam

'Oh lheueh putroe banta ikat  
Surung leugat bak pahlawan  
Meuntroe Sakdi sambot putroe  
Bak baho droe le jigulam

Sajan neutren le samlakoe  
Kheun bak putroe bek that kiam  
Meunyo kaklik sabe-sabe  
Kupoh mate mangat simpan

Ban jideungo geupoh mate  
Putroe han le that geumeuntam  
Putroe jimoe meusok-meusok  
Teuploh ngon ok teugeureubang

Geuba laju u rumoh aduen  
Cut Ali kheun bak pahlawan  
Taboh taloe jaroe uneun  
Tagantung bak cabeueng asan

Saket ate meuh seuneupoh  
Nyoe baro troh ban pintaan  
Meuntroe ikat putroe biyoh  
Jisaoh keu deh cong asan

Teutap sinan putroe jimoe  
Po samlakoe beudoh rijang  
Banta neujak ubak ma droe  
Ngon meuntroe keu deh bak jalan

'Oh troh keu deh ubak bunda  
Pinto kama neutrom rijang  
Sira neumoe neuhei bunda  
Mantong gata e ma badan

Lelan Syikri su ka haloh  
Meuh seuneupoh seut nyoeban  
Di lon aneuk la'eh tuboh  
Han ek troh lon beudoh keu nan

Ban neudeungo haloh tuto  
Neutajo dalam seupot klam  
Banta neumoe ie mata ro  
Hai bunda e ulon paban

Sira neucok laju bunda  
Neucom neuwa nibak badan  
Rot deh rot noe inseueh teuka  
Bandua rindu ngon deundam

Yoh masa nyan po samlakoe  
Kheun bak meuntroe beudoh rijang  
Meuntroe cok le tuan putroe  
Jipeuwoe laju jigulam



'Oh troh keu deh jiseumanoe  
Peugleh asoe le that kalang  
Teuma geupeuek u meuligoe  
Samlakoe salen peukayan

Ureueng laen lam meuligoe  
Nyan sinaroe teungeut pangsan  
Bak masa nyan Putroe Juho  
Sajan linto Meuntroe Adan

Goh lom teungeut bungong kundo  
Teusiyo hana lom pangsan  
Po Cut Ali meuhei sigra  
Hai cutda bek le di sinan

Ban jideungo ka troh bunda  
Bandua jitajo rijang  
Jitajo jicom bak gaki  
Han jitukri jiwa badan

Rot deh rot noe that beureuhi  
Lelan Syikri nyang that sayang  
Bak pihak that leumoh teuot  
Ie mata sret duek teusumpan

Meuntroe Adan com bak teuot  
Putroe sambot com bak badan  
Putroe Juhur Lelan Syikri  
Cut Ali ngon Meuntroe Adan

Banpeuet ureueng han soe tukri  
Beureuhi napsu that bimbang  
Bak malam nyan teungeut han le  
Suloh nyang akhe phon mulaan

Aneuk ngon nang galak ate  
Peuet sirungke that sukaan  
Peugah haba sampoe beungoh  
Meuteuoh nyang keu beulakang

Awai akhe dum meuteuoh  
Buleuen peunoh teutap sinan  
Teuduek haba intan buleuen  
Jinoe lon kheun putroe suang

Teungoh malam phon meugantung  
Sangat hireuen ban seulayang  
Cut Keumala dalam taloe  
Hingga uroe ke peungeuh trang

Ureueng lingka troh sidroe-droe  
Jieu bagoe teuka sayang  
Bandum ureueng teukap jaroe  
Peue bala nyoe pane datang

Raja Ahmadpi ka jaga  
Uroepi ka troh poh lapan  
Ban neudeungo ureueng subra  
Yoh nyan raja neutren rijang

'Oh troh raja tren u bumoe  
Neuntanyong peue subra alam  
Ureueng keumalon seuot meunoe  
Ampon kamoe he junjongan

Han lon tusoe teungku ampon  
Meuayon jeh di cong asan  
Deungon nafah meuek neutren  
Nyang mula phon saleh pajan

Teuploh ngon ok teutop muka  
Nyangkeu hana deuh lon pandang  
Ban neudeungo meunan haba  
Yoh nyan raja neuplueng rijang

'Oh troh keu nan raja lalo  
Hireuen tahe mata mandang  
Dalam ateneu teusawo  
Neumeututo pane urang

Poteu raja yue koh taloe  
Jiek sidroe u cong asan  
Ladom ureueng sambot putroe  
Putoh taloe mat bak badan

Neuyue salop ok di muka  
Lemah rupa raja pandang  
Ban neukalon Cut Keumala  
Lam ate ka marah han ban

Neuntanyong le wahe cutma  
Soe angkara peugah rijang  
Baranggasoe han kutaba  
Ateuh sula sit kupanggang

Tuan putroe ka ubit su  
Seun sigentu kheun lakuan  
Bak lon kalon aneuk teungku  
Sang ban laku jamee datang

Baroe seupot jih na keueu  
Sajan teungku Meuntroe Adan  
Yoh nyan putroe moe meu'u-'u  
Raja laju lom tanyong ban

Wahe cutma tapeugah kri  
Na taturi rupajih nyan  
Seuot putroe that kuturi  
Teutapi watee kupandang

Abeh narit dengon putroe  
Raja nanggroe kheun bak bujang  
Tajak gata bujang sidroe  
Tayue keu noe Meuntroe Adan

Deungon rakan dum sireuta  
Beusigra laju sikarang  
Bujang beudoh jijak lanja  
Peugah haba meunoe macam

Teungku ampon surah deelat  
Keudeh siat langkah rijang  
U bale keu deh meusapat  
Ngon rakyat bansikalian

Ban geudeungo meunan haba  
Meuntroe raja beudoh rijang  
Dumna rakyat jak sireuta  
Ngon Banta Ali Perueudan

Troh u bale ek le leugat  
Duek meusapat got lakuan  
Raja raja duek meuhadap  
Dumna rakyat di beulakang

Cukop ase dum ka leungkap  
Raja Ahmad neumeukalam  
Phon neutanyong meunoe bagoe  
Wahe meuntroe uleebalang

Neupeuleumah bak siseun nyoe  
Ulonteu nyoe mita keutrangan  
Meuntroe Adan seot pantah  
Han peue salah bak lon tuan

Saket mangat beuna salah  
Ban peurintah syahi alam  
Yoh masa nyan poteu raja  
Cut Keumala neuhei rijang

Wahe cutma keu noe gata  
Jak peunyata dalam kawan  
Ureueng beuklam nakeu sinoe  
Lam kawan nyoe jak tapandang

Troh le neujak tuan putroe  
Po samlakoe dueh neupandang  
Ban putroe eu Peureudan Ali  
Jaweueb neubri meunoe macam

Nyankeu aneuk nyang that deungki  
Duek rot kiri aneuk badan  
Jijak poh lon hana seubab  
That khianat aneuk jalang

Putroe carot di nap rakyat  
Pirak lipat hironeu tan  
Peureudan Ali duek di teungoh  
Buleuen peunoh hana hiram

Pajoh ranup kunyah-kanyoh  
Cut banta jroh akai ajam  
Pura-pura hana hireuen  
Beuthat jikheun baranggaban

Cut putroe kheun aneuk bajeueng  
Nyankeu ureueng teuka beuklam  
Nyankeu ureueng ikat lon nyoe  
Aneuk bisoe biek jen hutan

Hana patot buetjih meunoe  
Jipoh kamoe sababjih tan  
Baroe seupot jih ban teuka  
That ceulaka aneuk jalang

Ngon jigrop-grop meuseurapa  
Cut Keumala sangat girang  
Bak jisangka keunong hukom  
Meunan meufom putroe suang

Abeh narit Cut Keumala  
Jinoe raja lon peugah ban  
Bak watee nyan Raja Ahmad  
Beungehneu that bak lakuan

Siteungoh sang gadoh ingat  
Muka pucat meuri masam  
Saket ate hana ngon sa  
Beungeh raya jiek biram

Kasari yoh nyan pareksa  
Ubak Raja Meuntroe Adan  
He tuanku kheun beukeunong  
Lon teumanyong nibak sulotan

Adat di gop Baroh Tunong  
Pakri bangon buet nyang reumbang  
Ureueng salah pakri hukom  
Pakri meufom bak junjongan

Walee di nanggroe teungku ampon  
Neuhukom nyang silagee nyan  
Meuntroe Adan seut meunoe  
Nibak lon nyoe buet nyang meunan

Hukom lon koh gaki jaroe  
Barangasoe lon pantang han  
Hanalon preh tanggoh siat  
Lon poh leugat nyawong simpan

Akan teutapi ampon deelat  
Dengon syarat cit han jeuet han  
Barangpeue buet beuna syarat  
Bek ngon adat le tabangkang

Meunyo rijang taba adat  
Akhe meuhad teulah tuan  
Bek roh lagee ureueng poh judo  
Tuanku e aneuk sajan

Mate aneuk ie mata ro  
Mate judo akai hilang  
Meunan narit raja mentroe  
Raja nanggroe lom tanyong ban

Pakri bangon raja meuntroe  
Cuba kheun proe habateu nyan  
Geupoh judo peue seubab phon  
Han tom di lon kudeungoran

Seuot meuntroe teungku ampon  
Le that bak lon calitra nyan  
Tuanku deungo jinoo lon kheun  
Haba jameun lon peugah ban

Dalam kisah cit meuteumeung  
Sidroe ureueng panglima prang  
Ho nyang geujak han soe linteueng  
Ngon peudeueng sabe lam reugam

Cit teumakot dumna ureueng  
Meunoe geukheun lam karangan  
Saboh inong neumeukawen  
Puteh licen kulet badan

Tiba-tiba inong bunteng  
Panglima tren neujak curam  
Panglima nyan leupah bungka  
Geuthee hana pruet ka meunan

Geunap buleuen troh kutika  
Budak nyata aneuk agam  
Lawet lawan teuma dudoe  
Rayek keudroe di aneuk nyan

Han tom jarak malam uroe  
Sajan ma droe eh tidoran  
Saboh bantai jieh ngon ma  
Suntok masa baranggajan

Deungon badan rayek lanja  
Salah sangka soe nyang pandang  
Kira-kira tuanku ampon  
Dua blah thon nyang meumeunan

Sapat jieh saboh suson  
Deelat ampon aneuk ngon nang  
Dalam thon nyan saboh masa  
Geuwoe bungka panglima prang

Troh u rumoh lem panglima  
Kira-kira teungoh malam  
Geuek laju u rumoh droe  
Geueu binoe teungeut pangsan

Inong sidroe agam sidroe  
Lam ate droe beungeh han ban  
Sabab geueu sapat teuh  
Ate peudeh panglima prang

Geusuet peudeueng sajan ngon kreh  
Bak teuh laju neuriwang  
Bandua le sinan padee  
Syetan tipee panglima prang

Bak geusangka puleh malee  
Hana geuthee keurugian  
Singoh beungoh teubiet uroe  
Waeh nanggroe jak peugah ban

Pakon gata poha aneuk droe  
Sajan binoe mata simpan  
Lem panglima yoh nyan tahe  
Han le tuto mata mandang

Teuku panglima rayek teulah  
Buet ka leupah geutanyong tan  
Aneuk binoe mate sudah  
Dalam sosah akai hilang

Sisat akai ngon bicara  
Akhe masa grop lam kubang  
Meutan le akai bicara  
Keupeue guna udep badan

Nyoepi meunan hai pangulee  
Bek roh lagee buet nyang meunan  
Barangpeue buet pike dilee  
Meuka malee pangkat hilang



Meuka rampueh gadoh beureukat  
Gadoh adat jeuet keu irang  
Patot dilee sidek sasat  
Bek awai that jiek biram

Leupah langkah jeuet tasurot  
Tuto karot that geupandang  
Lagee putroe neuceumarot  
Keupeue ribot subra alam

Hana guna bube pade  
Kadang akhe teulah tuan  
Cuba tuanku nyan neupike  
Awai akhe abeh lon trang

Raja Ahmad seuot meunoe  
Sabet meuntroe ban neukheun nyan  
Ulon tanyong teuma jinoe  
Cuba kheun proe buet nyang beuklam

Nyang jeuet ek troh bak sidumnoe  
Pakri bagoe phon mulaan  
Yoh masa nyan putik rambot  
Ka neuseuot Cut Peureudan

Banta meusu leumah-leumbot  
Neubeuet jaroe meulimbang  
Tuanku ampon insya Allah  
Nyoe lon peugah keulakuan

Sabab nyang phon he khalifah  
Asailiah meunoe macam  
Sabab lon poh Cut Keumala  
Cutda Jeumpa nyang surohan

Ulon geuyue le da Jeumpa  
Hai meukuta ulon paban  
Hana lon tem meunyo malee  
Upah dilee geujok rijang

Lagipi lon ureueng jamee  
Cit hana mee nyang bantahan  
Meunan narit pirak lipat  
Cit utoh that peutakian

Yoh masa nyan Raja Ahmad  
Neuyue leugat ubak bujang  
Si Nyak Jeumpa neuyue pangge  
Siat troh le inong leumbam

Ban sare troh inong sihe  
Neutanyong le meunoe macam  
Lon tanyong hai cutda Jeumpa  
Nyang sibeuna takheun rijang

Na tayue bak aneuk muda  
Buet ceulaka tayue beuklam  
Si Jeumpa yoh nyan seuot  
Hana patot he junjongan

Han tom di lon buet nyang karot  
That lon takot teugah Tuhan  
Bek neupateh ampon doli  
Jimeung taki ulon tuan

Bek antara lon meujanji  
Meulon turi rupajih tan  
Peureudan Ali seuot pantah  
He khalifah meunoe macam

Hana geuyue deungon babah  
Isyarah surat kireman  
Lheueh geupeugot saboh surat  
Geuyue intat keu lon tuan

Sampoe jinoe ampon deelat  
Mantong surat ulon simpan  
Raja deungo narit banta  
Surat haba lakee rijang

Banta jok le surat haba  
Sajan kaca teupeureuban  
Lheueh nyan raja neuploh ikat  
Deuh neulihat laen macam

Dalam ate teuka 'ajab  
Raja siat tahe mandang  
Sabab tahe meunoe bagoe  
Deungo adoe lon peugah ban

Racon dilee yoh saboh roe  
Banta pasoe dum dalam nyan  
Ka lheueh neuboh racon tuba  
Dalam kaca mirah hitam

Banta balot got han tara  
Neuboh rupa lhee peuet macam  
Lapeh nyang phon surat haba  
Lapeh nyang dua ija hitam

Lapeh teungoh ija mirah  
Banta isyarah bak cut abang  
Tanda bayek banta indah  
Hana leumah bak laheran

Neuboh di lua ija puteh  
Ate khaleh Cut Peureudan  
Balot kaca na peuet lapeh  
Sangat areh banta intan

Yoh masa nyan Raja Ahmad  
Puleh nibak hireuen mandang  
Neucok surat neuploh lipat  
Neubeuet leugat dum habaran

Meunoe haba dalam surat  
Deungo sahbat permulaan  
Seumbah sujud sajan horeumat  
Nyoe amanat he junjongan

Hai tuanku gata raja  
Nyoe rahsia dum lon pulang  
Nyang boh racon mate raja  
Cutda Jeumpa inong suang

Nyang yue bri Putroe Keumala  
Geuyue tuba Putroe Lelan  
Nyankeu tuba nyang lam kaca  
Laenpi na lom jisimpan

Mantong jitroh lom di para  
Yue pareksa jinoo rijang  
Nyoekeu ulon Peureudan Ali  
Nak taturi he cut abang

Lon boh gampong trep ka lawi  
Lon jak cari cit keutrangan  
Tulong Allah Tuhan sidroe  
Troh sampoe hajat lon tuan

Jinoo dalem deungo adoe  
Lon kheun sinoe sikrak kalam  
Gata dalem raja nanggroe  
Hukom nyoe beugot that timang

Meunyo hana hukom ade  
Di lon han le udep badan  
Nyankeu dalem beutapike  
Bek trep le jinoo beurijang

Meunan neuboh dalam surat  
Narit singkat hana panyang  
Han jan abeh neubeuet surat  
Raja Ahmad muka masam

Sira beudoh neukheun meunoe  
Neucom bak dhoe Cut Peureudan  
Tapeumeueh wahe adoe  
Deesya lon nyoe dum sibarang.

Hana lon thee bijeh mata  
Bak lon sangka pane urang  
Han lon turi hai adekda  
Trep ka lama tan lon pandang

Aduenteu nyoe rayek salah  
Tapeumeuah deesya abang  
Peureudan Ali seuot pantah  
Ampon meuah nibak Tuhan

Meuah bak lon barang salah  
Buet leupah teukeudi Tuhan  
'Oh teukeudi nibak Allah  
Han ek ubah baranggajän

Patot dalem pike salah  
Tanda ubah bandum alam  
Nyang han ubah Rabbon Kade  
Teutap sabe baranggajan

Nyangkeu dalem beutapike  
Singoh bek le buet nyang meunan  
Po Cut Ali meunan neukheun  
Ngon aduen meucom-com badan

Si Nyak Jeumpapi ka jiplueng  
Aneuk bajeueng jiue meunan  
Ban neukalon Si Jeumpa plueng  
Raja neukheun kadrop rijang

Ka jipeulet dumna ureueng  
Jiteumeung sama teungoh blang  
Jibeureukah jiboh taloe  
Jipeuwoe laju u dalam

Troh bak raja aneuk bisoe  
Dalam taloe teutap sinan  
Cut Keumala mantong teudong  
Neutanyong lom le sulotan

Raja neukheun pakon-pakon  
Di gop han tom buet nyang meunan  
Meudeh meunoe neupareksa  
Sikrak hana jaweueb kalam

Raja tunyok lam-lam mata  
Cut Kemala jiseuot tan  
Raja tanyong sabe-sabe  
Aneuk sihe neukheun rijang

Yoh nyan raja saket ate  
Neuyue boh le taloe seumirang  
Nibak dali deungon adat  
Beungehneu that lagee biram

Bandua raja yue ikat  
Ka meusapat saboh karang  
Ureueng dua han le ubat  
Muka pucat inong leumbam

Yoh nyan raja neubri hukom  
Ureueng gampong beudoh rijang  
Ureueng dua nasib untong  
Yoh nyankeu phon gadoh ajam

Jicok Putroe Cut Keumala  
Ngon Si Jeumpa inong leumbam  
Sira jipoh jihue hila  
Sidroe hana teuka sayang

Sira jihue jikkeun meunoe  
Jihareutoe taloe jalan  
Nyoekeu putroe tuba lakoe  
Meuwoe keudroe atueh badan

Nyoekeu ureueng haram jadah  
Buet that salah bak atoran  
Putroe jihue laju pantah  
Teubiet darah luka badan

**Jihei ampon han jipateh**

Gadoh gaseh dumna urang  
Bandum jikheun inong paleh  
Bah beuabeh hanco badan

Meunna jikheun dum sinaroe  
Jeuep-jeuep sagoe jeuep-jeuep simpang  
Jeuep-jeuep jurong jeuep-jeuep nanggroe  
Jeuep-jeuep uroe meunan macam

Kakeu jihue keu deh keu noe  
Bandua droe inong jalang  
Teuduek haba inong bisoe  
Lon kheun jinoo uleebalang

Nyoe lon peugah **Ahmad Kasari**  
'Oh lheueh neubri hukum meunan  
Ubak Putroe Lelan Syikri  
Neupeureugi laju yoh nyan

Neujak lakee meuah deesya  
Ube nyang ka dum sibarang  
Lom ngon adoe putroe muda  
Cut Seutia nyang analan

Abeh bandum lakee meuah  
Nyang ka sudah di beulakang  
Lahe baten nyang ka leupah  
Abeh meuah sikalian

Rot deh rot noe mangat ate  
Hankeu na le hiram masam  
Aneuk ngon nang rot deh rot noe  
Han le sapeue na dukaan

Jinoo lon kheun haba nyang toe  
Po samlakoe teudeuk 'oh nan  
Teuduek haba tuan putroe  
**Bansinaroe** ate bimbang

Nyoe lon peugah ureueng nanggroe  
Jingo bunyoe dalam alam  
Jingo kawoe Putroe Jhho  
Bungong kundo adoe sajan

Sireuta ngon linto baro  
Tuanku e Meuntroe Adan  
Lompi Putroe Lelan Syikri  
Peureudan Ali suet lam bagan

Cut Keumala nyang that deungki  
Cut Ali teumeung keutrangan  
Meunan meubunyoe dalam nanggroe  
Jijak jinoe dumna urang

Jijak kunjong tuan putroe  
Bungong jaroe jime sajan  
Ladom jime teubee meun  
Boh jagong ladom boh pisang

Ladom jime u meulason  
Ureueng duson jak meukawan  
Maseng pangkat maseng habat  
Ban adat meujeulih reusam

Ladom tumpoe ngon bu leukat  
Nyang le that beureuteh pisang  
Abeh jijak dum sinaroe  
U meuligoe Putroe Lelan

Jijak kunjong tuan potroe  
Ngon aneuk droe dua sajan  
'Oh troh keu nan rakyat dumna  
Po cut banta peurjaman

Neubri teupat nyang mulia  
Dum sigala inong agam  
Cit neugaseh keu ureueng gampong  
Bintang tanjong got aturan



Got bangon ato ngon turon  
Uroe nyang phon Cut Peureudan  
Sinan neudeuk sajan rakyat  
Pirak lipat poh-poh rantam

Banta peugah haba mangat  
Dumna rakyat that sukaan  
Galak ate bandum ureueng  
Banta jikheun that budiman

Ho siuroe maken rame  
Sidroe sane keu nan datang  
Nyang that galak ureueng binoe  
Ate laloe napsu bimbang

Sira banta poh beurakah  
Neupeugah nyang keubajikan  
Soe nyang deungo ate dahsyah  
Dum geukeubah dalam badan

Meunan sabe geunap uroe  
Po samlakoe sajan rakan  
Jigaseh le ureueng nanggroe  
Lam meuligoe jarakjih tan

Hingga meugah nanggroe laen  
Troh nanggroe Kleng keudeungoran  
That meusyehu puteh licen  
Hana bandeng got atoran

Ureueng dilee nyang ka bungka  
Dilee masa plueng lam hutan  
Jideungo gah meunan haba  
Abeh gisa sikalian

Dum ureueng nyan abeh jiwoe  
U nanggroe bak teumpat makam  
Jijak kunjong po cut banta  
Cut Seutia Putroe Lelan

Nyankeu sabab dum jigisa  
Budi basa jijak pandang  
Hingga teuma haba nyang toe  
Po samlakoe lon peugah ban

Neueu rakyat abeh jiwoe  
Bak siuroe Cut Peureudan  
Ubak Kadi neutueng pakat  
Musyawarat ngon cut abang

'Oh lheueh banta musyawarat  
Neukrah rakyat sigala alam  
Abeh jitren ureueng gampong  
Meusinthong bak kuta dalam

Peureudan Ali neubri hukom  
Ban nyang meufom inong agam  
Neusie keubeue dua lhee ploh  
Nyang meureugoh leumo agam

Bak uroe nyan sare riyoh  
Tunong Baroh ureueng datang  
Taguen ngon bu neukhanduri  
Alem faki neuyue khatam

Neupeuwoe thon mate abi  
Banta neubri seudeukah sajan  
Srah ngon ulee pirak lipat  
Ubak jeurat me ngon idang

Putroe-potroe dum meusapat  
Peulheueh hajat Putroe Lelan  
'Oh lheueh banta neusrah ulee  
Bungong keumee ate seunang

Aneuk ngon nang duek di juree  
Teuduek dilee nyang haba nyan  
Teuduek kisah po cut banta  
Calitra keu deh meuriwang

Jinoe lon kheun Cut Keumala  
Sireuta ngon inong leumbam  
Mantong jihue keu deh keu noe  
Jeuep-jeuep nanggroe taloe jalan

'Oh sare troh tujoh uroe  
Troh jipeuwoe bak sulotan  
'Oh troh keu nan dalam kuta  
Yoh nyan raja hukom rijang

Raja putoh hukum sigra  
Ban sikada undang-undang  
Si Nyak Jeumpa neuyue koh jaroe  
Raja nanggroe suroh meunan

Mangat teuingat ureueng nanggroe  
Barangasoe bek roh meunan  
Lheueh raja koh jaroe Si Jeumpa  
Cut Keumala laen macam

Peulop lam glap leubeh hina  
Saboh kama that seupot klam  
Geuboh rante jaroe gaki  
Lam glap sunyi sinan diam

Ie han geujok bu han geubri  
Padum lawi nyang bu meunan  
Hingga lon kheun haba nyang toe  
Adeueb putroe dalam bagan

Umu nam buleuen teuma dudoe  
Lakee keudroe Cut Peureudan  
Adat meukon banta lakee  
Hana teuntee lawet lawan

Raja Ahmad sit ka tathee  
Sit ka dilee kreueh ngon ceukang  
Peureudan Ali ate cidah  
That neupapah keubajikan

Padum-padum bunda lam sosah  
Banta indah hana troh dam  
Hana ku'eh hana deungki  
Tuhan neubri that budiman

Saleh ate intan buleuen  
Tan meuteumeung laen urang  
Han tom neudhot sidroe ureueng  
Rakyat bandum gaseh sayang

Nyangkeu ureueng utak peunoh  
Hana saboh na teuladan  
Alempi na akaipi jroh  
Buleuen peunoh sangat ajam

Lawet banta keu nan neuwoe  
Ureueng lakoe that sukaan  
Hana peue le lon hareutoe  
Ka lheueh bunoe dum lon bayan

Jinoe teungku haba nyang toe  
Bek that laloe lon keumarang  
'Oh lheueh neusuet tuan putroe  
Lheueh ngon jaroe meumat tangan

Abeh ampon dum sinaroe  
Bandua droe meurdekaan  
Bitpi ampon ureueng dua  
Si Nyak Jeumpa nyang that sayang

Sabab jaroe siblah hana  
Keupeue guna tumbon badan  
Nyankeu hai nyak beutapike  
Barangsoe le gata intan

Bek roh sagai buet nyang jahe  
Teukeuse menyeusai datang  
Bek tapandang peng lhee ringget  
Meupalet di akhe tuan

Tuboh payah ate saket  
Keupeue ringget rusak badan  
Padum-padum malee mata  
Ngon syeedara dumna rakan

Peue lom hai nyak tuboh luka  
Seudang mata tiwah mandang  
Jeuetkeu dumnan lon peuingat  
Bek panyang that jeuet keu wayang

Soe meutuah cit geuingat  
Amanat nibak cut abang  
Hikayat nyoe hai boh ate  
Sit lam sabe meuwoe ulang

Ban ie paseueng ateueh pante  
Siat ile siat datang  
Nyankeu mise hikayat nyoe  
Meujak meuwoe hana reunggang

Siat raja siat putroe  
Siat kamoe nyang keumarang  
Jeuetkeu dumnan haba ulon  
Meuah ampon dumteu tuan

Barang salah meuah ampon  
Assalam 'alaikom bandum rakan  
Amma bakdu piyoh siat  
Di lon hajat jak u peukan

Lon jak kalon ureueng meukat  
Lagot dit that tanggung bulan  
Euntreuk malam lom lon surat  
Meuna hayat udep badan

Lon lakee bak Rabbon Kade  
Beumeusampe lon keumarang  
Uroe malam lam lon pike  
Teuingat sabe Cut Ariyan

Saleh cit ek lon peutamam  
Saleh meuhad 'oh noe diam  
Goh lom teuntee wahe sahbat  
Lon harap bak sidroe Tuhan

Bahle dumnan haba kamoe  
Le nibak nyoe jeuet keu wayang  
Teuduek siat dilee 'oh noe  
Keudeh jinoe lon peuriwang

Miseue bungong marairi  
Di pasi timoh meureuntang  
Bahle teuduek haba cakri  
Ahmad Kasari lon peugah ban

Lawet neuwoe po cut banta  
Muka raja cit lam masam  
Sabab neungieng rakyat dumna  
Ceundrong bak banta sikalian

Raja Ahmad yoh nyan teupike  
Dalam ate meunoe macam  
Meunyo meunoe sabe-sabe  
Kee di akhe grop lam kubang

Si Cut Ali akai le that  
Akhe meuhad jih sulotan  
Nibak dudoe lon meularat  
Bahle leugat kujak peutrang

Meunan pike raja nanggroe  
Bak siuroe meunoe macam  
Duek meusapat deungon adoe  
Marit meunoe di hadapan

He adek cut banta muda  
Deungo haba bak cut abang  
Pulang nanggroe hukom gata  
Han le daya ulon tuan

Ka neuseuot po samlakoe  
Neukheun meunoe bak cut abang  
Di lon dalem lon woe keunoe  
Kon nanggroe lon jak peutimang

Sabab di lon keu noe gisa  
Sabab bunda dalam bagan  
Lom neuseuot puteu raja  
Hai adekda beuthat meunan

Buet nyang ka lheueh ka teulanjo  
Adoe e pakri lon paban  
Bek le adoe tameututo  
Teulanjo salah cut abang

Aduenteu nyoe akai kureueng  
Sit ka maklum gata intan  
Taboh leubeh taweuek kureueng  
Han le linteueng baranggajan

Meunan neukheun poteu raja  
Seungap banta han le kalam  
Abeh narit ngon syeedara  
Bandua beudoh le rijang

Maseng-maseng woe u teumpat  
Raja Ahmad seungap kalam  
Nyoe lon peugah pirak lipat  
Le that rakyat ireng sajan

Padumna trep sinan laloe  
Malam uroe sajan rakan  
Lawet lawan teuma dudoe  
Po samlakoe bak masa nyan

Neupeukawen Meuntroe Sakdi  
Judo neubri nyan dendayang  
Dendayang nyan na taturi  
Ngo lon kheun kri dumteu tuan

Nyankeu ureueng peulheueh banta  
Dilee masa dalam tahan  
Yoh aduen glap dalam kama  
Cut Seutia dua sajan

Nyankeu ngon nyan neupeukawen  
Puteh licen kulet badan  
Ngon peukayan dum neusalen  
Ate ngeuren meuntroe pahlawan

Areuta ngon cawan pingan  
Abeh keu nan banta pulang  
Keubeue leumo umong di blang  
Sikalian neujok keu nan

Nyang jeuet abeh neupulang keu nan  
Yue peutimang Putroe Lelan  
Lheueh peukawen Meuntroe Sakdi  
Peureudan Ali kheun bak abang

Ubak aduen banta kheun kri  
Wasiet neubri meunoe macam  
Wahe dalem deungo lon nyoe  
Keurajeuen nanggroe ka neupulang

Jinoe gata badai kamoe  
Peugang nanggroe ngon pahlawan  
Kareuna lon kuwoe keu deh  
Beutapateh nyoe peuneusan

Aneuk nanggroe beutagaseh  
Bek peujayah dum sibarang  
Gata dalem taduek dahsyah  
Nyang peurintah meuntroe pahlawan

Akai gata beutaubah  
Peurintah han jeuet kreueh ceukang  
Bek tom tadhoh aneuk nanggroe  
Baranggasoe beusa seudang



'Oh jitakot keu geutanyoe  
Jiboh nanggroe plueng lam hutan  
Kadang aneuk ureueng tuha  
Gata raja alang-peualang

Bak pihak that malee mata  
Jibungka han le jiriwang  
Meuka abeh dum jibungka  
Pat taraja lom lam kubang  
Beutapateh kheun adekda  
Beuthat tuha gata abang  
Meunan narit Peureudan Ali  
Ahmad Kasari tahe mandang

Abeh bandum banta kheun kri  
Po Cut Ali nyang that ajam  
Lheueh nibak nyan po samlakoe  
Peukeumah droe rakyat sajan

Ngon syeedara si nyak putroe  
Sajan lakoe Meuntroe Adan  
Lakee idin ubak bunda  
Dum sireuta laen sajan

Rot deh rot noe sret ie mata  
Jamong rugha bak masa nyan  
Han soe tukri geumeumoe-moe  
Rot deh rot noe aneuk ngon nang

Geumeumat-mat gaki jaroe  
Saboh bagoe com bak badan  
Dendayang bandum jipoh-poh droe  
Lam meuligoe sare kiam

Lagee bangon ureueng mate  
Weueh that ate aneuk ngon nang  
Ureueng nanggroe moe dum sare  
Panyot kande that jisayang

Teungoh kiroh lam meuligoe  
Po samlakoe neutren rijang  
Idin ka lheueh nibak ma droe  
Bungka jinoo Cut Peureudan

Sireuta ngon Putroe Juho  
Ie mata ro taloe jalan  
Bungka laju bungong kundo  
Rakyatpi le seutot sajan

Ureueng nanggroe na peuet reutoh  
Neusuroh le Putroe Lelan  
Neuyue intat meuh seuneupoh  
Nanggroe jeuh peurjalanan

Meuntroe Sakdi tinggai sinoe  
Peukong nanggroe ngon cut abang  
Ka lheueh banta kheun hareutoe  
Ngon bunda droe yue peutimang

Jarussalam masa jinoo  
Asoe nanggroe got that aman  
Han le jijak keu deh keu noe  
Bansinaroe ate deundam

'Oh lheueh jingo tuto banta  
That meurasa dumna urang  
Lompi meuntroe badai banta  
Ubah hana ban surohan

Mangat ate dum jiturot  
Ban nyangpatot dum atoran  
Konkeu lagee nyang ka u likot  
Le that karot buet cut abang

Meuntroe Sakdi mat peurintah  
Suroh titah Ali Peureudan  
Ban nyang,neuyue hana ubah  
Teuduek kisah meuntroe pahlawan

Nyoe lon peugah po cut banta  
Sajan Raja Meuntroe Adan  
Bungka laju rot lam rimba  
Neumeusafa uroe malam

Teutap banta neubeurangkat  
Sajan rakyat rot lam hutan  
Teuduek haba pirak lipat  
Nyoe lon sambat laen syahdan

Jinoe teungku balek lagee  
Miseue dilee bak le meunan  
Amma bakdu meudeh dilee  
Wahe sampee hajat kamoe

Meunyo keunong taboh lagee  
Galak teuntee barangasoe  
Lagee haba ureueng tuha  
Meujroh rupa jingieng laloe

Meunyo makmu le areuta  
Jamee teuka geunap uroe  
Meunyo keunong bak taato  
Ureueng tahe galak keudroe

Nyoepi meunan hai teungku e  
Lon ato beumeuduek adoe  
Lom bacut treuk haba maja  
Adat donya reusam nanggroe

Meunyo ek tabri dum beulanja  
Di nap mata that jipujoe  
Meukon meunan hana sakri  
Seundiri taingat keudroe

Jeuetkeu dumnan haba cakri  
Laen lagi lon kheun jinoe  
Nyoe lon peugah rakan sireutoh  
Banta suroh yoh saboh roe

Nyang neuyue jak nanggroe musoh  
Dum abeh troh keu deh sampoe  
Ban nyang neuyue tan meutuka  
Meukat ija keu deh keu noe

Ladom jajak ubak raja  
Peugah haba jipeujok droe  
Nyang dua droe leubeh areh  
Di jih keu deh ka jipeutoe

Ka jajak bak Raja Syareh  
Jibloe gaseh raja pindoe  
Jipeugah droe ureueng aseng  
Nanggroe laen bandua droe

Jipeugah nan Teungku Cut Ben  
Akai canden utoh han soe  
Meudeh meunoe jibicara  
Sajan raja malam uroe

Jitueng ate poteu raja  
Gaseh tuka ho siuroe  
Peugah habapi tahat utoh  
Padan jiboh meudeh meunoe

Jigaseh le raja biyoh  
Sampoe jibohjih keu meuntroe  
Galak ate Teungku Cut Ben  
Sangat ngeuren jeuet keu meuntroe

Jeuet keu namiet sidroe rakan  
Keuhinaan geupeu jeuet droe  
Ija tuha ngui bak badan  
Dum peukayan ruya-rayoe

Nyanpi saboh that meuteuntee  
Geuplah rujee geunap uroe  
Adat putroe tanyong kayee  
Awai dilee buet teungku nyoe

Dua gop nyan dua macam  
Hana saban maseng keudroe  
Rakan Cut Ben teuduek 'oh nan  
Lon peugah ban raja nanggroe

Raja Syareh aneuk saboh  
Putroe jroh rupa sambinoe  
Han jeuet hai nyak tameuteuoh  
Sang tijoh ie mtaa keudroe

Raja boh nan Hindi Licen  
That meuleng-leng cahya gigoe  
Soe nyayang kalon Hindi Licen  
Le that gigeng ureueng nanggroe

Bak masa nyan hana laen  
Leubeh canden nyankeu putroe  
'Oh takalon ate ngeuren  
Nyum bek tatren di meuligoe

Meunankeu nyum nibak rasa  
Beuthat raja meuntroe-meuntroe  
Han peue panyang lon peuhaba  
Maklum sit ka dum geutanyoe

Nyoe lon peugah Hindi Licen  
Han tom jitren di meuligoe  
Bak sibuleuen siblet jitren  
Jisalen ija bak asoe

Meunan sabe baranggajan  
Lawet intan umu sampoe  
Hingga teuma lawet lawan  
Bak simalam si nyak putroe

Putroe jieh ateueh geuta  
Dalam indra leumah lumpoe  
Na nyum jitren awan miga  
Glap gulita seupot nanggroe

Teutap meuntroe dalam pike  
Bungong pade lon hareutoe  
Lheueh jimanoe gleh ngon kalang  
Jiwoe rijang u meuligoe

Ate sosah sangat bimbang  
Cut meusubang seungap keudroe  
Tan jipeugah sidroe ureueng  
Han tom jikheun haba lumpoe

Teutap sosah po cut meugleueng  
Jinoe lon kheun ayah putroe  
Raja Syareh saboh masa  
Jicok kaca ka jiloh droe

Leumah jieu nibak muka  
Parot luka mantong bak dhoe  
Yoh talo prang masa dilee  
Bak plueng kajee reubah keudroe

Reubah bak plueng keunong batee  
Raja asee plueng that tanggoe  
Ban jikalon parot ulee  
Sangat malee raja pin্দoe

Lom teuingat Meuntroe Sakdi  
Ka gop taki keunong taloe  
Yoh masa nyan raja 'asi  
Jihei kadi hakim sidroe

Troh le keu nan hakim guree  
Pakri lagee takheun jinoe  
Ulonteu nyoe sangat malee  
Yoh prang dilee talo kamoe

Ngon parot han jitem puleh  
Sangat peudeh ate lon nyoe  
Lompi meuntroe nyang kugaseh  
Jidrop keu deh pakri jinoe

Jicok putroe uleh awan  
Jiteureubang keudeh jipeuwoe  
'Oh troh keudeh putroe intan  
Jeuet awan keu matauroe

Si nyak putroe hayut badan  
Dalam pangsang meunan bagoe  
Meunankeu nyum nibak rasa  
Teuma jaga bak meulumpoe

Ban teukeujot beudoh sigra  
Sampoh mata teuduek keudroe  
Teuingat le keu rahsia  
Cut meutia yoh nyan jimoe

Teubiet reuoh basah ija  
Sret ie mata pike keudroe  
Hingga teuma haba nyang rab  
Teubiet leugat matauroe

Putroe beudoh buka tingkap  
Pirak lipat tren u seuramoe  
Jimeuhei le ngon dendayang  
Cutda badan beudoh keu noe

Teuma beudoh dua sajan  
Cut intan jitren jak manoe  
Meuntroe Cut Ben yoh nyan neueu  
Putroe lalu jijak keudroe

Bak neupandang keunong laku  
Abeh neueu gaki jaroe  
Meuntroe yoh nyan meunoe kira  
Lam ate ka meunoe bagoe

Bah kubri thee ubak banta  
Aneuk raja that sambinoe  
Meunan leumah dalam ate  
Hana lahe seungap keudroe

Cuba kalon dalam kitab  
Pakri ayat keunong uroe  
Yoh nyan guree buka kitab  
Jikalon bab bileueng jaroe

Abeh jingieng keu noe keu deh  
Di dalam tef jeuep-jeuep sagoe  
Jitop kitab jitiek keu deh  
Jikheun meuceh ampon kamoe

Dalam kitab lon eu leumah  
Han ek ilah tuanku droe  
Peureudan Ali leubeh tuah  
Gadoh meugah baranggasoe

Bandum raja gadoh agam  
Cut Peureudan that seureuloe  
Akai lisek sangat ajam  
Utoh jifam dum jeuep-jeuep syoe

Sangat haloh jibicara  
Rahsia nyang dalam nanggroe  
Di gop baro ajok cuba  
Di banat jithee ka baroe

Meunan leumah dalam kitab  
Nyang meuhad neupike keudroe  
Nyang got bak lon ampon deelat  
Bek neukarat le bak buet nyoe

Yoh nyan seuto raja asee  
Han kumalee akai ragoe  
Kuba rakyat meuploh ribee  
Pane lagee meujih sidroe

Hakim guree seuto pantah  
He khalifah pateh lon nyoe  
Meunyo tuanku that neugagah  
Roh teulah lon takot dudoe



Masa dilee yoh neujak prang  
Neupeugah nan raja nanggroe  
Adat kuthee Cut Peureudan  
Cit ka kutham yoh saboh roe

Hakim guree that-that jitham  
Jipateh han raja pindoe  
Raja Syareh meuhei bujang  
Mari abang gata keu noe

Bujangpi troh keu nan pantah  
Raja peugah jak lam nanggroe  
Beutroh ubak raja dua blah  
Kayue langkah laju keu noe

Kayue jime ngon alat prang  
Angkatan bandum sinaroe  
Kapeugah lon jak tuntutan prang  
Beurijang laju uroe nyoe

Bujang beudoh jijak leugat  
Timu Barat jak hareutoe  
Leupah bujang jak beurangkat  
Teuduek siat dilee 'oh noe

Nyoe lon peugah ureueng bungka  
Rakan banta sireutoh droe  
Teungku Cut Ben nyang keupala  
Meuntroe raja ka jeuet jinoe

Raja Syareh beungehjih that  
Musyawarat masa bunoe  
Teungku Cut Ben tupeue pakat  
Peugot surat laju keudroe

Haba surat meunoe macam  
Cut Peureudan ampon kamoe  
Raja Syareh jituntut prang  
Gata intan ingat keudroe

Ka jipange raja dua blah  
Le that syeekah raja pindoe  
Bak peunyum lon jicok langkah  
Buleuen lemah dua blah uroe

Bitpi meunan hai Peureudan  
Saboh padan na bak kamoe  
Aneuk raja putroe intan  
Rupa cit ban matauroe

Nama Putroe Hindi Licen  
Bintang canden goh na lakoe  
Watee abeh rakyat jitren  
Adat tatem beutroh keu noe

Nibak dali deungon adat  
Bungka rakyat soh ngon nanggroe  
Adat tatem tajak siat  
Pirak lipat jak ngieng keudroe

Meunan haba Teungku Cut Ben  
Surat geukirem keu samlakoe  
Hingga teuma rakan laen  
Maseng-maseng surat keudroe

Bandum rakan peugot surat  
Geuyue intat keu deh jinoo  
Lepah rakan peuwoe surat  
Teuduek siat dang-dang sampoe

Puteh kuneng bungong meulu  
Panyot lampu di meuligoe  
Teuduek 'oh nan saboh laku  
Amma bakdu laen jinoo

Nyoe lon peugah po cut banta  
Dalam rimba teungoh neuwoe  
Sajan po lem sama-sama  
Lakoe cutda raja meuntroe

Uroe malam neujak leugat  
Sajan rakyat dum sinaroe  
Padumna trep neubeurangkat  
Sampoe hajat nanggroe meuntroe

Pusong Rawa jinoe ka troh  
Sinan piyoh dum sinaroe  
Dua uroe tho ngon reuoh  
Meuh seuneupoh neulakee droe

Yoh nyan meuntroe tambah rakan  
Cut Peureudan laju neuwoe  
Sajan rakyat dumna rakan  
Sampoe datang kuta nanggroe

Troh lam kuta banta intan  
Seumbah tuan ayah putroe  
Poteu raja neujok tangan  
Aneuk badan ka troh tawoe

Yoh nyan banta neupeugah le  
Awai akhe neuhareutoe  
Lheueh nibak nyan bungong pade  
Yue peuase dum sinaroe

Dumna rakan yue bri teumpang  
Pirak lipat ingat keudroe  
Maseng-maseng ban nyang pangkat  
Ban adat atoran nanggroe

'Oh lheueh piyoh dum ureueng le  
Bungong kundo ek rumoh droe  
Banta neuek troh 'oh pinto  
Beudoh meusye si nyak putroe

Jijak seumbah teungku abang  
Cut Peureudan sampoh bak dhoe  
Po Cut Ali duek bak tilam  
Ariyan reuoh meutaloe

Hingga teuma haba nyang rab  
Pirak lipat sajan putroe  
Deungon rakan ureueng intat  
Sinan teutap duek sinaroe

Ayah putroe Adil Parisi  
Han geutukri galak han soe  
Sie ngon keubeue neukhanduri  
Cut Ali rakan jipeuwoe

Mangat ate poteu raja  
Meukeurija geunap uroe  
Leubeh cidah neupeumulia  
Rakan banta jeuoh nanggroe

Meunan sabe jeuep-jeuep watee  
Teuduek dilee siat 'oh noe  
Teuduek haba bungong keumee  
Ureueng dilee lon kheun jinoo

Nyoe lon peugah si me surat  
Jikarat laju jipeuwoe  
Padumna trep jibeurangkat  
Sampoe hajat troh u nanggroe

Tamong laju dalam kuta  
Ubak banat laju jipeutoe  
Lheueh horeumat peugah haba  
Sireuta ngon jipeujaroe

Peureudan Ali sambot surat  
Neuploh lipat neungieng asoe  
Awai akhe banta lihat  
Neutupat laba ngon rugoe

Bak watee nyan Peureudan Ali  
Beudoh peureugi keu deh keu noe  
Cut banta jak ulee ili  
Neurawi dalam ate droe

Keu deh keu noe pike syawe  
Peungeuh ate that samlakoe  
Abeh meufom dalam ate  
Neupeugot le surat keudroe

Peugot surat rijang-rijang  
Di dalam haba nyang tanggoe  
Lipat surat jok bak rakan  
Jak riwang keu deh beusampoe

Beutroh ubak Meuntroe Cut Ben  
Dan laen bandum sinaroe  
Bek jithee le ureueng laen  
Haba baten dum dalam nyoe

Abeh wasiet Cut Peureudan  
Beudoh rakan bandua droe  
Bungka laju rot lam hutan  
Jisrang-abrang padum uroe

Jinoe lon kheun haba nyang rab  
Lon rapat nak rijang sampoe  
'Oh troh keu deh jime surat  
Jijok leugat maseng bak droe

Abeh maklum dum habaran  
Ube rakan sabe keudroe  
Teuduek siat haba rakan  
Lon peuriwang po samlakoe

Jinoe lon kheun banta indah  
'Oh lheueh leupah rakan bunoe  
Neuyue seutot ureueng meugah  
Lakee langkah u meuligoe

Ureueng patot panglima prang  
Uleebalang imum nanggroe  
Neuyue seutot Meuntroe Adan  
Cut abang lakoe cut putroe

Teuma beudoh teuku bujang  
Jak peugah ban narit tanggoe  
Troh le keu nan dum sibarang  
Hana meujan padum uroe

Abeh bandum ka meusapat  
Duek meuhadap ngon samlakoe  
Po Cut Ali marit leugat  
Neuangkat dua blah jaroe

Nyang lon pangge dumteu tuan  
Saboh padan lon tanyong nyoe  
Raja Syareh jituntut prang  
Uleebalang pakri jinoe

Teuma seuot dum peutua  
Hai meukuta nibak kamoe  
Meunyo jiprang lawan saja  
Nyang bicara hana sinoe

Lom neuseuot Cut Peureudan  
Meunyo meunan deungo lon nyoe  
Na bak ulon saboh padan  
Bek talawan raja pindoe

Peue faidah tameupake  
Beuthat kaphe boh barangsoe  
Nyang na saja rakyat mate  
Teukeuse beulanja rugoe

Bitpi meunan meunyo ase  
Lon meupike laen bagoe  
Tacuba eu balek lagee  
Boh tatipee aneuk bisoe

Meuhan ase bak tatipee  
Baro mee talawan dudoe  
Nyoe lon peugah dum amanat  
Beutaingat dum sinaroe

Meuna umu lon seulamat  
Jarak siat lon di sinoe  
Adat teuka keu noe sitree  
Beuthat sukee meuploh katoe

Nyang talawan cit bek dilee  
Meugoh lom mee troh ulon woe  
Bandum gata duek lam kuta  
'Oh watee ka trohjijh keu noe

Meusidrooe bek dong di lua  
Tajaga beukong bak sagoe  
Ase nyang bek tabri tamong  
Ngon reunong tapeh bak gigoe

Pageue nyang brok ikat beukong  
Pacang taglong dum tagantoe  
Ingat beuthat dumteu rata  
Kawai kuta malam uroe

Jeuep-jeuep sagoe beuta jaga  
Jeuep-jeuep kuta beumeuasoe  
Lagee lon kheun meunyo ubah  
Roh teulah binasa dudoe

Meunan neukheun banta indah  
Neupeugah laba ngon rugoe  
Rakan seutot insya Allah  
Han peue salah tuanku droe

Abeh wasiet ngon amanat  
Pirak lipat peuse droe  
Cukop ase dumpeue leungkap  
Neubeurangkat reumbang uroe

Banta neujak balek lagee  
Ija bajee ruya-rayoe  
Kupiyah brok nibak ulee  
Peugot lagee jak geumadoe

Cut Peureudan sangat utoh  
Leubeh haloh akai rago  
Tamong uteuen peukoh aroh  
Puteh leusoh neujak sidroe

Leupah banta neubeurangkat  
Payahneu that malam uroe  
Teuduek haba pirak lipat  
Nyoe lon upat raja pindoe

Amma bakdu meuwoe keu deh  
Anta Ladeh nanggroe raya  
Jinoe lon peugah Raja Syareh  
Aneuk paleh beungeh lagoina

Abeh bandum jikrah rakyat  
Dum lat batat sianika  
Dua blah raja ka meusapat  
Le that rakyat si ceulaka

Bujang peuron dum sigala be  
Abeh sare tuha muda  
Nyang ek me brat sigantang pade  
Han jeuet pike tanggoh lusa

Ka meusapat uleebalang  
Panglima prang teuga-teuga  
'Oh troh keu nan dum sibarang  
Bet le rijang jaroe dua

Ampon tuanku meukuta nanggroe  
Dumna kamoe abeh teuka  
Uleebalang imum nanggroe  
Dum sinaroe maharaja

Peue tuanku suroh titah  
Deelat peugah jinoe sigra  
Raja Syareh seut pantah  
Ngo lon peugah he syeedara



Lon meutanyong toh eleumee  
Pakri ban mee nibak gata  
Ulonteu nyoe sangat malee  
Parot ulee mantong bak muka

Pakri laku adoe meutuah  
Lon ka teuhah tan le ija  
Adat tatem taseuleuah  
Meubek leumah that anggeeta

Dum peutua seuot pantah  
Bek neugundah po meukuta  
Jinoe patot prang tagagah  
Taheumpah beujeuet keu sira

Neueu kulet prang kupagap  
Ngon siat kuhanco kuta  
Pajan tuanku neubeurangkat  
Peugah leugat toh kutika

Raja Syareh seuot leugat  
Uroe Ahad bek tabungka  
Meuka ase cukop alat  
Singoh meuhad lon kubungka

Hingga teuma haba nyang toe  
Bek malam nyoe eh lam kuta  
Singoh beungoh teubiet uroe  
Raja pindoe jimeuhaba

Ho ka gata uleebalang  
Panglima prang dum sireuta  
Bek le taeh beudoh rijang  
Ikat pinggang lon kubungka

Yoh masa nyan ureueng kaphe  
Jibeudoh le ikat ija  
Jicok peudeueng sawak beude  
Hana pike seuu raya

Cukop ase sileungkapan  
Meugrum geundrang bak peutua  
Yup seurumpet peh bunyian  
Bungka yoh nyan si ceulaka

Dum peurasan han ek peugah  
Le that syeekah balatantra  
Rakyatjih le that barollah  
Juah-juah mirah mata

Bungka laju rot lam uteuen  
Aneuk bajeueng le lagoina  
Binatang gle abeh jiplueng  
Badeuek rimueng gajah singa

Sabab le that ureueng kaphe  
Jiarong gle peukoh rimba  
Abek karu binatang gle  
Jiplueng sare han jikira

Leupah kaphe jibeurangkat  
Teuduek siat si ceulaka  
Nyoe lon peugah pirak lipat  
Mantong sisat dalam rimba

Sabab neujak jalan jeuoh  
Cut Ali beh that meulingka  
Bek meurumpok deungon musoh  
Puteh leusoh meunan kira

Nyankeu sabab banta boh droe  
Lam-lam duroe neubloh lanja  
Beukah ija luka asoe  
Samlakoe hana neukira

Bukon sayang bungong pade  
Sit lam sabe peukoh rimba  
Padum lawët neuarong gle  
Jinoe troh le nanggroe raya

Troh u nanggroe Anta Ladeh  
Ate puleh po cut banta  
Po Cut Ali sangat areh  
Keu noe keu deh' rakan neumita

Meuteumeung le ngon rakan droe  
Sit ka baroe jipreh banta  
Sabab surat ka lheueh tanggoe  
Samlakoe janji neuteuka

Rakan banta tinggai sinan  
Dua urang di lua kuta  
Rakan laen leupah bak prang  
Turot reusam si ceulaka

Na sidroe treuk nak geunap lhee  
Nyang plah rujee dalam kuta  
Bandum rakan cit ka jithee  
Bungong keumee janji lheueh ka

Yoh masa nyan Peureudan Ali  
Beureunti sajan syeedara  
'Oh troh malam watee sunyi  
Cut Ali tamong lam kuta

Cut banta ngui ngon peukayan  
Dum bee-beewan boh bak ija  
Minyeuk gahru neungui intan  
Peureudan rahop bak muka

Jiek jahet meujeureulang  
Lang-geumilang that ie muka  
Miengpi licen bak tapandang  
Kulet badab meucuaca

Troh lam kuta Peureudan Ali  
Neutiti meuligoe raja  
Boh hekeumat teupeuro gunci  
Cut Ali tamong istana

Troh u rumoh Cut Peureudan  
Duek bak tilam cok ceurana  
Pajoh ranup dalam puan  
Bibi hitam meucuaca

Hindi Licen teungeut keudroe  
Banta peugoe ngon bicara  
Po Cut Ali cok rampagoe  
Samlakoe keuting ceurana

Cut putroe jaga han jitem  
Hindi Licen sangat indra  
Po Cut Ali akai canden  
Neugiseng keuleumbu kaca

Teupéh asoe putroe linteng  
Prieh beureusen lalu jaga  
Ban neudeungo ka beureusen  
Banta maken keuting ceurana

Putroe beudoh mameung-mameung  
Tahe hireuen jingieng banta  
Jimeung marah han jijeuet kheun  
Sabab jingieng ateueh rupa

Jieu hibat that samlakoe  
Sang bagoe buleuen purnama  
Kuyut ate kuyut asoe  
Tahe keudroe putroe muda

Salam ate bungong teuprom  
Sang gop nyoe kon manusia  
Nyang ka dilee kueue han tom  
Jinoe pakon keu noe teuka

Saleh cit jen saleh insan  
Han kutuban saleh raja  
Saleh cit nyoe biek sulotan  
Ngon rupa ban bintang kala

Saleh cit nyoe nyang lon lumpoe  
Dilee puree saboh masa  
Awan jitren jitueng kamoe  
Jeuet keu uroe teuma sigra

Meunan leumah dalam ate  
Panyot kande hana nyata  
Yoh masa nyan bungong pade  
Neumeusu le po cut banta

Rajawali ateuh pinto  
Aneuk tulo dalam cintra  
Pakon po cut tahe gante  
Peue teusawo dalam dada

Baro meusu si nyak putroe  
Tahe lon nyoe that keu gata  
Sabab dilee han tom keu noe  
Cit malam nyoe lon eu rupa

Suot banta meunoe neukheun  
Hai buleuen intan peurmata  
Lon boh gampong deungon mideuen  
Cut meugleueng lon jak eu gata

Lom jiseuot Putroe Hindi  
That beurani lagoe gata  
Lon ngo tuto that meutakwi  
'Ajab sikali bak ri rupa

Di cong iboh aneuk tiyong  
Di cong nibong leuek bangguna  
Peue na hajat teungku ampon  
Neujak eu lon han tom nyang ka

Po Cut Ali lom kheun meunoe  
Sambinoe miseue peunawa  
Hajat di lon boh bak asoe  
Hai putroe keu ubat luka

Si nyak putroe bacut teukhem  
Jipaleng u likot muka  
Lom jimeusu Hindi Licen  
Tuto dalem that peurbula

Miseue geukheun bak sirahet  
Ateueh buket ie meumata  
Naritteu nyan sang meupalet  
Meusingklet han meupat punca

Nyangkeu lon kheun that meutakwi  
Han lon tukri ingat makna  
Lom kheun banta Peureudan Ali  
Hai cutti bek salah sangka

Laksana proe hai bungong meuluri  
Keumang meuseuti cit uroe sinja  
Napsu lon deundam mayoh beureuhi  
Teugoh ngon janji sambat seutia

Puteh di laot jalo kawé  
Hitam ateueh gle tungoe sala  
Puteh di babah mirah bak ate  
Peunyaket sabe dalem bak gata

Meunan jikheum si nyak putroe  
Seuot meunoe banta muda  
Sabet beuna ban lon kheun nyoe  
Sambinoe ubah cit hana

Kapai Beulanda di bineh pasi  
Aron meuriti di mieng kuala  
Lagee di ate meunan di bibi  
Page bak titi blang padang masya

Uteuen sineubok lon niet padang  
Buket manyang lon niet data  
Kareueng meupapet lon jeumeurang  
Beurcintaan cit keu gata

Lon thee gata manikam jroh  
Bek teuboh rugoe meubara  
Nyankeu sabab jeuet lon satoh  
Lon adoe jroh tanda seutia

Ayah gata hai boh ate  
Kawom kaphe seumbah beurala  
Jinoe gata bek meunan le  
Riwang boh ate bak agama

Deungo po cut nyoe habaran  
Peuneusan narit mulia  
Kadang mate ulon tuan  
Tinggai intan tueng pusaka

Deungo beudeuh kheun cut abang  
Lon bayang ngon basa Jawa  
Sipeurti ban syae Meulayu  
Aneuk tuanku wajib peucaya

Kalee bulan eumpat blah hari  
Tranglah cahya langet dan bumi  
Kalee adekda intan juhari  
Peurcayalah intan peungajaran ini

Seumbahlah Tuhan Rabbon 'Izzati  
Ikot peurintah Muhammad Nabi  
Jangan dilupa malam dan hari  
Junjonglah titah Tuhanku Rabbi

Kalee adekda aneuk bangsawan  
Ingatkan budi Tuhan jadikan  
Sudah dijadi nyawa dan badan  
Tangan kaki hati dan lisan

Wajib juga dijunjong titah  
Barang disuroh jangan beurbantah  
Juga jangan keurija nyang salah  
Wajib dijawoh barang nyang teugah

Meunurot hukom agama Islam  
Jangan sikali makan nyang haram  
Agama kaphe wajib dibuang  
Keumbali diri keupada Islam

Agama Islam intan peurmata  
Laksana lampu di dalam kaca  
Adekda jangan beursalah sangka  
Hatenya jangan keuna peurdaya

Jangan meungikot iblih dan syetan  
Sabab beurlindong nyang keubajikan  
Kalee suka nyang keujahatan  
Akhirat jadi meuseuti datang

Wajib adekda takot keu mati  
Di donya tidak lama beureunti  
Tidaklah teuntee peutang dan pagi  
Malaikat mawot nyawa diambil

Beuratos tahon hidop di donya  
Meuseutilah kita tinggaikan dia  
Beusar keucil miseukin dan kaya  
Di dalam tanoh teumpat seudia

Sikalipon raja nyang amat sakti  
Meumpunyai asyka beuribu kati  
Biar seumbunyi da dalam peuti  
Malaikat mawot dapat dicari

Meunan neukheun po samlakoe  
Le that bagoe laenpi na  
Putroe Hindi hireuen laloe  
Dum geupasoe dalam dada

Dalam tahe si nyak putroe  
Po samlakoe marit lanja  
Jinoe gata hai sambinoe  
Jak lon peuwoe nanggroe hamba



Meunyo teutap sinoe sabe  
Roh takaphe dudoe gata  
Nyang got bak lon hai boh ate  
Bek le pike po jroh rupa

Ureueng binoe ate leumoh  
Sang gadoh akai bicara  
Lompi banta rupa that jroh  
Buleuen peunoh beureuhi teuka

Si nyak putroe tahe mandang  
Cut Peureudan lom meuhaba  
Pakon taiem putroe intan  
Sikrak kalam hana taba

Si nyak putroe tan jiseuot  
Meujibet tan bulee mata  
Teungoh ingat cut bintang sret  
Nyoe nyang ka trok lumpoe hamba

Bitpi putroe dalam pike  
Nyang ate keu deh bak banta  
Ka jiek grak bungong pade  
Cut kande nafah ka raya

Po cut banta cit neukhem-khem  
Bintang canden peugah haba  
Yoh masa nyan Hindi Licen  
Ate ngeuren that keu banta

Banta kalon meunan laku  
Lom neumeusu meunoe haba  
Ulonteu nyoe sang ban laku  
Sigeutu hana meuguna

Peue nyang lon kheun teuboh keudroe  
Gotkeu jinoe lon jak gisa  
Neubeudoh le po samlakoe  
Neueu ujoe aneuk raja

Banta beudoh jak bak pinto  
Putroe tajo mat bak ija  
Piyoh dilee uleebalang  
Pakon rijang le neugisa

Bek tuanku ate gigeng  
Hindi Licen peue neusangka  
Meuka neuk pat kubri tren  
Lon dalem bek apon asa

Po Cut Ali lom ka neukhem  
Neupaleng u likot muka  
Jimat bit-bit uleh putroe  
Neupeuglah droe pura-pura

Tarek keu deh tarek keu noe  
Meunang putroe talo banta  
Ka jipeudeuk lem bak tilam  
Tarek puan ngon ceurana

Pajoh ranup dua sajan  
Marit yoh nyan putroe muda  
Ampon tuanku lon teumanyong  
Kheun beukeunong po meukuta

Bek weueh ate intan bungong  
Lon tanyong soe nama gata  
Patbu nanggroe teumpat gampong  
Neujak tueng lon ho keumeung ba

Cuba peugah teungku ampon  
Ate di lon sang beurcinta  
Seuot banta neukheun meunoe  
Hai putroe bek panyang haba

Meunyo tajak beudoh jinoo  
Sambinoe di lon kugisa  
Meunan neukheun bungong pade  
Narit singke pura-pura

Si nyak putroe han beungeh le  
Lam ate leubeh that suka  
Bak pihak that jiplueng napsu  
Jikheun laju meunoe haba

Meunyo meunan he tuanku  
Ban napsu nibak meukuta  
Nyawong tuboh darah gapah  
Neutueng beusah hai kakanda

Boh neupeubloe boh neukeubah  
Han le bantah nibak hamba  
Lom neuseuot Cut Peureudan  
Hai intan bek leupah haba

Lon takot singoh kon meunan  
Naritteu nyan sang peurbula  
Putroe seuot tuanku droe  
Di kamoe tan dua cita

Meunyo ubah ban lon kheun nyoe  
Kon lon nyoe Cut Hindi muda  
Meunan jikheun si nyak putroe  
Seuot meunoe po cut banta

Meunyo meunan po cut meulu  
Beudoh laju malam jula  
Si nyak putroe beudoh meupru  
Lop keuleumbu jicok ija

Buka peutoe putroe seudang  
Cok peukayan dum peurmata  
Keuruncong meuh pudoe intan  
Sibarang ulee ceumara

Abeh jicok dumna alat  
Jipeusapat boh lam ija  
Pihak napsu gadoh ingat  
Pirak lipat jadeh bungka

Nyankeu hai nyak beutapike  
Barangsoe le tuha muda  
Meunyo keunong that bak ate  
Singkat pike ngop bicara

Peureudan Ali hana le su  
Neueu laku aneuk raja  
Dumna alat jicok laju  
Sangat rindu putroe muda

Hingga teuma haba nyang rab  
Lon rapat malam ka jula  
Abeh sare jipeusapat  
Bandum leungkap lheueh ase ka

Kukuek manok saboh-saboh  
Goh lom beudoh cicem rimba  
Abeh tuto janji teugoh  
Buleuen peunoh tren bandua

Yoh nyan neutren Cut Peureudan  
Neuba sajan aneuk raja  
Neujak laju lam seupot klam  
Han soe tuban glap-gulita

Banta neujak bak rakan droe  
Samlakoe peugah rahsia  
Awai akhe neupeurunoe  
Narit tanggoe bak syeedara

'Oh lheueh banta kheun peuneusan  
Beudoh rijang laju bungka  
Abeh gampong teubiet u blang  
Peuseunang laju u rimba

Troh binéh gle po samlakoe  
Teubiet uroe peungeuh donya  
Neujak laju bandua droe  
Sayang putroe rot lam rimba

Bak pihak napsu that bimbang  
Putroe intan jitinggai ma  
Tinggai ayah ngon dendayang  
Tan sayang tinggai istana

Si nyak putroe han le pike  
Rindu ate that keu banta  
Pihak galak bungong pade  
Adat lam glepi jirela

Uroe malam geujak sabe  
Meute guble arong rimba  
Bukon sayang pirak lipat  
Beuseulamat nibak bahya

Leupah banta neubeurangkat  
Teuduek siat po jroh rupa  
Teuduek haba po samlakoe  
Teutap neuwoe rot lam rimba

\* \* \*

Baca jiled keudua !



HIKAYAT PEUREUDAN ALI 1

Teung



PN BALAI PUSTAKA — JAKARTA



Perpustakaan  
Jenderal Ke-

899.22

TEU

h

112

85

